

**NATIONAL ASSEMBLY OF
SEYCHELLES**

Friday 10th November 2023

The Assembly met at 9am

National Anthem

Moment of Reflection

Mr Deputy Speaker in the Chair

MR DEPUTY SPEAKER

Bonzour Manm Onorab, tou bann travayer Sekretarya Lasanble Nasyonal e piblik ki pe ekout nou. Byenveni a kontinyasyon deba Lasanble lo *Appropriation Bill, 2024*. Donk, nou ava fer apel Minis pou Finans, avan ki nou kriy premye entervenans pou bomaten.

Nou ava swet labyenveni Minis pou Finans, Planifikasyon Ekonomik avek Komers, Mr Naadir Hassan parmi nou, pou kontinyen deba lo *Appropriation Bill, 2024*. E premye entervenans ki lo lalis pou bomaten se Onorab Regina Esparon.

HON REGINA ESPARON

Mersi Mr Speaker. Bonzour tou dimoun a lekout espesyalman, zabitan Glacis, e bann madanm ki mon reprezante isi dan sa

Lasanble. Mon sezi ankor enn fwa sa loportinite, pou mwan donn mon reaksyon lo ladres e prezantasyon Bidze pour 2024.

Mr Speaker, permet mwan atraver ou, pou remerci Minis pour en ladres Bidze ki realis, e ki pa'n ezite pou regard bann problem ki devan nou, an menm tan kot in propoz solisyon kredib.

Mr Speaker, nou fek ariv 3 an depi ki Seselwa in konfyen nou sa pei, e parey ki Minis in fer resorti, i vre ki sa sanzman ki nou oule anmennen pa pou ariv dizour o lannmen, me ki i pou en traze ki pou pran letan. Akoz nou bezwen travay pou sanz sa bann *mindset* negativ, ki'n fini ankre e anzandre dan zot bann move fason fer, e ki fer zot refize sanze.

Sa i met bar e retar dan okenn zefor, pour sanz zot lapros, e pou egzekut programm Gouvernman. 3 lannen Mr Speaker, depi ki Gouvernman in konfyen en zenn konpetan pou ansarz nou lekip Finans.

Parski Minis i konn byen konte, e konnen i konbyen €25 milyon larzan *SIF* i fer an Roupi Sesel.

Mr Speaker, bokou in ganny fer dan sa pti git letan, parey Minis in fer resorti dan son diskour. Me i reste ankor otan pou fer dan sa

transformasyon, pou ki nou reisi dan sa program lonterm pou kre plis larises, kre stabilite ekonomik.

E plis diversifikasyon dan bann diferan sekter kle ki reste sa baz prensipal progre ki nou pe fer, malgre diferan defi eksteryer, parey lager Larisi, Ikrenn, Gaza, Izrael, ki kontinyen menas e retard nou progre.

Menm sa nou reste en nasyon rezilyan, e determinen pou nou ankouraz en lanvironnman konfyans ki kre lespas pou inovasyon, atir plis lenvestisman, ankadre bann profesyonnel e kre loportinite travay pou tou dimoun.

Mon apresye ki Minis in prezant nou ek en plan konpreansiv, ki demontre en plan fiskal pridant e serye, kot i reflekte langazman Gouvernman pou adres laspirasyon e bezwen son pep, dan tou sekter san kit personn deryer.

Mr Speaker, Lopozisyon depi detrwa zour in vin ek en *wish list*, plis lakaz, plis semen, *loan* pou fermye, koup pye dibwa, plis lalimyer lo semen. Selman veye, zot menm zot, zot pou napa kouraz pou lev lanmen pou vot pou Bidze.

Sa i montre zot lipokrizi, e irresponsabilite anver sa menm

dimoun ki'n met zot la. Pran zot en desizyon. Si oule manz lonmnet ou bezwen donn lanmen kas dizef. E ler ou'n gannyen, e ler ou'n gannyen annan kourtwazi pou vire pou dir mersi, silvouple. Akoz sa ki apel engra, ler ou gannyen me ou refize dir mersi.

(APPLAUSE)

HON REGINA ESPARON

Mr Speaker, sa Bidze i met bokou lanfaz lo devlopman kominoter ek lenfrastruktir sportif lo nivo distrik avek bi. Retir zenn dan bann move fleo anti sosyal, par kit zot pli angaze dan bann aktivite sportif, e ki zot reste an bonn sante.

Annan plis fasilite, ki pou ankadre nou bann zenn, pou partisip dan diferan disiplin sportif ki swa lo nivo lokal, rezyonal e enternasyonal. Parey *CJSOI*, klib sanpyon *volleyball* pou bann madanm ki pou fer Sesel an 2025, *All Africa Games*, *beach soccer*, *Zwe Olenpik*. E lezot disiplin ek kategori san ki nou bliy bann atlet *Paralympic*.

Se pou sa rezon ki Gouvernman in met en sonm 48.3 milyon pou renovasyon plizyer lenfrastruktir spor, ki ti'n ganny neglize, e tonm an rin,

oubyen pa ti a la oter anba ansyen ladministrasyon. Sa pou re donn konfyans nou bann zenn, nou bann zonn ek fanm ki partisip oubyen pratik diferan kategori spor, pou pli byen ankadre zot, par ogmant zot nivo e lendirans, pou kapab raport meday e fer nou pei fyer.

Mr Speaker, Minis in mansyonnen ki i enportan ki nou desantraliz en pe bann lenfrastruktir. "Akoz *sportsmen* i perdi bokou letan pou desann anvil pou vin servi bann fasilite." Zis pou repet son parol.

Sa i en defi ki met bokou retar. E mon siport sa linisyativ propoze par Gouvernman, pou desantraliz en pe bann lenfrastruktir spor lo nivo rezyon e osi dan distrik.

E mon ankouraze e siportele mon war en sonm 4.3 milyon in ganny mete, pou amelyor fasilite spor dan bann distrik, ki donn mwan rezon pou vot pou sa Bidze.

Mr Speaker, mon ti a osi kontan met a latansyon Minis, ki ti deza annan demars, pou fer en *sports complex* dan distrik Beau Vallon, ki ti pou osi deservi rezyon Nor Mahe, e distrik Glacis ti pou sirman benefisyen.

Landrwa ti'n fini ganny idantifye e nou ti'n vizite

ansanm ek bann zofisyen NSC ek *Planning*, anba ansyen administrasyon, apre zanmen nou'n tann nanryen ankor lo la.

Minis, sa en linisyativ ki si ti'n materyalize, i ti pou en gro benefis pour nou bann *sportsmen* dan rezyon nor.

Mr Speaker, letan mon lo sa size spor, mon ti a osi swete ki sa lannen, Bidze NSC oubyen Minister pou Spor, i adres nou demann, pou amelyor fasilite sport dan Distrik Glacis. I fer detrwa lannen konsektiv ki nou'n soumet nou proze pour lagrandisman e amelyorasyon, nou laplenn futbol, ki ti pou dan benefis nou 2 tim futbol; *Northern Dynamo* e tim Glacis.

Ki bokou fwa zot bezwen deplase pou al fer *training* lo laplenn La Retraite e *mini stadium* anvil. E sa deplasman i osi koute e zot perdi bokou letan.

Mr Speaker, mon osi sizere ki pou nou ankouraz plis aktivite spor lo nivo distrik, ki nou osi reviz sa alokasyon, ki distrik i donn bann lekip sport ki anrezistre, pou donn plis lankourazman bann lekip par kouver en pe zot depans.

Akoz zot vremen fer fas avek bokou defi. Sa i a ankouraz, plis zenn pou swazir en disiplin spor lo nivo zot distrik, olye viv en lavi dezerte e

vagabon. E nou bann lekip distrik ava benefisye e ed zot develop zot talan.

Mr Speaker, mon osi kapab dir ki sa Bidze ki devan nou i enn ki byen konpreansiv, tre pozitiv, kot i rekonnèt vilnerabilite, parey nou *Leader* Onorab Georges in fer nou remarke dan son ladres detrwa zour pase.

E mon akey sa propozisyon par Minis ek son Gouvernman, pou reviz bann benefis pou bann diferan group pou rann zot lavi en pe pli eze.

1. Benefis maternite pou sa manman, ki *self-employed*.
2. Benefis pour sa papa osi ki travay pour li menm.
3. Benefis pour sa manman ki war li donn nesans, plis ki en zanfàn.
4. E benefis pou ou zanfàn ki'n perdi enn oubyen tou lede paran.

La mon oule azoute ki letan nou pe donn bann lasistans sa kous popilasyon ki dan bezwen, nou annan nou en lapros ki pli imen e kot konpasyon i vre. E non pa en lipokrizi, ki abes dignite sa enn ki dan bezwen.

Mr Speaker, nou bezwen kapab get bann sityasyon avek en lespri ouver. Si en vyeyar in deza pe ganny en *carer* pou en demi zournen, e son lasante i

detaryore ki fer li bezwen reste lo lili, pa devret difisil pou li kapab ganny en sanzman dan son benefis, pou ki son *carer* i vin a plen tan. Nou bann aze i presye pou nou, akoz se zot ki'n eskente pou konstrir sa pei.

Alor a tou moman annou tret zot avek respe e dignite. E mon apresye sa legzersis ki nouvo *CEO Home Care* - Per Kallee, pe antreprann pou rankontre tou *carer* lo nivo distrik, pou kapab ekout zot, e konpran zot bann defi.

Mr Speaker, mon konnen ki parey nou'n tann parti minoriter pe dir, ki Gouvernman ti'n devret reviz larzan Sekirite Sosyal. Sa i a vin dan en lot konversasyon.

Parski si Gouvernman ozordi in bezwen fer monte laz pansyon, e Sekirite Sosyal, se ki dan sa vizyon lonterm, menm zot dirizan depi an 2018 ti'n komans fer sa refleksyon, ki si nou pa fer en revizyon la, i pou difisil, pou aziste dan bann lannen ki pe vini, kot i kapab ariv en letan kot pei pou nepli kapab soutenir Sekirite Sosyal. Ankor la i montre zot lipokrizi e iresponsabilite.

Mr Speaker, en size ki Lopozisyon i per pou adres li parey i ete. Akoz zot iresponsab e plito servi sa size pou fer

politik bonmarse e konfiz dimoun parey zot labitid.

Minis i dir nou ki pli gro sonm dan Bidze in al pou Minister Ledikasyon 1.4 bilyon. Lazans Proteksyon Sosyal e Minister Lasante 1.2bilyon sakenn.

Minis, mon apresye ki konmela Minister Lasante pe ofer tretman *3rd line* ek *4th line*, pou paysan kanser ki war zot dan sityasyon kot zot maladi i retournen. *Overseas Treatment Board* i bezwen vin pli transparan dan son bann desizyon.

Zot bezwen kapab eksplik pasyan, rezon pou desizyon *Board* byen kler e si posib an ekri. Parfwa bann konsiltan medikal i konfirman ki pasyan i ganny anvoye tro tar pour ganny tretman efektiv.

Mon bezwen fer resorti ki kou pou *overseas treatment* i enn ki tro o, pou nou pti popilasyon. Me Gouvernman i reste touzour angaze ek lasante son pep. E i neser ki nou servi parti sa Bidze pou edik nou popilasyon lo zot responsabilite anver zot prop lasante.

Me tout menm mon oule dir ki i annan en sanzman dan latitid dimoun anver gaspiyaz. E konmela ou nepli war latizann dan rigol lendi bomaten parey oparavan.

Mr Speaker, bokou fwa ou tann dimoun pe *call* pe rod disan pou paysan, aköz i kontinyen annan mankman. E la mon pe sizere ki petet Minister Lasante a lavenir i investi dan en *mobile blood bank*, ki kapab *reach out* dan bann kominote pou fer koleksyon, e sa i ava en fason pou anplifye *blood bank*, lo en baz regilye pou anpes sa mankman.

Mr Speaker, lo kote mon distrik, mon apresye ki dan sa 3 dernyen lannen bokou plis proze i'n ganny materyalize.

1. Proze pou peser kot nou'n donn zot en nouvo bazar. E la mon lans ankor en lapel pou nou peser servi sa fasilite byen.
2. Proze pou konstri fasilite pou met zot bann lekipman lapes ek masin, e fasilite *crossing*, plan pe byen progrese e pou demare avan lannen fini.
3. Nou'n konplet sa proze *day care* ki ozordi pe deservi bann manman ki annan pti zanfan e ki bezwen al travay. E sa fasilite i deza an mars depi boner sa lannen, kot plis ki 40 zanfan i servi sa fasilite.
4. Nou'n osi amelyor fasilite *parking* kot Lasal Parwasyal, pou bann dimoun ki vin

- drop* zot zanfan e osi paysan ki vin servi fasilite lasante.
5. E nou'n met fasilite peron pou akse *parking* e osi simityer *La Mission*.
 6. Proze Bazar legim in konplete North East Point, e i annan 5 *tenant* ki'n fini anrezistre pou servi sa fasilite lo en baz regilye. E distrik pe anvizaze fer en bazar ouver tou le mwan, pou dimoun ki anvi vin vann zot prodwir agrikol.
 7. Baraz otour laplenn North East Point i'n konplete, e nou kontan ki sa fasilite pe ganny servi par bann zenn, ki nou'n war zot osi ganny en *set* liniform foutbol anba sa proze konsil, pou adopte en distrik.

E la mon ti a kontan remersye Profeser Mohsin Ebrahim, Konsil pou Sesel Sid Afrik ki'n onor son promes, kot in fer donasyon 4 *set* liniform pour bann lekip foutbol dan distrik. E in donn son langazman distrik pou fer en donasyon lo en baz anyel.

Negosyasyon i ankor an progre pou finaliz bann formalite, par Minister Later ek *SLTA*, pou kapab konplet lagrandisman semen Nort East Point. Proze lakaz *ex Ferrari* in demare pou konstriksyon 12 *unit*, 2 lasanm e di-si 2024 nou

ekspekte war sa proze konplete. Ankor avek en lespri pozitiv Mr Speaker, Gouvernman in aste e morso later avek en dimoun prive, pou fasilite konstriksyon semen, pou akse sa morso teren ki nou apel *ex SACOS*.

E la mon apresye ki Minis in enform nou ki finansman in garanti anba *Saudi Fund* pou konstriksyon proze 24-24, ki'n la lo lalis espere depi anba ansyen ladministrasyon. E mon felisit Gouvernman *LDS* ver sa demars pou garanti larzan pou sa proze, parski dapre plan nou pou ganny anviron 48 *unit* e plis.

Mr Speaker, distrik pe osi diskit ek Minister Lakaz, pou konstri ankor flat lo vilaz North East Point, ki baliz avek St Helene, pou nou kapab ofer plis lozman bann aplikan dan distrik ki lo lalis lakaz, ki pe fer zot kontribisyon serye.

E la mon le lans en lapel ek zabitan Glacis ki'n fer laplikasyon pou en lozman ouswa later *land bank*. Distrik pa pou kapab fer okenn desizyon ou faver pou personn. Si ou, ou deside ou pa pou fer okenn kontribisyon anver *HSS*. Sa i ou responsabilite.

E an fezan sa Gouvernman a zwenn ou lanmwatye semen pou gete dan

ki fason i kapab ed ou. Mon le met a ou latansyon;

- Ou ki annan en laplikasyon me ou pa pe fer kontribisyon, reflesir la konmela menm, akoz demen i kapab tro tar.
- Ou ki'n deza komans peye, e apre ou'n arete, pa esper demen me azir ozordi akoz demen i kapab tro tar.
- Ou ki annan aryeraz e ou war ou dan difikilte, aproz e ganny en konversasyon ek zofisye *Housing*, e pran en konsey ki mannyer ou kapab re aziste ou peyman.

I pa vo lapenn pou ou asize, pa fer naryen, pa pran ou responsabilite. E demen ler lakaz i ganny donnen ou pa gannyen, pou kriy viktimizasyon. Akoz en tel latitud pa pou ed ou avans devan.

Mr Speaker, Lotorite Distrik pe osi eksplor bann posibilite, pou idantifye later Gouvernman dan distrik, ki lib pou kre plis *land bank*, pou ki dimoun ki pe esper en bout later kapab benefisye. Nou'n vwar plis lalimyer ganny enstale, e semen segonder in ganny re sirfas. Nou espere ki 2024 nou a war en nouvo kours koltar lo semen Glacis.

Nou'n war lagrandisman semen La Gogue an montan kot Danm ki'n komanse, e en nouvo

kours koltar in ganny mete. E la dan Bidze mon war ki i annan en sonm 1.5milyon ki'n ganny mete pou kontinyen ek sa proze, ki safwasi pou komans depi kot legliz an montan.

Nou konnen ki sa sonm i pa pou sifi, me nou dir mersi tout menm touzour. E difikilte ki distrik pe rankontre i ek problem *wayleave*, kot *Land Transport* in idantifye 25 propriyete ki pou bezwen donn *wayleave*.

E demars i an progre par Ladministrasyon Distrik, pou sansibiliz bann dimoun ki'n ganny idantifye pou siny *wayleave*.

Pou bann fasilite spor, travay in fini ganny fer pou transform *parking* Sant Kominoter, pou en *multipurpose court*, kot zenn a kapab servi sa fasilite pou *basketball* e *volleyball*. NSC in fini delivre *net* avek *ring*. Mon swe ki avek lagrandisman nou laplenn futbol. Nou a osi ganny en graden kouver pou ofer plis konfor pour sa ki servi sa fasilite.

Mr Speaker, lo kote ledikasyon. Letan mon pe get Bidze mon war ki i annan en alokasyon 3.5milyon pou *remedial work* kot Lekol Glacis par lao sa 2.1milyon ki ti ganny mete lannen pase.

A sa pwen mon oule remerci Minister Ledikasyon e ensi Minister Finans pou sa zefor kontinyel ki zot in mete anver Lekol Glacis, pou rektifye bann defayans, kot sa lenstitisyon.

Parski depi ler ki nou'n ganny kado sa lekol i annan pa mal problem, kot Minister in bezwen sanz tou son *tiles* akoz ti glise. E zanfan ek *teachers* souvandfwa ti tonbe. E son *railing* ki ti rouye e kase, e komanse tonbe ki'n bezwen ganny ranplase.

Materyo ki'n fer lafnet ek laport pa'n ganny trete, e karya in anvair tou dibwa, kot in nesesit retir tou pou ranplas ek lafnet metal. Materyo elektrisite ki'n ganny servi kot voltaz pa lo standar, ki'n bril tou lekkipman e kouran i sote ki'n bezwen ganny ranplase.

Mr Speaker, i malere ki Gouvernman ozordi i war li bezwen depans sa kantite larzan, zis pou rektifye problem apre problem, pou fer sir ki nou zanfan i an sekirite pour zot laprantisaz. En larzan ki ti a kapab ganny servi pou konstri sa fasilite sportif, ki lontan paran ek *management* lekol pe pouse pou zot gannyen.

Mr Speaker, Glacis osi i annan zabitan ki'n apros Gouvernman pou ed zot avek

semen pou ariv pli pre ek zot lakour. Sa i osi nou swe, me i annan bokou defi ki distrik i rankontre dan negosyasyon pou kapab fer sa arive.

Mon oule demann zabitan pou ed nou dan sa bann negosyasyon. Parski bokou fwa se diskisyon ou mal konprenezon ant vwazen ki fer ki nou pa avanse avek negosyasyon.

Nou annan semen kot lafanmir Hoareau Machabée ki fek ganny *tender* sa semenn. Semen kot lafanmir Fontain Sorento napa *wayleave*. Semen kot lafanmir Bamboche e Azemia Machabée, difikilte *way leave*. Kot lafanmir Antat e Barreau Machabée napa *way leave*.

Semen kot lafanmir Tirant, Azemia e Pillay Glacis, zot later i anklave. E distrik pou bezwen antre an negosye ek diferan propriyeter pou ed zot.

Tanka semen kot lafanmir Ryland, Estrale ek lezot la Gogue, Gouvernman fek ezans en morso later ek en dimoun prive pou kapab komans sa semen. I swe Lotorite Distrik, pou ofer sa fasilite zot tou ki dan bezwen. E negosyasyon i kontinyen, me zot osi fodre zot ede nou.

Mr Speaker, bokou lanfaz pe ganny mete dan sa Bidze,

pou lasante nou pep. E la ankor Gouvernman in met plis larzan ki lannen pase. Zabitan Glacis i kontinyen benefisye ek lasante pou naryen anba sa alokasyon.

Me mon le fer ankor en lapel pou demann Minister Lasante pou regard dan posibilite met dokter, omwen 3 fwa par semenn, pou deservi nou bann zabitan. Parski zabitan Glacis i perdi bokou letan pou esper dokter ler zot al Beau Vallon, akoz sa volim dimoun ki deza pe servi fasilite konsiltasyon laba.

En lot konsern Mr Speaker, se ki sa *pharmacist* ki donn latizann i war li pe travay anba presyon. Sirtou kot i bezwen *deal* avek *repeat prescription*, menm zour ki dokter i fer konsiltasyon e sa i fer klinik ankonbre.

Nou pe sizere ki Minister i regard son *schedule*, ki omwen ki en zour i ganny rezerve pou fer bann latizann kronik, pou retir en pe presyon lo sa servis e evite ki dimoun i esper bokou letan.

Mr Speaker, Glacis i en distrik ki pa'n ganny eparnye, ek lefe negatif ki sanzman klima i anmennen. Kot delo monte dan plato i kontinyen afekte bann zabitan, ki reste dan sa landrwa. E osi bann zanfan dezabilite kot *Vocational*

Training Centre e kot Sant Otizm.

Plizyer visit in ganny fer par zofisye konsernen, pou rezourd sa problem. E i neserer ki nou lev nivo semen dan plato o bor lopital, e elarzi sa pasaz ki deza egziste pou pli gro volim delo pase, la dan larantre Lopital North East Point. E pli lwen dan plato ouver en lot *culvert*, zis avan *Rehabilitation Centre* pou tir sa delo lo lot kote.

E sizesyon ki mon'n deza fini avans devan, me ler mon pe regard Bidze, dan sa Bidze petet Minis ou ava eklersi mwan, anba ki *Head* i pou tonbe. Parski nou pa war okenn alokasyon ki'n ganny mete pou sa proze, ki mon konsider li irzan.

I annan par kont ler mon gete anba *PSIP* pour Minister Lanvironnman e Sanzman Klima, en sonm 3 milyon pou *road infrastructure project* e en lot 3milyon pou *construction of drain* Carana.

Mr Speaker, Minis in endike, ki en sonm 12milyon in ganny apropiye dan sa Bidze, pou fer travay renovasyon lo ansyen lekol ners *NIHSS* pou ofer tretman pou bann dimoun ki ganny afekte ek latak laserve.

En servis ki byen merite, parski i annan pa mal dimoun

ki ganny afekte ek sa maladi isi Sesel, kot zot bezwen sa tretman lonterm sirtou an term *physio* pou ed zot rekipere.

Mr Speaker, an menm tan ki nou akey en tel bon linisyativ, mon swe ki avek sa renovasyon zot a osi konsider renovasyon lo sa fasilite *hydrotherapy*, ki son striktir i deza egziste dan sa landrwa. Me ki zanmen in ganny servi, pou ki bann pasyan i ganny en tretman konpreansiv.

Parski dan tretman rehabilitasyon pou paysan *stroke*, *hydrotherapy* i osi enn ki tre esansyel.

E la mon pe koz par leksperyans Mr Speaker, mon'n pas ladan mon konnen ki mon pe dir. Minis in fer nou konpran rezon pou logmantasyon dan Bidze pou Lazans Proteksyon Sosyal se pou konbat fleo sosyal. Lo sa not mon ti ava kontan remersi mon bann zabitan Glacis. Akoz deplizanpli kantite dimoun ki pe depan lo *methadone* i diminyen. E mazorite sa bann zenn i al debrouye apre zot tretman mon salye zot, sof pou en pti group ki kontinyen vin en nwizans pou nou kominote.

Minis, mon war bokou ki'n ganny fer ek sa dernyen Bidze, me i touzour annan lespas pou amelyore. E enn bann keksoz ki

mon osi apresye se ki menm dan letan difisil, nou Gouvernman in kapab delivre lo son promes, pou met plis larzan dan pos son Seselwa. E in osi kapab met devan son pep ki se atraver travay dir ki nou pou reisi nou tou ansanm.

Mr Speaker, sa Gouvernman in fer sir ki in montre lapresyasyon pou bann ki'n pran zot retret, bann ki pli aze sa ki fer byen. Bann ki sorti lo zil pou vin Mahe pou ganny baba, bann zanfand dan lekol ek ledikasyon, espesyalman bann madanm for dan lasosyete.

E la lo sa not Mr Speaker, mon le remersye en fanm ki'n ede kit nou pei alaflot atraver son konsey, en patriyot senser e sa se pa lot ki Gouverner Labank, Manmzel Caroline Abel.

(APPLAUSE)

HON REGINA ESPARON

Lo non Lasanble, Minis pas nou konpliman ek sa madanm pou dir li kontinyen sa bon travay. E nou swe ki i a kontinyen enspir bann lezot zenn fiy pou devoue.

Minis in tous tou san kit personn deryer. Bann proze ki zot vin avek i fer sans e pa en gaspiyaz. E en pa dan en semen ki Gouvernman in promet zot. Menm si i annan ki la zis vin fer

tapaz. Mon konpran zot lo lot kote latab zot pa'n kapab delivre sa ki nou Gouvernman in delivre dan sa 3an. Ronfle, gele *LDS* ki pe *rule border*.

(APPLAUSE)

HON REGINA ESPARON

Mr Speaker, koman *Chairman* bann madanm isi dan sa Lasanble, mon pa pou fer zistis si mon pa tous lo fleo sosyal, ki kontinyen ravaz nou sosyete. Akoz dan mazorite ka, tou sa bann fleo i anmenn avek li vyolans domestik.

Minis, mon kontan ki finalman mon'n war en sonm 2 milyon pou konstri en *halfway home*, ki pou abrit bann viktim vyolans domestik tanporer. E byento parey nou'n fek ganny enformen dan en *workshop* kot mwan menm ek Onorab Larue ti asiste ek *Gender Unit* kot Minister Lafanmir, ki *Domestic Violence Act* pou finalman antre an viger apartir le 25 Novanm, sa zour ki lemonn i mark komansman sa 13 zour ki ganny dedye pou mark sa lalit kont vyolans domestik "*The Orange Day*".

Lot size Mr Speaker, se sa size drog. E pou konmanse, mon oule felisit Gouvernman dan sa lalit ki i pe anmennen, kont drog parey i ti promet. Nou

konnen ki i enn ki en lalit ki pa fasil ditou, parski i annan dimoun ki ankor pe soutir bann eskobar. E drog i ankor pe antre dan pei pou anpwazonn nou zenn.

E mon soulaze ki dan sa Bidze i annan en sonm 14.5 milyon, pou konstriksyon en sant pou bann adikt, pou ede ed zot refer zot lavi. E pli tar zot a kapab reganny entegre dan sosyete, pou kontribye pozitivman anver nou lekonomi. Sa i montre lenportans ki Gouvernman i annan anver nou zenn, kot i le donn zot sa sans pou refer zot lavi.

Me menm sa Mr Speaker, mon oule dir ki bokou dimoun i konplent lo sa size drog. E dan vilaz North East Point sa size drog i en sel kosmar. Kot ou pase zot pe pike, e bokou fanmir pe soufer, kot zot keksoz i ganny vole, kot zot napa en *privacy* nek droger i ale vini devan zot laport.

Selman dan tousala i ankor annan dimoun ki soutir sa bann adikt. E aste keksoz vole, ki droger i vin vann zot pou ganny larzan drog. Tandis ki lezot pe soufer.

In ler ki nou koman en pep nou vin pli onnet ek nou lekor, e deside si nou vreman anvi zwenn Gouvernman lo sa

semen elimin drog. I pa sifi pou nou kri leokri sak fwa en zenn i perdi son lavi, akoz sa fleo. Selman nou pa fer naryen pou dekouraz sa en ki pe vann sa pwazon.

Ser, frer Seselwa, annou debout e denons sa bann *dealers* e dir vreman for ki nou kont sa lapoud ki pe anpwazonn nou zenn, pe briz lavenir nou zanfán, e menas nou legzistans.

Mr Speaker, mon oule felisit tou travayer dan servis piblik, ki pe donn tou e pe delivre pou fer sa pei avans devan. Me ou ki pe kale, asiz lo *file* dimoun, fer dimoun fristre, oubyen vir an ron ek son problem, in ler pou ou realize, ki en tel latitud i zis met retar progre e devlopman en pei.

E i pa ankourazan pou sa enn ou koleg travay ki pe donn tou, pou fer keksoz avanse. Sa bann kalite latitud i bezwen sanze. E pou ou ki le ganny ou trezyenm mwan saler a plen, en tel latitud pa pou ed ou ditou. Alor i enportan ki zot sekwe zot e vin pli prodiktiv.

Mr Speaker, letan mon pe konklir, 2 zour pase mon ti pe get en *video*, e mon ti war en Onorab lo lot kote latab pe demande, ki pou fer ek Wavel? Mon mazin en i ti pe koz lo nou Prezidan Elekte sa. Son

larepons i senp, dan lespri pozitivite an 2025 donn li ankor 5 an pou li diriz sa pei e fini enplimant son program ...

(APPLAUSE)

HON REGINA ESPARON

... apre nou a ganny tou rezon pou kriy, “Viv nou Prezidan Elekte!”

Non pa pou fer detrwa droger desan Lari Bazar pou glorifye en boug, ki’n deklar son lekor Prezidan kan ni lo *ballot paper*, i pa tro sir i pou arive.

(APPLAUSE)

HON REGINA ESPARON

Apre zot refize donn sa R800 bannla si pa menase ,pa pou peye. Sekreter Zeneral i konn sa byen li.

(Interruption off-mic)

HON REGINA ESPARON

Akoz sa ki pe pase - akoz sa ki pe pase anndan dan zot kan, e sa lanbisyon e leksitasyon ki zot *leader* annan pou vin Prezidan, si pep Seselwa pa fer atansyon, nou pei pou retourn anaryer parey kanmaron. E nou pou tonm dan sa presipis ki’n pran 43 an pou Prezidan Ramkalawan ek son lekip retire!

Ler mon tann *Leader* Lopoziyon, fer lapel pou fer en eleksyon pli boner, mon pa etonne akoz i montre ou ki son *leader* i vreman lafen. Non pa dimoun La Digue ki lafen parey i ti pe dir nou, me se li ki lafen pouwar, akoz i anvi vin detri sa ki *LDS* in konstri dan sa 3 an.

Mr Speaker, mon le dir gro dokter kontinyen reve laba *Maison du Peuple*.

(APPLAUSE)

HON REGINA ESPARON

Enjoy son gro larzan pansyon R110 mil e donn Seselwa en lape!

Par kont, Minis nou bezwen konmase reflesir ki manner Gouvernman i rebran *Maison du Peuple* e retourn li pou Lepep Seselwa!

(APPLAUSE)

HON REGINA ESPARON

Retourn pou Lepep Seselwa avan ki zot konmans vann par bout. Parski sa ti en don ki Gouvernman ti donn Lepep Seselwa, me non pa parti minoriter.

Toutfason ganny eleksyon bliye. Akoz Seselwa pa'n blyi zot. E Ali Ali pa pou kapab fer naryen kot i ete. Akoz li i pa ti anvi vin la li akoz nou konnen

in dir i pa ti anvi vin la gannyen sa zafer li.

(laughter)

HON REGINA ESPARON

Mr Speaker, mon'n tire konpran mwan?

Kantmenm zot a kriy Albert Rene, Albert Rene - mon krwar pa si i pou leve anba sa morso beton, parski zis Zezi ler ti kriy Lazar, ki Lazar ti sorti dan tonbo, i ti reveye e ti zet son bando.

(APPLAUSE)

HON REGINA ESPARON

Mr Speaker, ki Bondye i beni nou ek nou bann dirizan. E i eparnye nou pti pei kont tou lespri move, satanik, e dyabolik. Avek sa Mr Speaker, mon remerci ou.

(APPLAUSE)

MR DEPUTY SPEAKER

Mersi Onorab Esparon. Prosen entervenans lo lalis se Onorab Norbert Loizeau.

HON NORBERT LOIZEAU

Mersi Mr Speaker. Bonzour Minis. Bonzour tou Manm prezan. Bonzour tou dimoun a lekout. En bonzour spesyal pou zabitan mon distrik Bel Air.

Mr Speaker, an Oktob 2020 pou premye fwa, Sesel ti ganny en Gouvernman elekte demokratikman. Kot Gouvernman *US* ki ti o pouvwar pou plis ki 43 an ti trouv li dan Lopozisyon konman en parti minoriter.

E *LDS* ti antre dan Gouvernman avek en gran mazorite e en gran mazorite isi dan Lasanble Nasyonal.

Sa letan pei ti pe pas dan en moman difisil. Avek *COVID* ki ti pe tap lemonn antye, pti Sesel pa ti ganny eparyen avek tou sa ki ti pe arive, sa ki ti pe pase dan lemonn.

Avek nou lafrontyer ki ti'n fermen avek lemonn, sa ti fer ki nou lekonomi ti ganny tape for. Akoz tourizm premye pilye nou lekonomi ki nou ti depan lo la, ti lo son zenou. Avek en kof Leta ki ti preski vid, parey nou Prezidan ti dir, nou ti ganny en kales kase, ni menm larzan pou pey travayer dan sekter piblik ti napa. Sesel ti war li lo son zenou.

Konman en Gouvernman serye ki'n pare pou travay - travay dir pou rod solisyon pou problem ki nou ti ladan, nou ti war nou pe bezwen pran bann desizyon drastik. Bann desizyon drastik pou permet nou kapab sirmont, sa bann baryer ki ti devan nou. Sirtou

avek en Lopozisyon iresponsab ki pa ti edan, ki ti a pe fer tou fason pou nou *fail*.

Premye keksoz ki nou ti fer Mr Speaker, nou ti tap laport nou bann pei zanmi, pou nou kapab ganny vaksen pou donn nou pep, pou kapab ganny sa nivo *herd immunity* parmi nou popilasyon. Nou ti reisi fer sa atraver en don vaksen ki nou ti gannyen avek Gouvernman *UAE* e avek lezot pei zanmi.

Aprè sa Mr Speaker, nou pa ti vir deryer konman en Gouvernman. Avek bann mezir strik nou ti re ouver nou por. Nou ti re ouver nou *airport*. Nou ti re ouver li avek lemonn Mr Speaker. Sa ti fer ki nou 2 pli gran pilye nou lekonomi ki lendistri touris ek lapes ti rebran, e larzan ti konmans rantre dan nou lekonomi.

Malgre bokou kritik sorti kot Lopozisyon, nou ti reste fikse lo vizyon ki nou ti annan pou nou pei. Avek sa in fer Mr Speaker, avek travay dir ki nou Gouvernman in travay pandan moman difisil, sa ti fer pou ki pou 3 an nou'n kapab prezant en Bidze sak lanmen pou pei.

E Vandredi pase Minis pou Finans, Msye Naadir Hassan in vin prezant avek nou en lot Bidze pou lannen 2024. Pou mwan Mr Speaker, sa Bidze ki annan bokou keksoz pozitiv

ladan. Sa ki enteresan, sa Bidze pe adres plizoumwenn bann dimoun ki pli dan bezwen. E la mon anvi felisit Minis avek son zenn lekip profesyonnel ki'n travay nwit e zour dan preparasyon sa Bidze.

E sa ki enteresan ankor Mr Speaker, sa bann teknisyen zot *still* ankor pe travay, pou fer Lepep Seselwa konpran, kwa ki annan pou zot dan sa Bidze. Tou le swar dan nouvel zot pe eksplike menm. Yer swar ankor zot pe eksplike menm *still* Lopozisyon pa konpran menm Mr Speaker. Zot *still* konfize menm.

Mr Speaker, pandan bokou lannen, serten kous nou popilasyon pann ganny gete parey zot ti devret ganny gete. E la mon kontan pou vwar ki i annan keksoz pou zot dan sa Bidze. E mon anvi remerisi Minis Finans ek sa lekip pou mazin sa bann dimoun.

Mon kontan war ki bann semi orfelen zot kapab ganny en ogmantasyon sorti R1300 pou vin R2300. E la mon anvi dir avek Melissa en manman tousel dan ki sorti dan distrik Port Glaud, ki mon'n anmenn son konsern devan e son konsern in ganny ekoute. I pa en gran keksoz me omwen i enn pti soulazman.

Parey pou bann orfelen a plizyer lannen ki zot pa'n ganny gete, la zot a ganny zot enn pti – en ogmantasyon, en ogmantasyon R3134 ki touzour keksoz.

I annan bokou ki pe ganny fer pou soulaz bann ki vreman dan bezwen pou zot fer fas ek lavi. Maternite, benefis maternite in ganny ogmante. *Allowance* pou bann manman ki sorti lo Zil Pros, ki pou vin ganny zot zanfann Mahe in ganny mete dan Bidze pou zot.

Mr Speaker, i annan bokou plis ankor dan sa Bidze pou nou dimoun. Kot menm bann *foster parent* zot a kapab ganny en *one-off payment* R25 mil kot i a ed zot dan sa responsabilite nob, ki zot in pran pou okip bann zanfann ki napa en paran.

Mr Speaker, i fer mwan anviron 12 Bidze ki ganny prezante devan mwan, depi ler mon en Manm Lasanble Nasyonal. Zanmen mon'n war en Bidze parey ki'n telman met sa ki pli dan bezwen premye.

Eski nou pa pe pran lentere bann ki dan bezwen? Be Mr Speaker, i annan pa war. Be *Pinocchio* son nennen nepli pwent. In gonfle, i war zis devan i pa war dan kote sanmenm i pa war naryen. I dir ki son leker i

fermal ler i war lopital La Digue vid.

Mr Speaker, be ti annan pasyan anba lavarang. Ti annan siporter *US* apre ki zot ti'n bwar zot ta lasarnat, tansyon, nivo disik ti'n monte. Dapre konpran zot ti'n swente. Tou ti pe asize red pe esper dokter. Anba sa menm lopital ki Onorab Uranie avek en pti group ti fer petisyon pou pa fer. Be selman i ale i tir portre dan en gran semiz ble. I poste lo *Facebook* selman i pa ti le.

Mon tann Onorab Lemiel yer dir ki napa latizann, napa antibyotik, napa nanryen dan nou lopital. Be Mr Speaker, sa bann ki ti pe asize anba Lopital *St Mary's* La Digue, oule dir mwan zot pa'n ganny trete? Dapre konpran zot in ganny tou zot latizann ki zot ti bezwen e zot pa'n mor. Zot ankor la pe viv Mr Speaker.

E plis ki sa Mr Speaker, zanmen in deza annan mankman latizann dan lopital, pandan letan ki *US* ti zot ti dan Gouvernman? In deza napa Mr Speaker, pa zis napa dan letan *US*, latizann ti ganny fer vini lo non Lopital Sesel. Apre ki ti arive ti ganny pran ti al ganny vann dan prive!

Tousala ti arive anba *US* Mr Speaker. ozordi zot a pe gele, pe dir ki keksoz pa byen.

Pourtan Mr Speaker, sa menm Onorab Anse Royale i a pe gannyen anba sa Gouvernman! Selman i konplent menm Mr Speaker.

Mr Speaker, Gouvernman *LDS* malgre tou sa mansonz ki pe ganny fer par *US*, pou konfiz sa pep nou reste *focus* lo nou travay, pou nou amelyor lavi akoz se sa ki nou'n ganny demande pou fer.

E nou pou toultan anmenn pozitivite dan tou sa ki nou fer, akoz nou krwar dan en Sesel pozitiv. Tou sa bann lakonplisman, se akoz nou en Gouvernman ki'n met pozitivite dan tou sa ki nou fer.

Parey Minis in dir konman en pei ki vilnerab avek tou sa ki pe arive dan lemond, ki pe afekte nou konman enn pti Leta Zil. Nou pou bezwen fer tou pou ki nou pei i reste soutenab. E laprev i devan nou ozordi.

Pou nou reste soutenab Mr Speaker, nou tou nou bezwen leve e debourye. Nou tou nou bezwen anmenn en kontribisyon pou nou pei. Parey Onorab Zialor e ou menm ou'n dir yer. Olye demande ki nou pei i kapab fer pou nou. Nou osi nou bezwen demande ki nou kapab fer pou nou pei nou osi.

E la mon anv i dir avek lazenes pran zot letid o serye se zot ki pou vin nou bann dirizan

demen. Aret ekout bann ki'n la pou plizyer lannen e pann enterese avek zot, pann enterese pou fer nanryen pou zot, e ozordi zot la zis pou konfiz nou lazenes.

Mon kontan pou war ki larzan in ganny mete dan ledikasyon. *Laptop Scheme* 5 milyon. E la mon kontan tande ki marmay dan primer osi pou benefisyè. *Allowance* R2 mil pou bann etidyan ki dan sant profesyonnel sa i ava ed zot, aste serten zot bann lekipman ki zot a bezwen pandan zot letid.

Bann etidyan Zil Pros Mr Speaker, pa pou bezwen desann Mahe pou zot fer zot *A Level*. Zot pou fer li Praslin menm. Sa i a fer ki zot pa a bezwen kit zot fanmir aköz lavi familyal i en keksoz ki enportan dan lavi bann zenn etidyan.

E nou konman en Gouvernman serye e responsab nou rekonnet sa. R3.1 milyon pou konstriksyon Lekol La Digue. Mon panse sa voyaz Onorab Rocky pa ava ganny ankouraze par son parti, pou fer en petisyon pou dir pa fer.

E pa bliye Mr Speaker, ti annan en larzan si mon mazin byen, €20mil ki en nonmen Marek ti donnen pou lekol La Digue, ki ti disparout anba Ladministrasyon *US*. Kot apre

zot ti *hire* en *private change* e zot ti deport li se zot. Ti deport li se li Mr Speaker, apre ki zot ti'n vol tou son larzan.

Mr Speaker, ou war Onorab Pillay pe koz deport dimoun aköz zot fer byen sa zot. Avek konstriksyon sa lekol, i a fer ki bann zanfan lo La Digue a ganny en lekol nef parey Lopital *St Mary's*.

Kantmenm i annan pe gonfle ladan ki pou fer - kantmenm zot pe gonfle osi laba lot kote i pou pli *conducive* pou zot fer zot laprantisaz. Tousala Mr Speaker, se bann keksoz ki nou Gouvernman pe fer pou amelyor lavi nou bann zabitan lo Zil Pros.

Mr Speaker, nou Gouvernman pa fer ekstravagans avek larzan Lepep Seselwa, parey *US* ti fer ler zot ti dan Gouvernman. Nou fer sir ki i annan *accountability* e latransparans dan tou depans ki nou fer. Mon'n tann *Leader* Lopozisyon dir ki nou pe mal servi larzan, ki bann pei arab ki zanmi avek nou in donn nou.

Mr Speaker, be lekel ki *Chairman FPAC*? Be Onorab Pillay ki *Chairman*, ki i a pe fer? Pa i ganny peye pou sa pos? Fer son resers pa vin avek bann lakizasyon ki pa fonde zis pou vin konfiz dimoun.

Mr Speaker, be lekel ki annan rikord pran larzan arab donn bal ladan? Pa lot ki *SPUP*, *SPPF*, Lepep, *US*, ki ozordi *ANUS*. E yer mon'n tann Onorab Aglae pe koz byen for, pe dir ki tou keksoz ki annan dan Sesel zot ki'n konstri, zot ki'n fer. Lakaz zot menm, konblaz zot menm. I annan ankor mon pou dir zot ankor ki zot pann dir Mr Speaker.

Mr Speaker, in donn en lalis pli gran ki zanmen mon'n deza tande. Mr Speaker, be i annan ankor en ta keksoz, ki zot in fer ki Onorab Aglae pann dir nou. Be mon a profite konman mon annan mikro mon ava dir pou ki sa lalis i a vin en lalis konplet.

Mr Speaker, \$50 milyon ki ti en don sorti *UAE* ki ti rantre Labank Santral, segonn i ti disparet. Lekel ki ti vole? Zot. E pa bliye Mr Speaker, Onorab Pillay ti kriye byen for, mwan mon pou al rode \$50 milyon, mwan! Konman *Chairman FPAC*, bro Lepep Seselwa i ankor pe espere. Akoz en promes set en det.

R4.5 milyon Mr Speaker, pou devlopman sa menm Zil Perseverance ki zot in dir zot in konstrir, ti disparet Mr Speaker. Lekel ki'n vole? Zot.

Larzan mersener Mr Speaker, Sid Afriken ti peye.

Lekel ki ti vole? Larzan lavant zarm Marlo Mr Speaker, ki ti ede pou annan zenosid Rwanda. Lekel ki ti vole?

Larzan Krejcír Mr Speaker, ki zot ti donn li en zoli non Jules Savy, ki apre zot ti deport li. Dapre konpran *Leader* zot parti i konn keksoz ladan Mr Speaker.

Lekel ki ti vol larzan Jules Savy, Mr Speaker? Zot. Larzan ki ganny kasyet Mr Speaker, anba bann *Heads* dan Bidze, kot apre gro lanvlop gri ti mont *State House* pou ganny partaze. Onorab Cosgrow i konn byen sa li Mr Speaker, dapre ou sa bann letan i ti Minis. Lekel ki ti vole?

Larzan paspor, larzan lavant paspor Mr Speaker avek etranze, sepa konbyen milyon Dolar ti gannyen, Sesel ti gannyen. Me larzan ti ganny disparet sa anba Ladministrasyon *US*. Lekel ki ti vole?

Be Mr Speaker, mon a dir enn dernyen. Mon a kit larestan pou Onorab Arissol, akoz in dir mwan li osi i annan en lalis. Dernyen Mr Speaker, an 1977 lekel ki ti vol nou pei atraver en Kou Deta, Mr Speaker? Apre zot ti monte zot ti dir en group dimoun, in dir mwan vin diriz zot. Lekel ki ti fer sa Mr Speaker? Zot.

Mr Speaker, Mr Speaker, nou pei in ganny *rape* pa mwan ki'n dir sa defen Mr Mancham dan son liv, i ti ekrir "*paradise raped*". Mr Speaker, lekel ki ti *rape* nou pei Sesel Mr Speaker? Zot!

Mr Speaker, mon kapab konpran akoz zot pe dir tir li. Akoz deplizanpli nou pe dekouver tou zot bann vol, tou zot bann koripsyon, tou zot bann manboulouk ki zot in fer pandan letan ki zot ti o pouvwar. E la zot oule retourn ankor. Akoz zot trouve ki nou lekonomi pe refer, pou zot vin kontinyen vol nou larzan. Sanmenm ki apel voras pouvwar Mr Speaker!

E la zot pe fann tou sort kalite rimer konmkwa i annan koripsyon dan nou Gouvernman. Zot manz zot bannann apre zot anvoy lapo lo nou. Zot krwar ki sa pep la deor in oubliy zot Mr Speaker. Me en keksoz dimoun pe dir zot deor, zot a soulaze me leve ankor non. Akoz tou Seselwa Mr Speaker, i konnen ki *US* i sel opsyon pou troun Sesel an aryer!

(APPLAUSE)

HON NORBERT LOIZEAU

Leta nou bann lenfrastriktir i montre nou ki leta nou pei ti ete anba Gouvernman *US*. Tou nou bann lenfrastriktir in tonm an rin. Sa in arive akoz pandan plizyer lannen in napa bon *maintenance*, ki'n ganny fer lo tou bann lenfrastriktir Gouvernman.

Sa i enkli nou bann lenfrastriktir sportif enkli lezot batiman Gouvernman. Pourtan Mr Speaker, dan Bidze ki ganny ti prezant ek nou sa bann ler zot ti o pouvwar, ti annan alokasyon pou *maintenance* ladan.

Pa bliye Mr Speaker, Bidze, Bidze Lasanble Nasyonal sa letan *Leader* zot parti ki ti ansarz! Zis mazine Mr Speaker, ki kalite bal ki ti pe ganny donner. Kart *ATM* ti ganny donner ler zot *travel* aletranze, pou zot kapab fer zot *shopping* lo la.

Mr Speaker, tousala ti annan kot nou Lasanble. Mon kapab konpran Mr Speaker, akoz son de neve pe siport li an mor! Selman sa letan Mr Speaker, Bidze ti vin devan nou 9er bomaten. 10edmi i ti pase avek en gran mazorite bann po fler, dirize par *Leader* zot parti Mr Patrick Herminie.

Personn pa ti ganny dwa kestyonnen, akoz zot konnen nou ti pou war tou zot bann

trik! Tou zot bann trik mardaz ki zot ti a pe fer.

Oli sa bann larzan kontra? Dan sa bann Bidze ki zot ti donneren - ki zot pase sa bann letan. Kontra ti ganny donneren avek dalon selman travay pa ti ganny fer. Apre larzan ti ganny partaze.

Onorab Cosgrow, Mr Speaker, SG pou US atraver ou, i konn byen sa li. Akoz larzan kot Botanik ti ganny vole anba son *watch* konman Minis Lanvironnman plis ki R8 milyon. Apre zot ti met dife pou bril bann dokiman Mr Speaker. Tousala in pase. Seselwa mazin byen ler zot tann li koze. Sanmenm sa bann dimoun ki zot anvii met ansarz nou larzan? Seselwa reflexir byen.

E la Mr Speaker, nou Gouvernman in met sepa konbyen milyon, pou refer nou bann lenfrastruktir sportif partou dan Sesel, enkli Praslin ek La Digue. E la Onorab Rocky olye dir mersi. I pa konn dir mersi li Mr Speaker, i zis gele.

“Foutbol pa kapab zwe lo La Digue!”

“Kan pou pare?”

Konmsi Mr Speaker, pandan sa 3 an ki nou’n o pouwar nou ki’n met trou dan laplenn, nou ki’n kas tou keksoz. Kan saler zot Gouvernman ki’n negligiz zot!

E la Mr Speaker, i for onte pou tande, yer swar dan nouvel avek nou lenfrastruktir ki pa an bonn eta, ozordi Sesel pou bezwen al depans larzan, pou nou zwe nou bann *match* aletranze.

E nou pou bezwen pey pou sa tim osi ki pe deplase pou al aletranze. Zot lotel, lasirans tou, akoz nou leta nou bann *changing* room pa annord Mr Speaker. E tousala se bann keksoz ki nou’n erite. Se bann move keksoz ki zot pandan zot ti dan Gouvernman zot pa’n fer pou nou sport kapab devlope.

E ozordi zot menm ki pe vin kriye *sportsmen* pe demann sa, *sportsmen* pa kapab fer isi. Kan zot ki’n negligiz nou bann *sportsmen*. E la zot pe kontinyen fer zot bann politik bonmarse.

E pourtan Mr Speaker, lo La Digue malgre tou sa bann lenfrastruktir pa an bonn eta, tou bann ki ti ganny elekte lo La Digue ti sorti dan Parti US. Personn pa ti enterese fer nanryen. Zot in mazin zis zot lekor. Sa ki’n ganny son morso later malgre in reste tou sa lavi Mahe in gannyen, pou li debut.

E Onorab Rocky Uranie pe fer parey li osi. E dimoun La Digue pe note. La Digue in montre zot akoz *weekend* pase

zot ti bezwen anmenn 2 *Cat Cocos* sorti Mahe 600 dimoun. 2 sorti *Praslin* 300 i fer 900, pou zot kapab ranpli sa pti laplenn. Akoz zot in trouve ki dimoun *La Digue* in war kler!

Sa Bidze Mr Speaker, i telman annan bokou keksoz pozitiv ladan me. Selman *Leader* parti minoriter avek son bann Manm pa war. I vin koz lo laliberte lekspresyon. Mr Speaker, be kote dan sa Bidze ki Minis in koz lo laliberte lekspresyon?

Mr Speaker, be mwan mon'n pas dan sa Bidze mon pa'n war en sou laliberte lekspresyon, ki annan en larzan pou laliberte lekspresyon Mr Speaker. Pourtan sa menm - pourtan dan senkyenm lasanble li Onorab *Leader* Lopoziyon, Onorab Pillay avek en Lasanble antyerman *US*, ti vot kont Lalwa *POA*. Kot apre nou ti bezwen al konteste, al ganny konteste Ankour.

E ozordi li ki pe plennyen selman i ti vot kont. Ki ou kapab konpran avek se zans Mr Speaker? Mr Speaker, si en swadizan, en bann swadizan *leaders* dan sa pei i met portre en dimoun ki'n desede. Apre zot fer politik avek lo *Facebook* savedir zot dan en gro problem, Mr Speaker!

Mazinen ki dimoun mor pa vote. I nepli vote nou'n tire lo lalis voter. Apre Mr Speaker, zot dir nou, nou en Gouvernman kanmaron, kan se zot ki en parti kanmaron. Mon a dir zot akoz. Zot en parti ki ti dan mazoriter. Zot ti en parti mazoriter, ozordi zot en parti minoriter avek en *Leader* Lopoziyon ki zanmen in debout dan okenn eleksyon.

Zot dir nou, nou en parti kanmaron Mr Speaker. Be zot ki'n troun deryer! Be pli gro kanmaron Mr Speaker pa bliye, se Onorab Cosgrow li menm, ki toultan i dir nou kanmaron, in sorti anler in bat ater! I ti pe donn bal dan en gro basen kot Lanvironnman. E la i trouv li byen meg dan en pti basen delo. Labou deryer *Maison du Peuple* dan *United Square*!

(APPLAUSE)

HON NORBERT LOIZEAU

E pa bliye-e pa bliye in pran plas bann lezot Manm, parey Onorab Ernesta, ki ankoler, ki ankoler ozordi apre tou sa travay lo teren ki in fer, li i ganny met deor sa ki pa'n zanmen debout zot, zot anndan pe benefisye avek tou bann ki en Manm i gannyen. Sa i osi enkli larzan palto ki zot gannyen Mr Speaker, me

selman zot pa aste pou zot mete!

Plis ki sa e Mr Speaker, i annan ki bezwen *voice over* bann *advert US*, pou li kapab ganny en pti mwenz, akoz i annan in pran son plas dan Lasanble. De plis Mr Speaker, i annan sa alokasyon ki bann parti politik i gannyen la, ki dan Bidze Mr Speaker.

US pe ganny plis ki R3 milyon. Zot dir dimoun i mizer?

Olye ed sa bann dimoun ki zot dir i mizer, zot pe pey zot lekor bann gro, gro lapey.

Prezidan zot parti li apart son pansyon R50 ekek mil, i pe osi ganny en gro lapey pou anviron plis ki R60 mil. E i dir ki dimoun Seselwa i mizer napa travay, olye anploy sekirite Seselwa, i pe pran larzan i pe pey sekirite etranze pou vey li. Selman i dir Seselwa i mizer Mr Speaker! Be donn en travay sa bann Seselwa ki mizer!

Mr Speaker, sa bann dimoun zot pe zis aranz zot lekor. Akoz dan lepase ler zot ti dan Gouvernman, koumsa ki bann *deal* ti deroule.

Mr Speaker, bokou proze lakaz pou ganny demare lannen prosen dan bann distrik en pe partou. R335.4 milyon in ganny mete dan Bidze pou sa bann proze. Sa i a fer ki bann ki pli

dan bezwen a nobou ganny zot lakaz.

Distrik Bel Air nou pou ganny nou 16 *mid-range condo*, pou bann zenn profesyonnel ki kapab finans zot proze, ki kapab finans zot proze a benefisy. Sa ki enteresan dan mon distrik se bokou dimoun ki ti lo *social housing* in deside pou retir zot non, pou zot *apply* pou *mid-range condo* akoz zot santi zot kapab finans zot proze. E kit lespas pou bann ki pa kapab finans zot proze.

MR DEPUTY SPEAKER

En minit.

HON NORBERT LOIZEAU

E mwan Mr Speaker, mon pou ankouraz zot fer sa. E la avek lagras bondye vi ki Minis pou Later i an negosyasyon avek en fanmir Stevenson Delhomme *Road*, pou fer lesanz en later, kot gran posibilite kot nou kapab ganny ankor 24. E menm plis *mid-range condo* pou nou bann zenn profesyonnel e lezot dimoun ki kapab finans zot proze.

MR DEPUTY SPEAKER

En minit Onorab.

HON NORBERT LOIZEAU

Pou bann ki lo *social housing* zefor pe ganny mete pou vwar

bann later dan distrik bann pti *pocket*, vi ki Bel Air napa ase later, pou nou kapab fer bann ki pli abordab pou nou zabitan.

R10 milyon in ganny mete pou bann semen segonder. Sa mon panse a lafen defen Semen *Curio Road* a ganny elarzi e i a vin pli *safe* pou bann motoris ek pyeton ki servi li. Kot lafanmir Simeon osi i a kapab benefisyavek zot *retaining wall*, ki bokou letan zot a pe espere.

Mon panse ki lannen prosen sa i a ganny finalize. 26 milyon pou bann pti proze distrik pou ki plis pti proze a ganny fer.

Pou bann fanatik *basketball* R1.5 milyon in ganny mete dan Bidze pou refer *flooring Victoria Gymnasium*. A lafen kot zot kapab pratik zot spor dan konfor.

Mr Speaker, lo kote NSC mon pa pou ganny letan dir nanryen lo zot. Me selman NSC nou bezwen get zot en pe pre, lo lafason ki zot pe ganny dirize. Sa nou a fer li dan *Committee Stage*.

Tousala Mr speaker se bann keksoz pozitiv ki annan dan sa Bidze ki'n ganny prezante devan nou par Minis Hassan.

MR DEPUTY SPEAKER

Ou a *wrap up* silvouple. Mersi.

HON NORBERT LOIZEAU

Wi mon pe *wrap up* Mr Speaker. I annan ankor bokou keksoz pozitiv ankor ladan me letan pa permet pou dir tou. Alor ankor enn fwa mon anvi felisit Minis, an terminan. Mon anvi felisit Minis avek son zenn lekip profesyonnel, ki'n travay dir nwit e zour pou prepar Bidze ki tou Seselwa i war li ladan.

An terminan osi, mon anvi dir avek sa pep la deor ki Gouvernman *LDS* pou toultan debout akote zot. E o firamezir ki nou lekonomi i agrandi nou pou kontinyen rod fason pou nou asiste zot.

Nou pou toultan travay dir pou ki nou pei i progresse. Avek larises ki nou pou anmase, nou pou fer sir Seselwa i form par ladan. Nou en Gouvernman ki mazin bouz de lavan. Byento, byennet nou sitwayen i en keksoz ki nou met premye.

Alors mon bann ser ek frer Seselwa pa les *US* vin abet zot. Akoz *United Seychelles* i le sel opsyon pou Sesel retourn an aryer.

Pou konklir, mon anvi remerci Bondye ki'n toultan met en lizye lo nou pei pandan sa moman –

MR DEPUTY SPEAKER

Onorab, fodre ou fini silvouple.
Mersi.

HON NORBERT LOIZEAU

... wi, dernyen sa Mr Speaker. Dan moman difisil ki Sesel ti pe pas ladan. Mon remersi li osi pou ekler nou dan moman kot bann lespri satan ti le vin pran kontrol nou pei e delivre nou.

Mon osi anvi remersi tou Seselwa ki'n mars akote nou dan botan e movetan. Mon fanmir ki'n la akote mwan. Mon DA Christopher, mon *clerk*, bann aktivis, travayer Ladministrasyon Distrik, tou zabitan Bel Air ki'n siport mwan dan sa travay ki mon'n fer. Vi ki lannen pe terminen mon a profite pou swet zot en Zwaye Noel e en bon Lannen 2024. Minis, san okenn regre mon pou vot pou sa Bidze. Mersi.

(APPLAUSE)

MR DEPUTY SPEAKER

Mersi Onorab silvouple. Mersi Onorab. Avan nou kontinyen mon oule fer 3 remark swivan; Nou'n annan 2 entervansyon depi bomaten. E mon pa'n anvi enteronp personn. Solman mon pe dir zot ki yer avan nou ti ale Speaker ti fer en keksoz. I ti demann nou ki pe koze ozordi pou reviz nou bann diskour. Evite servi bann lekspresyon,

ouswa bann mo ki pa langaz parلمانter.

E in leve bomaten. Nou pa devret al dan sa direksyon sa i premye. Reviz nou diskour, get bann lekspresyon, get bann mo.

Dezyenm *time keeping*. Tou dimoun i dwatet ganny 30 minit. Yer mwan ler mon ti koze mon ti met mon *timer* lo mon telefonn. E mon ti koz 28 minit, akoz mon konsyan ki mon pa kapab abiz *the privilege* ler mon annan *mic*.

Trwazyenm pwen se zot vwar mon *Order* i ouver la devan mwan. Mon pe get *Order 59*, akoz *Order 59* i koz lo *content of speech*. E mon bezwen kosyonn bann Manm ki i annan *Order 59(1)* ki dir nou poudir nou bezwen limit nou bann obzervasyon lo size ki devan nou. Setadir nou pe koz lo *Appropriation Bill, 2024*.

E i annan osi *Order 59 (7)(d)* ki dir, "*a member shall not impute improper motives to or make a personal charge against any Member except upon a motion calling into question the conduct of a Member*".

Enterven an ki'n koze avan par egzanp 3 a 4 repriz in dir lekel ki'n vole. Zot. E i montre ledwa lo Lopozisyon. Nou pa kapab fer sa. I pa normal i pa korek e nou merit - akoz zot met Speaker Mancienne ouswa

mwan en dan pozisyon difisil. E si Lopozisyon i fer, i pou osi met nou dan en pozisyon difisil. Ki nou bezwen fer ...

(comments off-mic)

MR DEPUTY SPEAKER

(Silvouple mon pe koze, zot ava ekout mwan, ok?)

Letan - *whilst* ki piblik deor i kapab kontan, ki nou fer sa bann keksoz *we go at each other's throats*, annou mazine konman Manm Lasanble nou annan en responsabilite, pou mentenir *the dignity, the standard* e fason ki piblik i regard nou. Se tou ki mon pe demann zot.

Time keeping, reviz zot bann lekspresyon avek bann mo e apre annou mentenir *standard of the House*, tout an rapelan *Order 59* ki koz lo *content of speech*.

Mon'n donn en direksyon lo la; napa okenn *point of order*, napa okenn *matter of privilege* ki pe al ganny leve. Nou kontinyen avek lot entervenans i Onorab Wallace Cosgrow. Mersi.

HON WALLACE COSGROW

Bonzour Mr Speaker. Bonzour tou Manm piblik ki pe ekoute. Bonzour tou Manm Onorab ki dan sa Lasanble. Mr Speaker,

Onorab ki'n koze avan mwan, parey mon'n toultan dir i koz bokou, me i pa dir gran keksoz.

Me selman mon annan sa pou mwan dir li ozordi. Sa lalis ki in nonmen, mon ti a kontan i azout 2 keksoz lo la. I azout larzan *One-Coin*. Onorab Bernard Georges e i azout larzan Chamery Chetty - Onorab Bernard Georges.

(APPLAUSE)

HON WALLACE COSGROW

Apre Onorab Arissol, i ava kontiny lalis. Mr Speaker, kantite lakizasyon in ganny fer lo mwan ozordi dan sa Lasanble. E mwan mon annan zis en keksoz pou dir. Mwan zanmen mon'n deza touy personn! Dimoun Bel Air i konnen, ki par ou aksyon Onorab Loizeau, en zenn garson ti perdi son lavi.

(APPLAUSE)

MR DEPUTY SPEAKER

Onorab! Onorab! Silvouple...

HON WALLACE COSGROW

Eh be ki arive?

MR DEPUTY SPEAKER

Non, be problemn i se ki... zot kapab... (*gavel sound*) *Order silvouple!* Zis avan Onorab Cosgrow in pran laparol, mon'n koz lo 3 size. Mon'n koz lo trwa size pou nou kapab donn en direktiv. Ler Onorab...

Letan Onorab Loizeau. Letan Onorab Loizeau in koze in dir lekel ki'n vole e in dir zot. Mon'n *still protect the minority* pou dir *let's not continued down this path.*

Onorab ki ou vini ou fer, ou mansyonn non 2 dimoun, me zot pa dan *Standing Orders* zot pa annan drwa lev, lev en *matter of privilege because you have targeted them personally!*

HON WALLACE COSGROW

In target mwan personnelman li. In nonm Onorab Cosgrow, in target mwan personnelman! Be ou ki ti devret aret li.

MR DEPUTY SPEAKER

Get sa, nou'n travay 2 zour. Nou'n travay 2 zour, e lo tou lede kote latab ozordi letan mon get lalis koze, mon konnen akoz mon'n dir sa ki mon'n dir. *Ok?*

Silvouple, silvouple *let's maintain the dignity of the House.* E nou kontiny nou deba nou reste lo size ki devan nou e sa i *Appropriation Bill, 2024.* Onorab Lemiel, mon vwar ou lanmen, me malerezman mon

pa pe pran en *point of order* ou swa *matter of privilege.*

Wi, i annan drwa me selman *issues* mon'n *deal* avek. Onorab Cosgrow silvouple, kontiny ou deba. Mersi.

HON WALLACE COSGROW

Mersi Mr Speaker. Mr Speaker, repons lo ladres Bidze, i enn parmi bann privez ki mon'n ganny akorde koman en Manm Lasanble Nasyonal. I en privez ki mwan koman en Manm, mon pran li serye e avek tou loner, an prenon kont ki legzersis Bidze i enn parmi bann travay Lasanble tre enportan.

Parey tou bann lezot lannen ki mon'n partisip dan sa prose, i mon lentansyon koz lo analis ki mon'n personnelman fer lo konteni Bidze 2024. Mon konnen Mr Speaker ki mon analiz i enn ki fran, e i osi reflekte santiman bokou nou sitwayen an term zot lekspektasyon ki mannyer sa Gouvernman i delivre.

Par kont Mr Speaker, mon bezwen fer resorti o debi ki apre ki mon'n ekout bann diferan larepons pandan sa 2 premye zour sorti lo kote *LDS*, i sagrinan pou antann ki kantite dekonekte zot dekonekte avek larealite ozordi. Ler sekreter Zeneral sa parti Mr Speaker, ou menm Onorab Gervais Henrie i

dir ki napa zanfan ki pe al dorm vant vid.

Mon demann mon lekor, be dan ki Sesel ou a pe viv? Akoz sirman avek mwan. Akoz sirman mwan avek bokou bann paran ki pe ekout, e zot konn zot soufrans.

Larogans pouvwar i fer LDS dekonekte avek sa pep, e perdi direksyon. Zonm dan lopilans i obliy son nesans. Avek sa kalite latitid 2025, zot pou nepli *State House*. Zot pou en parti minoriter dan sa Lasanble.

(APPLAUSE)

HON WALLACE COSGROW

A sa pwen, mon krwar ki i enportan ki nou sitwayen i konpran byen kwa sa en Bidze Nasyonal. E lo ki baz en Bidze i ganny formile dan en fason tre senp. Tro bokou repons ki mon'n tande pandan sa 2 zour, napa naryen pou fer avek Bidze.

Lo en kote, nou annan nou bezwen pei e pep Seselwa. E lo lot kote nou annan nou reveni ki pei i zenere atraver aktivite ekonomik. En parti sa reveni, i ganny kolekte par Gouvernman dan laform taks, prensipalman e osi bann lezot koneksyon enkli bann don.

Minis i dir nou ki prozeksyon reveni pou lannen

2024 i anviron 9.1 bilyon. Me Bidze li menm i en total 10.6 bilyon. Alors i annan en negativ 1.5 bilyon, e sa diferans pou plizoumwenn ganny finanse par bann don prensipalman sorti kot bann pei Arab tou lendikasyon i montre nou.

En Bidze *made in Arabia* Mr Speaker. Mon pa bezwen remind Seselwa ki LDS, SNP ti dir lo finansman sorti kot pei Arab. Ozordi Arab in bon pou nou. Zot en bann bater latet ki ti zis anvi vin o pouvwar. Premye keksoz alor ki nou retire avek sa Bidze, i se ki Gouvernman pe ekspekte depans plis ki i anvizaze anmase atraver taks an 2023.

Dezyenm, i se ki en konponan ase signifikan finansman sa Bidze ki baze lo bann don, ki parey nou'n deza fer resorti e vwar dan prose revi finansyel mwayen term, i pa neserman ganny materyalize pou ki nou realiz bann proze asosye avek Bidze.

Dan sa enn ka spesifik, bokou bann proze ki vize ver devlopman sosyal ek kominoter parey lozman, i depan gran mazorite lo don.

Nou pa war li drol Mr Speaker, ki malgre serten promes dan ladres Bidze, posibilite ki sa bann proze pa materyalize an 2024, i enn ki

reel parey nou'n war dan sa dernyen 3 lannen.

Mon santi ki i enportan o komansman pou etabli sa baz, ki ava zistifye lapros ki mon pou pran tou dilon mon repons lo sa Bidze.

Nou bezwen etabli en keksoz tre enportan ozordi lo diferans dan ideoloji ant nou *United Seychelles* e *LDS*.

Sa diferans i reflekte lo lafason ki zot koze, lafason ki zot fer keksoz e lafason ki zot formil sa Bidze ki devan nou. Nou en parti travayis e progresis, kot lentere zonn ek fanm i gid nou bann Polisi e lafason fer.

Se pou sa rezon ki ozordi nou dir ki an 2025 trezyennm mwan saler pou vin en drwa travayer e non pa en *bonus* parey *LDS* pe transform li. Sesel i en pti pei ki pa kapab soutenir en sistenn liberal kapitalis, kot gro biznes ek profi i form labaz zot prensip e fason fer. Se sa ki *LDS* i reprezante.

Pandan 30 an zot in repete, ki zot en parti liberal me zot in bat latet seselwa ek bann promes ki pa anliny avek zot prensip. Alors pa war li drol ki ozordi ler ou tap laport, zot fer ou troun an ron. Zot pa ti zanmen annan ou lentere a ker.

Ki sityasyon nou pei Sesel ozordi anba Gouvernman *LDS*

apre 3 an o pouvwar e 4 Bidze pli tar. Kou lavi in pet plafon e i ozordi konsern limero 1 tou Seselwa lo Mahe, Praslin ek La Digue. I en konsern ankor pli serye pou lafanmir lo Praslin ek La Digue, kot pou zot i bokou pli difisil pou fer 2 bout zwenn.

Ler nou dir ki lafanmir Seselwa i bezwen ganny soutyen son Gouvernman, *LDS* i dir ki *US* i krwar dan zis donner, donner e donner. Me zot, pep Seselwa in vwar ki zot zis pran, pran, pran plis ankor ziska ler zot pran tou sa ki apel pou zot.

(APPLAUSE)

HON WALLACE COSGROW

Menm si zot ti promet met plis larzan dan pos Seselwa. Ler Prezidan parti *United Seychelles* Dokter Patrick Herminie i donn son komitman pou reetabli lazistis sosyal dan sa pei, atraver bann Polisi progresis, zot dir ki mannyer i pou ganny larzan pou fer sa.

Si *SBC* ti pran son responsabilite e fer reportaz balanse kot i ti detaye byen ki mannyer i pou fer sa, zot ti ava konnen. Ozordi mon envit tou Seselwa, alors pou al get son *speech* lo *TV Laverite*, zot ava konnen.

(APPLAUSE)

HON WALLACE COSGROW

Lazenes Seselwa i reste dan dezespwar pandan ki Minis i ankor pe fer plan lo plan. To mank lanplwa i reste ankor pli o parmi bann zenn. Larealite i se ki dan tou sa swadizan sanzman ek transformasyon, ziska prezan napa nouvo lide, napa nouvo stratezi pou epanouisman nou bann zenn.

Gouvernman Santral i dekonekte avek zenn lo nivo distrik, napa program e napa linisyativ dan sa domenn. *Sport* i an gran mazorite ganny pratike par bann zenn, e en lot sektor ki'n ganny neglize pandan sa 3 an ki Gouvernman LDS pe diriz sa pei. Sa in aparan dan tou performans Zwe de Zil.

Skandal preparasyon Zwe de Zil ek peyman meday, e wi pa bliy larzan *child minding*. Bokou koze, me zero aksyon e *sportsmen* i dekouraze. Pa war li drol si nou kontinyen demann Minis an 2024 pou demisyonnen. Akoz i pa'n nobou anmenn okenn transformasyon, ki in koz labous plen.

Mr Speaker, letan i difisil. Wi, Mr Speaker, letan i byen difisil pou bokou nou sitwayen. Me ozordi bokou i war zot in

ganny abandonnen par en Gouvernman ki ti promet lesyel ek later. Tou le lannen mon fer li mon devwar pou koz lo Bidze sosyal. Akoz mon war tro bokou soufrans dan nou pti pei depi 2020.

Sa lannen 1.3 bilyon in ganny bidzete. Pandan ki Prezidan pe fer letour lemonn 31 fwa dan 31 mwan, Sekreter Zeneral pe dir napa person ki dormi vant vid.

Bann Minis pe *enjoy* tou sa ki pou zot, zot *allowance* palto, ledan, lakaz. I annan manman tou sel ki pe sibir sa lavi dir. Ler zot ganny en kouraz pou al rod en lasistans dan mazorite ka, zot parkour i fini dan fristrasyon ek imilyasyon.

Bomaten menm, mon donn en zabitan Les Mamelles pasaz i ankor pe esper Onorab Georges entervenir pou li kot lazans. Pou 3 an nou'n war environ menm sonm ganny mete sak lannen dan Bidze. Pourtan kantite resipyen *welfare* in desann drastikman lo sistenm.

Home care in sorti ek sa lazans, e laz retreat in mont 65 an. Nou ti ava ekspekte en rediksyon dan sa Bidze. Me nou konnen ki *IMF* in *deal* avek zot. E la *case* in pri zot in kasyet dan sa Bidze pou verse. Mwens ki 1 an edmi avan eleksyon.

Kestyon se, eski sa bann larzan pe vremen ganny donnen avek dimoun ki dan bezwen? Nou vwar ki malere i demann lasistans, son kont, e son fanmir kont son fanmir i ganny fouy lo la. I bezwen esper en leternite, avan ki i ganny en larepons ki souvandfwa i enn ki negativ.

Selman zot, zot pas Lalwa pou retir zot madanm ek zanfan lo sa lalis pou deklar zot larzan e byen. En Lalwa pou malere e en lot pou bann politisyen.

(APPLAUSE)

HON WALLACE COSGROW

En pwa demezir byensir pou zot *one size pa fit all*. Pou sa manman tousel ki travay, me ki son saler pa ase ozordi i en kosmar. Ler zot tap laport zot ganny dir i annan prosedir. En pake prosedir ki lamazorite i fini avek dezapwentman.

Konbyen ki vin plere kot mwan aköz Lazans Proteksyon Sosyal in ferm laport dan zot figir? Malgre promes transformasyon dan domenn lasistans sosyal, bokou nou sitwayen i ankor pe viv dan dezespwar e pe sibir lefe transformasyon logmantasyon kou lavi lo zot tousel.

Bokou i dir ki Gouvernman US pa ti parfe, me

omwen nou ti get dimoun ki dan bezwen.

(APPLAUSE)

HON WALLACE COSGROW

Tou sa bann retar ki i annan dan letan ki pran pou donn larepons en fanmir ki dan bezwen, napa naryen pou fer avek travayer. I annan tou pou fer ek bann prosedir par lao prosedir e plis birokrasi. En Manm lot kote latab ti dir ki sa pa akseptab. E ki pli tar 3 zour en dimoun i devret fini ganny son larepons.

Se egzakteman sa ki nou ti etabli an 2013. Mon konnen Mr Speaker, aköz ti komans ek mwan. Zot pe koz lo la birokrasi. Lo birokrasi zis al laba zot a war birokrasi dan tou son splander.

Seselwa i ankor pe esper sa transformasyon dan sistenm benefis sosyal ki zot ti promet. Zot koz lo Bidze sosyal labous plen, me les mon dir zot lekel ki ti entrodwir en sistenm Sekirite Sosyal konpreansiv Sesel. Se pa lot ki Prezidan France Albert Rene.

(APPLAUSE)

HON WALLACE COSGROW

Wi, Prezidan France Albert Rene Onorab Zialor. Li ki ti

entrodwir sa sistenm ki en bon pe ou, enkli ou ek ou manm fanmir in viv lo la e fer ou vin sa gro zonm for ki ou ete ozordi.

Mon rapel tre byen, ekout mwan byen la. Mon rapel tre byen sa sonm an 2013, 2014 ki sa lazans ti verse avek ou ek ou fanmir tou le mwan. Akoz sa letan mwan ki ti ansarz ASP.

(APPLAUSE)

HON WALLACE COSGROW

Me Mr Speaker, me, sa pou reste pou mon memwar. Akoz mon pa parey ou mwan. Onorab Lemiel in dir engra, mon pa krwar i annan mo pou dekri sa. Pa zis Onorab Zialor Mr Speaker, ou a soke. Onorab Porice, ou rapel konbyen letan ou ti pe ganny benefis dezabilite? Mon a dir ou kan ti ganny koupe, an 2021. Ou ti en Manm Lasanble Nasyonal, e ou ti ankor pe anmas benefis sosyal.

(Interruption)

MR DEPUTY SPEAKER

Onorab! Onorab! Mon, Lopozisyon *you can complain as much as you want*. Ou konnen akoz zot pa zistifye, zot konplent? Akoz avan Onorab ti koze mon'n koz avek Lasanble. Sa ki ou pe fer, sa ki ou pe fer.

(comments and interruptions off-mic)

MR DEPUTY SPEAKER

Non! Non! Non! silvouple, Onorab Pillay! Ou pa pou fer en largiman avek mwan atraver latab *when I have the mic*.

Standing Order i dir ou ler *the Speaker is speaking Members shall be silent*. Now, *charge* ki Onorab Loizeau ti fer, i ti dir *“lekel ki'n vole?”* Zot! Zot *i zeneralize*. And yet *I step in after to protect the minority*.

Now, what you are doing Onorab. *What you are doing is singling out, not one me 2 Manm*. E lala *Order 59 (7)(d) unless you bring a Motion*. Do that Onorab, pa bezwen servi ou *freedom of speech* ki garanti dan sa *Lalwa Immunities and powers*. *This is an abuse of freedom of speech and I have to protect the majority now*. You cannot do this!

Silvouple, mon'n dir zot reviz zot diskour. *You cannot be personnel with someone, please*. Silvouple kontinyen, e mon pou donn ou en pti letan ekstra napa problemm. Mersi.

(Off-Mic)

MR DEPUTY SPEAKER

Non, napa *point of order*. Kontiny ou *speech* Onorab. Ou kapab silvouple kontinyen? Mersi bokou.

HON WALLACE COSGROW

Aprè zot a ganny lodas koz lo labi dan benefis sosyal. Sa program sekirite lasistans sosyal i nou program. E mwan mon fyer pou dir sa *a haute voix*. Progresivman diran bann lannen nou'n aziste, amelyore an mezir ki sosyete i devlope e nou fer fas ek bann nouvo defi.

I en sistenm *cradle to the grave*. Savedir i anmas tou sa ki dan bezwen depi ler zot ne, ziska ler zot kit sa later. Sa sistenm i enn ki sitan bon, e konpreansiv ki sel keksoz ki zot in kapab azoute avek, se en benefis pou bann manman ki donn nesans plis ki en zanfan. Savedir *twins* ou plis.

Kontrer Mr Speaker, koman mon lo sa size. Zot pe zve bliy nou bann dimoun aze, dan Bidze napa naryen pou zot. I fer 4enm Bidze la, sa 10 mil kan zot pou donneren?

Omwen ler Mr Rene ti la, kantmenm en Manm in gognarde. Ler Mr Rene ti la, zot ti ganny en pti mwenzan R50 e la zot ti ava ganny omwen en pti R200, avek LDS naryen.

Servis Piblik Mr Speaker, pandan sa dernyen lannen sa

dernyen 3 an, Gouvernman LDS in pas son letan kasyet son lenkonpetans e linefikasite pou delivre dan servis piblik lo ledobann travayer servis piblik. Zot in ganny akize konmkwa ki zot mal fer zot travay, e zot pe trenn lipye.

Zot pe fer politik eksetera, eksetera. Nou konnen par kont ki vre problem dan servis piblik ozordi, se mank *leadership* anler lo latet. E mank *leadership* lo nivo bann Minis. Zot in konstaman fer netwayaz pou rezon politik dan servis piblik e pous bann travayer ki siport *United Seychelles*.

Promes pou reform servis piblik nou ankor pe espere. I napa naryen signifikan ki ganny fer ziska ler. Se pourtan, se Prezidan li menm ki responsab servis piblik. Olye aranz problem anba son responsabilite i prefer desann *Independence House* pou *allocate* later ek lakaz.

Pandan ki i a pe fer tousala, travayer sekter piblik pe esper sa logmantasyon saler ki ti ganny anonse dan *rally Anse Royale*. Bokou travayer pe esper revizyon ouswa nouvo *scheme of service*, ki swadizan pe ganny travay lo la.

Zot in aboli *long service allowance* ki ti en *incentive* pou

retenir e *incentivize* travayer servis piblik. Pandan ki bann travayer i ankor lo petet, Gouvernman in war li nesese a sa moman pou propoz i diskrit lo size saler politisyen ek bann travayer dan bann lofis Konstitisyonnèl.

In war li nesese pou propoz en gro saler ziska R239 mil pou Prezidan. R166 mil pou Vis-Prezidan e R130 mil pou bann Minis. Apre kasyet anba preteks profesyonnel. Mon annan 3 keksoz pou dir lo la. Limero 1 Mr Speaker.

1. Profesyonnel dan sekter piblik ou'n donn li 10 poursan. Profesyonnel dan *cabinet* ou propoz plis ki 100poursan logmantasyon? Kwa i annan 2 grad profesyonnel? Ouswa ou vreman krwar ki *one size pa fit all*?
2. An 2019, ler ti annan propozisyon logmantasyon saler 5 poursan, zot ti dir ki tou fodre ganny parey, enkli profesyonnel ek Prezidan. R450 pou tou dimoun. Trwazyenm Mr Speaker.
3. Si zot anvi en saler konparab avek sekter prive, ou annan zis pou ou demisyonnen al rod

en louvraz dan sekter prive.

(APPLAUSE)

HON WALLACE COSGROW

4 an pli tar zot mars an aryer parey kanmaron. E ler nou dir, nou dir *one size pa fit all*. Ler nou apel zot Gouvernman Kanmaron, zot le pran lakoler. En servis piblik ki performan, i a labaz pou devlopman e transformasyon ekonomik parske se sa bann lenstitisyon piblik ki fasilitater devlopman dan sekter prive.

Si i annan tro bokou birokrasi i pa kre lanvironnman ideal pou ankouraz devlopman biznes. An 2021, nou ti ganny dir ki sa Gouvernman pe al anbank dan en program transform lekonomi pou Sesel. Fer vin pli rezilyan relasyon ek stok eksteryer.

Sa transformasyon ti pou baze lo devlopman Sekter Nimerik, Lekonomi Ble e Lagrikiltir prensipalman kannel ek lavannir. 3 an pli tar napa sanblans transformasyon. Konfli zero politik dan tou diferan rezyon lemonn i reste en leskiz pou zot move performans.

Antretan *MNA* lo kote latab i kontinyen konplent *ease*

of doing business e linefikasite servis piblik.

Gouvernman pa ankor vin avek zot plan devlopman lendistri kannel ek lavannir. Lekonomi Ble i reste en zafer zis lapes. En zafer zis lapes akoz a mon avi in mal plase anba Minister pou Lapes anvi son natir miltisektoral. Pa soke alors si sa sekter anba Gouvernman pa pe anmenn sa transformasyon ekonomik.

Sekter Nimerik i ankor pe ganny peze par pri *internet* ki ankor tro ser. Antretan biznes adisyonnal pe sibir konsekans move planifikasyon inabilite pou pran bann desizyon. En zour zot entrodwir en Polisi, demen zot sanze. *Levy* lo Letablisman Touristik e lentrodiksyon bann *port fees* i legzanp tipik.

Sekter prive i sa sekter kot i annan mazorite travayer Seselwa. Ozordi Biro Statistik i dir nou ziska Zen 2023, i annan 35 mil ouswa 65 poursan lafors travayer dan sa sekter. Lapey mwayenn i R13 ,873, an konparezon avek R19, 356 dan sekter gouvrenmantal.

Nou a rapel tou dimoun ki ler nou koz logmantasyon 10 poursan saler ki ti ganny donnen par Gouvernman, nou pe koz lo R10,557 travayer sekter piblik. Travayer Sekter

prive in ganny kit deryer net. E la mon pe mazin nou bann frer ek ser lo Praslin ek La Digue kot mazorite lanplwa i dan sekter prive.

Sa senp analiz i fer nou konpran akoz lavi i dir lo zil. In ler pou nou redwir sa inegalite ki annan ant lapey dan sa 2 sekter. In plis ki ler pou anmenn bann Polisi pou fer monte lapey travayer sekter prive. Mon konnen Minis pou repet ankor sa ki i ti dir dernyen fwa ki li i fer Bidze Gouvernman.

Me mon a *remind* li ki se atraver bann Polisi Bidze ki i kapab anmenn bann mekaniz pou soulaz sekter prive, pou zot *afford* en logmantasyon dan lapey zot travayer olye anmenn rediksyon dan *excise tax* lo *twin cab*. Ler in set bann kondisyon Minister Lanplwa i ava swiv avek bann Polisi pou ogmant saler minimonm.

An 2020 *COVID* ti souliny lenportans sekirite alimanter e nesesit lenvestisman dan Sekter Agrikol, pou nou pti pei ki izole avek bann gran prodikter manze dan lemonn. Me malerezman malgre sa i paret ki Gouvernman pa'n aprann okenn leson. Sekter Agrikol i reste enn ki mank resours lenvestisman, e mank stratezi pou fer fas avek bann

defi ki sa sekter lokalman i kontinyelman fer fas avek.

Lankadremman legal pou sekiriz later lagrikiltir, pa ankor materyalize. E prosedir pou alokasyon later pa pe ganny respekite. Later pe ganny partaze avek dalon, e fermye pe pey pri egzorbitan pou aste legren, langre, pestisid ek bann lezot materyo nesese pou prodiksyon agrikol. I tro ser pou sirtou bann pti fermye fer prodiksyon agrikol.

A lafen dizour, se konsonmater pep seselwa ki soufer. Dan plas fasilite prodiksyon entansiv atraver bann teknik modern, Gouvernman i met plis baryer pou fermye. Zis pou montre nou bann fermye ki mannyer zot pa serye, zot met zis R3 milyon pou *loan* pou devlopman lagrikiltir *high-tech*.

Sa i preski pa ase pou fer 6 *shed houses*. Non, be zot serye avek lagrikiltir? Ozordi pou lev en *shed house* en fermye i bezwen fer en plan arsitek anvoy kot Lotorite Plan pou laprouvasyon, sansan i pa pou kapab akse *loan* pou met en tel fasilite lo son laferm. Pourtan sa i en senp striktir ki fer swa ek dibwa, ouswa feray.

Dan Sekter Elevaz Zannimo sityasyon i bokou grav, avek desizyon

Gouvernman pou rantre dan biznes lavant manze zannimo e retir sibvansyon ki ti annan oparavan. Kou looperasyon bann fermye ki prodwir zannimo pou lavyann in ogmant konsiderableman.

Sa i annan en lefe negativ lo *cashflow* sa bann fermye. Deza i annan ki pe pans redwir lo kapasite prodiksyon, pou zot kapab reaziste zot biznes, fas a desizyon pou retir sibvansyon.

Tou sa se bann mannev byen kalkile pou fer faver dalon e fer plis profi lo ledon Seselwa. Anba sa sistenm liberal, kapitalis napa plas pou pti fermye.

Mark mon parol, pa pou lontan bokou fermye pou bezwen abandonn zot laferm. En sekter Mr Speaker, ki ganny parmi pli gro kopo Bidze tou le lannen se Sekter Lasante. Par kont servis ozordi i enn ki plis ki annan plis de satisfaksyon parmi nou popilasyon. Nou annan nou en kantite Seselwa kalifye e devoue pe travay dan servis lasante.

E bokou zot i de satisfes avek lafason ki servis lasante pe ganny zere. Bidze ki'n ganny prezante i enn ki tre signifikan anviron 1.4 bilyon. Malgre tou sa kantite konplent lo nivo servis, Minis pa'n anons okenn nouvo Polisi pou asir pep

Seselwa ki zot pe fer sanzman pou amelyor sa servis.

Servis Lasante i nesesit bann reform mazer, pou adres bann defayans mankman latizann esansyel, mankman spesyalis e letan ou vwar e ganny tretman spesyalize i en gro konsern. Problenm lanbilans, problenm dan kondisyon travay serten kategori *staff*. E la nou tande i annan 3 *schemes of service* pou bann *general cadre* pou 2024, malgre ki Minis i dir nou zot pe travay lo bann *scheme* pou travayer lasante.

Minis i met blanm *scheme* lo *PSB*, kan zot konn tre byen ki lasante ti ganny *full delegation* pou travay lo zot bann *scheme* zot menm. Ozordi dan lopital nou annan en problenm tapi, ou kapab krwar zot pe koz lo gro lopital, selman nou napa tapi pou kouver nou fanmir?

Tousala Mr Speaker, ozordi i fer ki i annan en de satisfaksyon mazer lo lafason ki manner servis lasante pe ganny zere.

Zis yer menm nou'n aprann lanmor en madanm Praslin pou bann rezon tre sagrinan. Pa lafot ni ners ni dokter, me en mankman dan lefikasite lozistik ki i pa'n ariv Mahe pou tretman spesyalize. Se pourtan Mr Speaker nou

annan nou en gro lopital *state of the art* La Digue.

Mon demann mon lekor, kan zot pou realize ki se pa gro *building* ki Seselwa pe rode. Me en servis lasante ki zwenn lekspektasyon nou popilasyon, ki nou fanmir pa mor dan sirkonstans ki i kapab ganny sove. E ki nou pep pa kri ayoyo i fermal, parey Onorab Naidu ti kriye dan *casualty*.

(APPLAUSE)

HON WALLACE COSGROW

Ledikasyon Mr Speaker, i en konponan osi signifikan dan Bidze 2024. Ou konnen Mr Speaker, an 2020 e an 2021 ler nou ti pe debat lo Bidze Minis Ledikasyon ti vin devan nou, i ti promet pep Seselwa tou sort kalite reform pou fer sa sekter pli performan. E amelyor lakantite kalite ledikasyon pou zanfan Seselwa.

Malerezman Mr Speaker, apre 4 Bidze ou a krwar Minis i ankor pri dan resitasyon zistwar e la poezi. I pe zis tir la met la. Tou sa bann laliny dan Bidze, se bann laliny ki deza la. Ankor enn fwa napa nouvo, napa naryen nouvo. Reform dan ledikasyon i reste zis dan limazinasyon Minis e ganny difikilte met li an aplikasyon.

Petet en zour nou a tann son plan, dan en poem.

Mr Speaker, lozman pou pep Seselwa i devret reste en priyorite. Me pou 3 an sel proze ki'n ganny akonplir an gran mazorite se bann proze planifye anba 24-24-24 par Gouvernman *United Seychelles*. E kot zis zot in vin koup riban. Larestan promes i reste lo *computer* Minis koman bann plan.

Antretan Seselwa i kontinyen espere, e zot ava rapel ki sa Gouvernman ti koup sa *Scheme Part Rental* pou bann fanmir ki lo lalis pe esper lakaz. Apre ki nou ti kontinyelman met presyon pou retourn sa *scheme*, zot ti bezwen reentrodwir sa *scheme* ki ti pe soulaz bokou fanmir ki ti pe lwe lakaz dan sekter prive.

Par kont konplent ki annan ozordi se ki lakantite letan ki pran pou aprouve e en fanmir i benefisyé. Mr Speaker, si nou anvi agrandi stok lakaz dan pei, nou bezwen eksplor lezot posibilite finansman atraver sekter prive lokal.

Devlopman lakominote Mr Speaker, i kler pou nou sitwayen viv dan lord ek lape avek konfor.

Meeting dan 26 distrik in ganny fer e parey nou'n temwanny-en travay ti la.

Problenm dan kominote i bokou. Bokou dimoun i dezapwente avek sanzman, akoz bokou promes ti ganny fer ler zot ti pe fer konpany. Ler sitwayen i koze, e parol i so, zot sot anler e ankoler. Zot rapel sa fame kontazyon Roche Caiman. Mon konnen ou dan... annefe sa i dekri Ladministrasyon *LDS* ozordi e sa Bidze ki devan nou.

Lord ek lape i reste en gro konsern pou nou sitwayen e nou pei. Lakantite fwa ki Minis i vin dan nou Lasanble sa lannen, pou reponn e eksplik Lepep lo sityasyon krim dan nou pei i dir pou li menm. Gaspiyaz resours Leta dan bann lenvestigasyon inital zis pou fer malis zot bann oponan politik.

Akoz zot konnen ki si zot zwe prop, zot pe al anmas en *shower* 2025.

(APPLAUSE)

HON WALLACE COSGROW

Lapolis ki son gran mazorite i travay dir pou asir sa lord ek lape in fatigue avek lenterferans direk politisyen sorti *State House*. Bokou zot i travay avek lafreyer pou zot bouse manze.

Travay lapolis i ganny ranplase par en pti group enkoni dan mask sanksyonnen par *State House* ki pe senm

laterer lo semen. Bat dimoun, pran zot telefonn ek nenport ki pti kantite larzan ki lo zot.

Lafors Lapolis napa en sou kontrol lo la. Servis Prizon i enn ki pa dan en bon leta. Ozordi problem dan prizon i serye.

Kondannen zot drwa imen pa pe ganny respekte. Maladi i propaze, e ler zot malad i annan ki ganny letan mor dan prizon. Konmsi problem pa ase, la sa Gouvernman i al siny lagreman ek Linyon Eropeen pou konstri prizon pou bann kriminel etranze tre danzere Marie-Louise.

Moris ek La Reunion dapre konpran in refize, nou selman nou, nou pran. Selman en lepok LDS ti dir Marie-Louise fodre fermen. Sa i en desizyon tre danzere pou nou pti pei. Dan sa lagreman ou pa ni konnen si nou bann *taxpayers* ki pou peye. Mon kosyonn Gouvernman pou rekonsider sa silvouple.

Mr Speaker, 2024. Mr Speaker Bidze 2024 i enn ki pe propoz en depans signifikan par Gouvernman. Me keston ki bokou pe demande, se eski nou annan par ladan?

Fodre pa bliye ki menm si sa i en Bidze Gouvernman, Gouvernman i depans an gran mazorite sa Bidze avek Sekter

Prive prensipalman pou aste bann byen avek servis, enkli proze kapital ki an 2024 prozeksyon pou depanse i 1.4 bilyon.

Prezan eski sa groser Bidze pou ganny partaze ekitableman? Dan bokou ka dan bann Minister, regilasyon *procurement* pa pe ganny respekte. E bokou kontra pe ganny donner avek dalon. Annou pa bliye ki Lalwa *Procurement* ti ganny revize pou ogmant *threshold* monneter pou *procure* byen ek servis. Ki fer ki bokou pa pe pas atraver *Tender Board*.

Lo sa zafer *tax holiday* pou bann biznes emerzan, par egzanp Lekonomi Ble avek Lekonomi Limerik, mon demann Gouvernman pou fer byen atansyon, akoz sa i tre danzere. Ler nou pe donn 50 *tax holiday*, posibilite Mr Speaker ki lakonpanyen apre 5 an i vann lakonpanyen avek en *sister company* ouswa i kre en lot lakonpanyen e sa *tax holiday* i marse *forever* e nou pa zanmen anmas okenn taks avek sa Polisi.

E la mon pe osi mazin Mr Speaker, fame proze *West Coast Development Project* kot bann *tenders* pa'n zanmen ariv *Tender Board*, menm si sa bann kontra i bann gro sonm larzan.

Bann kontra re sirfas semen. Laba Minis tou dimoun pe dir ki i annan loder koripsyon.

Bann kontra netwayaz semen, *minor works* dan bann Minister sirtou kot devlopman kominoter. E si Gouvernman i annan kapasite pou delivre lo sa bann proze kapital. Ouswa kan i ariv *Mid-term Review*, nou pou war ankor lalis *budget cut* kot zot koup larzan ki ti deza napa.

Tousala i bann kestyon ki bezwen ganny demande. E an terminan, i mon lopinyon ki sa Bidze pa pe a porsyon resours ki vreman neser. E mon pe demann zot pou silvouple get sa pep, soulaz malere. Mon krwar i osi mank plis linisyativ an term Polisi pou kal sa ki pli vilnerab.

Plis ti kapab ganny fer pou soulaz *the working family*, ki pe fer fas avek bokou difikilte an 2023. I annan bann sonm signifikan ki pe al pou en pti group milyonner, se sa rezilta en sistenm liberal kapitalis. Mr Speaker, nou dan *United Seychelles* nou pou kontinyen lager pou mazorite ki pe ganny bliye par sa Gouvernman.

Nou pou kontinyen ekspoz zot bann simagri. E ler tou in fini, nou pa pou repoze akoz se la kot travay pou komanse pou re batir nou Sesel avek *United*

Seychelles. Mon demann tou Seselwa pou kit lespwar vivan. An 2025, nou pou tir zot! E mon demann tou Seselwa pou kriye ansanm avek mwan, *US Sesel!* Mersi.

(APPLAUSE)

MR DEPUTY SPEAKER

Mersi Onorab. Malgre bann enteripsyon ki'n arive dan Lasanble depi bomaten, i mon lentansyon pou nou reste *on schedule of* travay ozordi. Akoz mon pa anvi sot midi edmi pou nou pa rann lantern *SBC on time*. So, nou pe *break* la, e nou pe rebran travay 11er bomaten. Mersi.

(BREAK)

MR DEPUTY SPEAKER

Welcome back tou dimoun pour kontinyasyon deba lo *Appropriation Bill, 2024*. Prosen enterven an i Onorab Flory Larue.

HON FLORY LARUE

Bonzour Mr Speaker, tou Manm e tou dimoun a lekout. En Bidze i en dokiman finansyel ki donn gidans lo fason zer en serten kantite larzan, par aporsyon en sonm total avek en bi spesifik.

Dan nou ka se en sonm ki nou Gouvernman in planifye pour nou pei fonksyonnen an 2024. Ladan nou met bann aspirasyon pep Seselwa. Nou met plan nou ladministrasyon. Savedir keksoz ki nou anvi vwar ki nou pei i akonplir.

Me non pa pe enplimant stratezi *US* parey Onorab Gabriel ti dir yer. I en dokiman kontinyel pou akonplir nou bann plan e pou fer li dan fason pli meyer posibil pou deservi pep Seselwa, avek alokasyon finansyel pour ledikasyon nou zanfan; pou sonny bann ki malad atraver Servis Lasante. E siport bann diferan sekter atraver zot Minister e lazans respektif.

Minis Hassan, in pas 2erdtan dan nou Lasanble Vandredi pase pou prezant nou pep avek sa Bidze. In fer li atraver bann sif. Me sirtou in donn son bann lesplikasyon an Kreol.

La nou dan staz merit sa Bidze ki pou ganny swiv semenn prosenn ziska Desanm dan Staz Komite, kot nou pou depouy sa Bidze dan plis detay anba bann seksyon spesifik.

Sa bann alokasyon i pour bann servis ki Gouvernman i promet pou delivre pour pep Seselwa. Minis Hassan in ankor fer nou mazine dan son

prezantasyon ki zis 3 an pase, pei ti dan en sityasyon finansyel ki zanmen in deza vwar li ladan. I ti'n *freeze*.

Nou ti apel li *shutdown* kot ti napa okenn tranzaksyon avek lemonn eksteryer. Pilye nou lekonomi tourizm pa ti pe fonksyonnen. E nou pa ti pe ganny okenn reveni atraver sa sekter e preski tou lezot sekter.

Nou Gouvernman ti vin o pouvwar le 24 Oktob 2020, e sa ti en benediksyon pour pep Seselwa. Akoz parey mon ti dir lannen pase, si Gouvernman *US* ki ti o pouvwar, nou sityasyon ekonomik pa ti pou ditou parey sa ki i ete ozordi. Al gete nou pei ti pou'n fini faid.

Ler nou ti vin o pouvwar e sa zenn Minis ki la devan nou, ti vwar li pe zer larzan nou pei, Prezidan Ramkalawan ti konpar nou pei avek en kales kase. E ki kof ti vid.

Par kont atraver ou Mr Speaker, nou tann Onorab Vidot vin dir nou ki kof pa ti vid. I dir ki dan kof ti annan 500 milyon ki ti'n ganny pran koman en *loan* avek *Central Bank*.

Be ler nou pran en *loan*, sa larzan pa pour nou? Se Labank Santral ki'n pret nou e pei i bezwen re peye. E mon konfirmen ki 3 an apre, sa *loan* in fini ganny peye. Mersi Minis.

Labank Santral se banker Gouvernman. Parey ler *ABSA*, *MCB* ouswa *Nouvobanq* i donn ou en *loan* akoz ou saler i antre kot li. I vedir ki ou, ou ti napa sa kantite larzan pour ou depanse. Pa ou larzan sa. E an Zanvye 2021, Minis in fer nou konnen ki ti reste zis 14 milyon dan sa kof. E i pa ti arive Avril 2021 parey Onorab Vidot ti'n dir.

Alor kof ti vid. Vir li mannyer ou le. I pa en mansonz. I vre ki kof ti vid e kales ti'n kase. Sa i kontinyen vin en deba avek lot kote latab. Nou, nou dir pei ti parey en kales kase. Kof ti'n konpletman vid.

E atraver ou Mr Speaker, Onorab Vidot i vin dir nou ki nou koz mansonz. E nou'n vol konfyans pep Seselwa. Zis lakizasyon parti lakizasyon, pou fer zot pti group siporter kontan. Apard mansonz, ki zot – zot annan kalifikasyon spesyal ladan, zot vin koz lo vyol konfyans pep Seselwa.

Mr Speaker, ou'n dir nou pa vin akiz Manm ki la. Mr Speaker, nou'n ganny dir pa vin akiz zot personnelman. Pa sa mon lentansyon. Me par kont mon ankor konfize lo ki zot reprezante.

Yer ler mon'n ekout zot koze, zot savedir bann Manm ki

la anndan ki reprezant *A New United Seychelles*, ki en zour ti *United Seychelles*. En zour ti Parti Lepep. Avan ti *SPPF*. E avan sa *SPUP*, mon bezwen konklir ki zot ki la, se zot menm sa lalis ki mon'n mansyonnen.

Alor ler spesifikman, Onorab Herminie atraver ou Mr Speaker i vin dir; nou ki'n fer sa. Nou ki'n fer lot. Nou ki fer tou kalite dan sa 43 an, in donn nou en lalis kwa ki zot, zot in fer. Dan konbyen tan? Dan 43 an. Savedir i pe dir ki bann ki la dan sa Lasanble, zot osi form par sa tim 43 an.

Ler Onorab Vidot atraver ou Mr Speaker, i vin koz lo mansonz ek vol konfyans sa pep. I pa pou ofanse si mon dir ki “zot” ki'n vol konfyans pep Seselwa pour 43 an. Zot ki'n anmenn vyolans ek fizi Sesel atraver Koudeta an 78.

Zot ki'n pran en ta pti, pti bout later grander laplenn football e donn bann dalon pros, bann sef parti. Zot ki'n vol 50 milyon Dolar ki sipoze al dan kof *SMB* pou nouri pep Seselwa. Zot ki'n lwe later avek *STC* pour R850 mil par mwan, ki ti fer en total plis ki 10 milyon par an. Apre ler nou dekouver, zot vann avek *STC* pour R18 milyon anba, anba.

Zot ki'n pran batiman Maison du Peuple kot plis ki R7

milyon ti ganny donnen par Gouvernman *Algériens* pour pep Seselwa batir sa batiman. E pas lo zot lekor pour zis R900 mil. Zot ki'n vol plis ki 40 bout later pour zot parti politik.

Kot in ale tousala? Pa dan kof Parti *A.N.U.S?* Zot kof an tou leka pa ti vid ler Seselwa ti tir zot o pouvwar an Oktob 2020. Kekfwa se ek sa kof ki Onorab lot kote ti pe koz lo la ler i ti dir kof pa ti vid. Zot kof pour zot ki pa ti vid.

E la, sa bann later zot pe vann enn par enn pour milyon. La mon tande ki zot pe vann sa later kot Flanbwayan ti ete pour plis ki R100 milyon. Kof personnel lekel ki plen? Konbyen milyon ki mont *Abu Dhabi* ek lezot landrwa par Langleter pou antre dan kont? Nou a esper zot dir nou.

Mon osi konpran ki tou bann *MNA* parti minoriter pe ganny bann gro bonous dan sa bann larzan later. En bann pe ganny plis ki 250 mil pou kontinyen siport parti. Sa zot partaz antre zot, akoz zot pa partaz ek bann dimoun mwen fortinen. Zot ki kof pe pet an fler.

Sa i plis ki sa ki zot pe dir Prezidan i sipoze gannyen. Sa osi zis en mansonz akoz sa pa aparet okenn par dan sa Bidze. Me par kont tou saler bann ki

travay dan Gouvernman i garanti dan sa Bidze pour 2024. Sa i enkli saler tou *MNA*. Enkli *MNA* parti minoriter.

Atraver ou Mr Speaker, Onorab Vidot, i demande; kwa ki sipoze donn li konfyans ki nou, nou pe koz laverite dan sa Bidze? Mon krwar lefe ek son saler e saler *Leader* parti minoriter dan Lasanble, ki plis ki 55 mil par mwan, e pansyon sa enn *Maison du Peuple* i garanti tou le mwan, i ase pou donn li konfyans dan sa Bidze.

Tou sa bann sonm ki mon pe mansyonnen Mr Speaker, i dan *Budget Book*. Lefe ki son *per diem* i ganny peye ler i vwayaze osi, i devret donn li konfyans pou osi vwayaze dan son kapasite ofisyel. Zis parey Prezidan koman Sefdeta i osi vwayaze pou deservi son lofis e fer monte nou paviyon otour lemonn.

Zot *self-dominated* ek *self-elected* kandida prezidansyel parti minoriter, i enn bann ki pe benefisyé avek en pansyon, avan ki i ganny 65 an sorti dan sa Bidze, ki pa donn Onorab Vidot konfyans. I ganny son gro pansyon, i ganny son saler *Leader* parti minoriter e i ganny son larzan pou travay avek *Leader* Lopozisyon minoriter. E i ganny *allowance* pour son *bodyguard* etranze.

Mon napa en *calculator* avek mwan. Alor mon krwar ki i fer en total pre kekfwa 300 mil ouswa menm €25 milyon. Selman mon pa byen konn konte. Alor mon pa konnen konbyen i tonbe.

Aprè sa kalite listwar ki zot in annan, e pep Seselwa in tann tou zot krim e atosite dan bann Sesyon *TRNUC*, eski pep Seselwa i kapab annan okenn konfyans ki sa ki zot, zot pe dir i laverite, e *rien* ki laverite?

Kestyon ki piblik pe demande; la ki zot en minorite zot in vin lir en lalis promes ki zot dir zot pou anmennen zour zot gannyen, me ki pa pou an 2025. Me dan lannen 2000 'zanmen'. Ki zot pa'n kapab fer vin en realite aprè sa 43 an o pouvwar san problem ekonomik atraver *shutdown*; san lager *Ukraine*. San lager *Izrael*. Ki mannyer zot pou fer sa arive?

Zot le piblik remet zot aprè les zot travay. Be zot kontan zis pran, pran, pran, e pran menm. Proverb i dir; en fwa en voler, touzour en voler. Mon poz sa la.

Oli zot plan pour sa bann gran promes ek labwet pouri? Mon krwar mon konnen kote plan i ete. I enkli rekritman en dimoun avek en kalifikasyon spesyal. En tiket avyon sorti aletranze pou vin Sesel. En pti

interview Maison du Peuple pe donn li en pti 4 mil Dolar.

Me selman, propozisyon li in pri par la lo rimann. Sanmenm nou pa kapab ganny donner bann plan konkret lo ki mannyer sa *wish list* ki nou'n tande pou vin en realite.

Dan sa Bidze 2024, nou kontinyen vwar lanfaz lo lenfrastruktir. Bann lenfrastruktir ki Seselwa i kontan e i anvi servi. Me anba ansyen administrasyon, en fwa zot ti'n fini konstrir zot ti bliye ki zot bezwen kontinyen gard li lo en standar akseptab.

Olye bann *MNA* parti minoriter apresye sa bann travay, nou tann kritik. Enn ki fer mon larm koule i ler Onorab Herminie atraver ou Mr Speaker, i dir ki nou'n fer renovasyon lo Libreri Nasyonal me nou napa liv pou met ladan.

Ki i pe sey dir nou? Nou ti devret les sa batiman pouri dan sant lavil? Me non. Nou'n fer renovasyon. Nou'n re donn nou pei en libreri. E prezan menm si nou a ouver par faz, nou pou fer li. Nou zenn i aprezan annan li en landrwa pour zot kapab vin *study* si dan lakour zot napa sa landrwa apropiye. Ziska *library* ek liv zot vin tir lakoler lo la Mr Speaker.

Zot vwar ki en Manm ki'n ganny elekte i ayoyo fermal. Me

li sa enn ki'n dir sa, i ti ganny met ater La Rivière Anglaise dan menm eleksyon. Mon krwar ki li ki ayoyo fermal.

I vin demann en lalis kestyon lo keksoz ki pa'n ganny fer. Me ler i ti *MNA* Elekte, i ti al fer promes pou al tir en ros kot en madanm aze, me i pa ti kapab. Se Mr Benoiton ki'n vin rann sa servis dan distrik. Ar wi zot, lekel ki ayoyo fermal?

(laughter)

HON FLORY LARUE

Sel keksoz ki vin demande se fer desann tiket bis. Me en tiket bis in ariv R10 avek sa sistenm *cashless*. Ki pri ankor i le nou vann pri en tiket bis? Taler enn laba pou vin dir nou ki sa ti zot nide. Be in reste zis en nide. Se ladministrasyon *LDS* ki'n delivre lo la.

Sa lalis lenvestisman dan lenfrastruktir, i partou dan tou kwen nou pei. Bokou Manm in profite pou dir zot zabitan bann devlopman ki pe ganny anvizaze dan zot distrik respektif.

Serten distrik in ganny plis proze ki lezot dapre zot bezwen. Enn sa bann distrik i distrik Anse Royale. En distrik ki ti ganny demarke anba ladministrasyon *US* koman nou prosen lavil. I ti premye distrik

kot son *land use plan* ti ganny met devan son zabitan dan en *meeting piblik* an Out 2005. E son *MNA* sa letan ti Mr Barry Faure.

Prozeksyon ti pou investir dan lenfrastruktir, pou a lafen donn bann servis e bann fasilite ki pou permet Anse Royale vin dezyenm lavil, avek bon planifikasyon. Bann peser ti menm ganny promet en fasilite *jetty* avek akse pour en bazar pli pre ek lanmer. Bazar ti ganny konstrir finalman avek larzan Linyon Eropeen lo later Parti *US*, ki ti menm tro pti ler i ti ganny konstrir.

Plis enteraksyon avek zabitan ti ganny fer an Zilyet 2010, pou sansibiliz zabitan lo lenpak lagrandisman popilasyon dan Anse Royale, ler plis devlopman i vini. An 2011 zot ti vwar louvertir *multipurpose gym* avek sipor sorti kot *Olympafrica Foundation*.

Minis pour *Sport* Mr Meriton e Onorab Lemiel koman *DA* sa letan ti partisip dan louvertir. Dan sa seremoni, Minis Meriton ti fer en demann ek sa Fondasyon pou konsider finansman pou konstrir en pli gran *complex* sportif. Kote? Perseverans. E non pa plis pou agrandi sa enn Anse Royale menm.

An 2014 Mr Choppy koman *PS* kot Minister Later, ti fer en deklarasyon lansman *tender* pour en *commercial complex* lo sa later kot Stasyon Lapolis i ete Anse Royale. I ti servi sa menm lokazyon pou dir ki i annan en mank fasilite twalet piblik ki fodre ganny mete pou deservi sirtou sa popilasyon touris ki ti pe agrandi dan sa rezyon. Me sa pa'n zanmen materyalize.

Ozordi Gouvernman i re pran en batiman. Me parey Onorab in dir, menm si sa bann lokater in pey plis ki 25 an *rent* dan sa landrwa, zot pa'n zanmen fer renovasyon lo sa batiman. Enn zot bann gran febles ki li menm i rekonnet. Sa batiman ti osi annan Biro Brans Parti *US* ladan en letan. Alor pa tou fasilite ki ti disponib pour ou pti biznes devlope.

Si ti'n annan plis zefor pou etabli bann lenfrastruktir dan distrik Anse Royale, ozordi Gouvernman ti a dan en pozisyon pou ofer sa biznes boulanzri en landrwa pou re etabli li. Me distribisyon sa bann later ki disponib pour devlopman dan distrik, i reste en konfizyon total.

Sa *beach park* i reste en lot devlopman ki pa'n zanmen materyalize. Ti annan en pli gran lespas ki ti'n ganny dedye

pour sa. Me *PUC* e *SFRSA* in sakenn ganny en bout ladan, akoz ti napa lezot later ki ti'n ganny demarke pour zot. Menm apre sa ta *meeting* planifikasyon ki zot pe fer depi 2005 dan Anse Royale.

Ti annan en servis fasilite twalet piblik ki ti en donasyon. Me sa fasilite pa'n ganny antretenir. E ozordi sa menm fasilite in ganny konverti an en *bar* prive.

I annan en donasyon ki ti ganny fer par Lanbasad Lasin an 2020 avek *ESA* pour 203 mil 524 Dolar Ameriken pou fer bann fasilite *kiosk*, *beach park* Anse Royale, e Cote D'or Praslin ki ti pou osi annan fasilite twalet piblik ladan, ki pa'n zanmen materyalize.

Sa lalis ki mon'n donner, i bann promes ki pa'n zanmen vin en realite pour zabitan Anse Royale e sid Mahe.

Dan sa Bidze pour 2024, nou vwar ki Anse Royale ki'n ganny inyore o paravan, i pe ganny en lalis fasilite. 4.5 milyon pou kontinyasyon konstruksyon Lakres Anse Royale. 15 milyon lakaz *ex Deltel*, Dan Banbou, Anse Royale.

En sonm 15 milyon dan Bidze pe ganny prozekte pou konplet bann lenfrastruktir de baz pou fasilite konstruksyon

128 *unit mid-range condo*. *Mid-range condo* pe target bann profesyonnel ki pran zot prop *loan* avek Labank Komersyal. E later in ganny demarke kot *ex SACOS* pour serten sa bann *condo*.

En sit Mont Plezir, Anse Royale in ganny idantifye pou konstrir en parti sa 172 *unit* Proze Lakaz ansanm avek 7 lezot distrik. Sa pe ganny finanse anba Fon Saoudyen ki en provizyon R84.5 milyon. Bann fasilite sportif pou ganny en gran alokasyon bidzeter pou ki nou bann *sportsman* dan Anse Royale e sid Mahe i kapab fer zot *training* dan zot rezyon.

Zabitan Grand Rivière ki annan plis ki 30 an pe esper zot semen pou vwar en alokasyon 4 milyon pour dezyenm faz. Se pa en *MNA* ki pe travay ki pe fer sa arive. Se en Prezidan antet son *Cabinet* ki konnen ki pe pase dan son pei. Ki vwar ki keksoz pa'n ganny fer dan en fason zis pour sa zoli distrik. E i konekte avek distrik Anse Royale. E li ki pe pran sa laliny.

Sa Gouvernman pa gete si sa *MNA* i *US* ouswa si i *LDS* letan i sorti dan en distrik. Ouswa i pou donn en distrik en fasilite. I donn kot i merite. Me pour enn ki dir rezon ki tou sa alokasyon in ganny donner, se akoz i pe travay.

Mon dir zabitan Anse Royale, pa bliye ki in *MNA US* pour 4 an anba en Gouvernman *US*. E 8 an anba en Gouvernman *US* koman en *DA* dan sa menm distrik. I pa ti pe travay anba son ladministrasyon sa bann letan? Alor zot pa'n fer en alokasyon dan Bidze pou donn li...?

(APPLAUSE)

HON FLORY LARUE

Se pour sa ki bann proze pa'n ganny akonplir? Mr Barry Faure in deza *MNA* Anse Royal e ansyen Prezidan Faure ti osi sorti dan sa distrik. Ozordi se Prezidan Ramkalawan ek son Minis Finans ki pe met lanfaz lo sa bann lenfrastruktir dan sa distrik.

Aprè nou kanpanny dan distrik Anse Royale, kot Prezidan ti osi lo teren, in vwar pour li menm ki mannyer sa distrik in ganny negligè. Mon dir mersi Prezidan Ramkalawan e mersi Minis Hassan, pou siport finansman tou sa bann proze dan sa zoli distrik. Konmsi Angle; *the only way is up for Anse Royale!*

Mr Speaker, ler ou ganny en keksoz me ou pa dir mersi, se sa en dimoun ki engra. Ler ou ganny donner en keksoz san fer okenn zefor, e ou pa donn sa

enn ki merite son merit. E ou pran tou rekonpans pour ou lekor, sa i apel engra.

Aprè Onorab Vidot atraver ou Mr Speaker, i vin dir ki sa 3 an ki'n swiv sa 43 an, naryen pa'n ganny fer. Selman son *Chief Whip* pe rod rekonpans tou sa bann proze ki zot in kale lo la, e pa'n zanmen akonplir dan 43 an. Be ou pa war sa tim in deregle?

Mr Speaker, la letan mon fer mon entervansyon, mon pe fer bann kritik lo bann travay politik. Me non pa lo karakter personnel sa bann dimoun ki mon pe mansyonnen.

(Interruption)

HON FLORY LARUE

Dan sa Bidze, nou vwar en nouvo benefis ki *SP* pou peye an 2024. E sa i pour bann paran ki ganny plis ki en zanfana alafwa. Sa i pou en alokasyon R3 mil 134 pour sak zanfana adisyonnèl, ziska en *maximum* 6 mil 635. E sa sipor pou ganny mentenir ziska sa bann zanfana i ganny laz 5 an.

Aprè avek bann sif sorti kot Minister Lasante pour sa dernyen 3an, e ki enkli sa lannen, i montre ki sa pou benefisyè plis ki en 20tenn fanmir par an. Sa i montre ki nou Gouvernman i mazin bann

paran ki travers sa boner. Me ki pou osi anmenn en kou finansyer siplemanter.

Mon ti a kontan ki Minis ti dir nou, si sa pou en keksoz retrospektiv pour bann paran ki deza annan *twins* ou plis ki pa ankor ganny 5 an? Nou Gouvernman *LDS* in montre son komikman pou asiste bann nouvo paran, ki sorti lo nou bann zil pros, par donn zot en ogmantasyon lo lasistans. Sorti lo zis R1500 pou vin R5mil. En ogmantasyon R3 mil 500.

Sa i montre ki nou vreman enteresan avek komansman lavi nou bann pti trezor. En Gouvernman ki annan konpasyon e lanmour pour byennet tou zanfana Seselwa. En sonm pour konze maternite e konze paternite i pou sorti R2 mil 480 pou vin R6 mil 633.

Sa pou aplik pour manman oubyen papa ki travay pour zot menm. Oubyen ki travay lo en baz *casual*. Sa Gouvernman i kontinyen siport nou bann zanfana Seselwa depi zot nesans, par asiste bann nouvo paran. Nou espere sa finansman i ganny servi byen pou ankadre nou bann pti trezor par nou bann nouvo paran.

Dan Bidze 2024, nou vwar en nouvo benefis bann sitwayen ki deside ouver zot lakour pou

akeyir en zanfan ki fer fas avek bann problem sosyal. Nou tou nou konnen ki i annan bokou difikilte pou nou bann zanfan dan nou sosyete ozordi.

E nou espere ki sa *one-off* R25 mil ki'n ganny entrodwi pou *foster parent*, i fer ki Servis Sosyal i kapab trouv bann fanmir apropiye pou asiste nou bann zanfan ki sorti dan bann fanmir avek difikilte e napa landrwa pou ale.

Bann semi orfelen ki fer en total plis ki 800 zot, aprezan zot benefis pou sorti R1300 e vin R2 mil 350 par mwan. En ogmantasyon R1,050. Benefis pour orfelen oubyen zanfan abandonnen ki benefisye plis ki 25 zanfan par an, pou sorti R1540 pou mont R3,134. En ogmantasyon R1,540 par mwan.

Foster child. En zanfan ki dan sistenm ki fer apepre 230 zanfan ki ganny sa larzan par mwan pou monte sorti R3,134 olye R1300. En logmantasyon R1,834.

Bidze Lazans Proteksyon Sosyal in ogmante, pou regard sa group pli vilnerab dan pei. Bann zanfan ki zot napa sipor zot fanmir aköz tro bokou problemm sosyal.

Lot kote latab i dir nou, nou pe fer dimoun martir e pa pe zis donner e donner. Mr

Speaker, nou pe met lord avan. Me la nou vwar nou pe konmans fer bann ogmantasyon. E nou Gouvernman in swazir sa group pli vilnerab posib - bann zanfan - pou ogmant zot alokasyon.

Mon bezwen osi remersye Gouvernman pou kontinyen siport Bidze Zafer Entern. Spesifikman Bidze pour Lapolis. En lafors ki pli vizib dan lakominote e transparan lo medya sosyal. Zot pas lenformasyon lo sa ki pe pase e reakte vitman ler bann krim i ganny raporte.

Popilasyon i ganny garde azour avek bann proseksyon kot Lakour ler bann kriminel i ganny prosekite. Tou sa bann kominikasyon i fer ki Seselwa i fer bokou deba lo bann krim ki pe ganny komet. Sirtou bann ki plizanpli pe vin pli vyolan, kot souvan i enkli pike avek zouti.

Sekirite dan kominote i en priyorite ki piblik pe fer demann for. E mon espere ki sa Bidze i kontinyen donn bann zouti ki lapolis i bezwen, atraver bann kordgard, transpor, lekipman e *training*.

Minister Entern ansanm avek *Attorney Generals Office*, e osi Lasanble Nasyonal, i bezwen vin ansanm pou fer en revizyon lo *penal code* pou anmenn sa Lalwa azour avek sa ki pe arive

dan pei pou permet pep Seselwa santi zot pli an sekirite. Sirtou dan zot prop lakaz.

Pli tar dan Staz Komite, mon pou regard bann propozisyon ki'n ganny anmennen dan Bidze pou siport bann aksyon pou anmenn nou anver *e-government*.

Kou *internet* dan pei i reste enn bann pli gran defi pou fer sa vizyon vin en realite pour Gouvernman. Gouvernman e biznes i souvan soufer avek kalite servis *internet* ki zot resevwar.

Bann lekol i bezwen an 2024 ganny garanti servis *internet* tou le zour e a en *speed* rezonnab. An 2024 Minis, nou vwar en biznes ki dan lospitalite e lwazir – pardon.

An 2023 Minis, ozordi nou vwar en biznes ki dan lospitalite e lwazir pa kapab fer tranzaksyon avek kart banker akoz difikilte koleksyon zot POS. En zour ki zot ti vreman plen e pe rann servis – sirtou bann zenn.

Ler servis *internet* pa konsistan, i blok serten biznes ki anvi fer gro lenvestisman ki depann lo *speed* servis *internet*. Sa i vin bann loportinite manke ki pei i pas a kote. Nou konnen kote problem *internet* ser i sorti. Me ozordi nou pei i bezwen fer bann desizyon brav

pou met pei anliny avek bann standar. Me sirtou kalite ek pri servis ki i annan lo nivo enternasyonal.

Mon enplor Gouvernman pou regard ankor koneksyon *Starlink* avek Sesel. Mon konpran ki Vis-Prezidan in dir ki konsiderasyon i bezwen ganny pran pour bann biznes ki egziste dan sekter. Akoz i kapab koz en sityasyon kot bokou i kapab perdi lanplwa ou menm fermen.

Me nou konnen ki nou pei i annan bokou loportinite travay dan lezot sekter. Annou komans en konversasyon pou trouv solisyon pour sa problem, ki pou donn nou pei en propilsyon dan devlopman.

An konklizyon, mon anvi fer pep Seselwa mazine ki avan 2016, Bidze ti ganny depouye e vote dan zis en sel zour. Apre ti al tir petar Moris. Personn pa ti konn demann kestyon.

Ozordi nou'n liber zot e zot file in koupe. Zot dir nou bann *MNA rubber stamp*. Me mwan mon'n tann bokou mon bann koleg eksprim bann defi ki zot santi nou ankor pe fer fas avek, ki nou'n erite avek zot apre 43an.

Ozordi Manm US i ganny lodas vin dir nou ki se zot ki konn priyorite Seselwa. E zot pe

vin rebran pei avek bann *learners*. Nou'n byen montre zot. Akoz sa bann larepons ki'n ganny donnen depi premye repons par *Leader* minoriter i montre ki *words are cheap*. E lalang napa lezo.

(APPLAUSE)

HON FLORY LARUE

Ler ou ekout zot, ou a dir en nouvo parti fek formen. E zot pa'n zanmen dan Gouvernman ouswa annan okenn pouvwar *whatsoever*.

Leader minoriter atraver ou Mr Speaker, i dir ki sa Bidze pa adres koripsyon. Ki napa naryen ladan. E pa nou tou ki egal. Selman *MNA* ek Minis in toultan ganny menm saler ek *allowance* ki zot, zot ti mete.

Mr Speaker, *Leader* minoriter in deza dir mwan ki i souvan obzerv fason ki Prezidan Ramkalawan ti delibere koman *Leader* Lopoziyon. Me zis in obzerve. In pa'n met an pratik bann keksoz ki'n aprann koman *learner* *Leader* Lopoziyon.

Deza plizyer Manm son *Caucus* pa'n adres Bidze. Li in fer bokou lakizasyon, me i bliye ki i osi annan en lot rol. Sa se son rol konman *Chairman FPAC*.

Si i ti pe obzerv byen son *mentor* Prezidan Ramkalawan, i ti a konnen ki pandan lannen antye, Prezidan koman Onorab Ramkalawan ti travay sanses koman *Chairman FPAC*. Se li ki ti fer Seselwa konnen kote koripsyon ti ete. I pa ti zis akize. I ti devwale, e tousala ti pas *live* lo *SBC*.

Sa bann fasilite i ankor *available* avek *Leader* minoriter. *Leader* minoriter atraver ou Mr Speaker, i fer lakizasyon gaspiyaz. Donn faver gro biznes ki ti'n deza gro depi zot letan. Alor pa nou ki'n fer zot gro.

E bann kontra lakaz Eden Island, akoz ki i zis i vin fer lakizasyon me i pa anmenn laprev pour Seselwa vwar sa ki i pe dir i laverite e *rien* ki laverite? Se sa ki Seselwa pe esper li fer. Zot li i aret fer kankan. Si i napa naryen pou dir, pa dir naryen!

(APPLAUSE)

HON FLORY LARUE

Mr Speaker, se akoz menm si zot in sanz kote, zot ankor krwar ki zis zot pou koze e Seselwa pou krwar zot. Zot kontinyen viv lo propagann ki satisfè zis en pti group.

Anmezir zot gat letan. Nou, nou kontinyen dan

pozitivite. Dan fer bann keksoz konkret. E nou kontinyen travay ansanm ek nou bann Minis e nou Prezidan. Mr Speaker, “*Le chien aboie et la caravane passe*”. Mersi Mr Speaker.

(APPLAUSE)

MR DEPUTY SPEAKER

Mersi Onorab. Prosen entervenans i Onorab Philip Monthy.

HON PHILIP MONTHY

Mersi.

(Interruption)

MR DEPUTY SPEAKER

Kontinyen Onorab Monthy.

HON PHILIP MONTHY

Mersi Mr Speaker. Bonzour Mr Speaker. Bonzour Minis.

(Interruption)

HON PHILIP MONTHY

Bonzour tou koleg Onorab. Tou Seselwa ki pe swiv sesyon Lasanble Nasyonal. E pli gran bonzour tou bann Kaskadyen.

Mr Speaker, pou reponn Ladres Bidze prononse par Minis Finans la dan sa Lasanble Vandredi le 3 Novanm, i prezant nou la lo sa

kote latab avek loportinite pou fer 2 keksoz prensipal.

Premye, se ki i permet nou bann reprezantan Lepep ki annan en rol reprezantasyon anver nou bann zabitan ki'n elekte nou, pou nou fer resorti zot konsern e bezwen par rapor a sa Bidze ki'n ganny prezante par Minis Finans.

E fer zot konpran ki sa enn Bidze pe anmennen pour zot. E dan ki fason sa pou ede anmenn plis konfor dan zot lavi e lavi zot zanfan. E dan lenstans osi Mr Speaker, kot nou santi i annan serten mank, ki pour bann rezon fiskal, Minis Finans ek bann teknisyen, ki bann profesyonnel dan zot domenn an preparasyon sa Bidze in war ki i pa pou posib pou fer serten alokasyon la a sa moman.

E ki alors i fer ki i annan serten nesosite, ki i pa pe ganny adrese par sa enn Bidze, i nou devwar Mr Speaker, pou met sa devan Legzekitiv e pouse pou ki dan prosen Bidze sa i ganny konsidere koman en priyorite e ganny pran kont.

E la deswit, mon pou fer referans avek nou bann dimoun aze, ki menm si sa R500 tanporer ki serten zot ti pe benefisye avek pou kontinyen, ki byensir i touzour keksoz parey koze i dir.

Mwan personnelman mon ti a demann Minis ek Gouvernman pou regard dan posibilite kan nou annan sa lespas fiskal pou fer li byensir. Pou konsider logmantasyon pour tou nou bann dimoun aze.

Egalman dan sa menm laliny Mr Speaker, an menm tan ki mon apresye sa logmantasyon dan *allowance* pour bann etidyan pos-segonder ki sorti lo nou bann Zil Pros. E osi logmantasyon dan *stipend* ki bann etidyan Liniversite in deza resevwar. Mon pou egalman demann Minis pou osi konsider logmantasyon pour tou nou bann etidyan ki pe swiv zot letid lo nivo pos segonder. Prenon kont kou ki zot bezwen abzorbe pou pourswiv zot letid.

Be selman Mr Speaker, an menm tan nou'n war sa *Scheme Laptop* ki pe kontinyen e ki prezan in elarzi. E pou prezan aplik pour bann zelev *P5* e *P6*. E sa mon asire ki plizyer paran pe akeyir en tel desizyon ki Gouvernman in pran.

Dezyenm loportinite ki sa legzersis debat lo Bidze i permet nou fer Mr Speaker, e enn ki tre enportan, sirtou ler ou pran kont sa kalite Lopozisyon ki nou war nou pe fer fas avek.

Se ki i prezant nou bann Manm lo sa kote latab avek sa

loportinite, pou eklersi tou sa bann konfizyon e mansonz ki sa bann swadizan reprezantan Lepep lo lot kote latab in vin fer, pandan sa 3 zour deba la isi anndan, depi ki Minis in prezant sa Bidze avek Lepep Seselwa.

Ler ou annan ou en parti ki'n perdi tou sans direksyon e ki pe zis tourn an ron dan fo lakizasyon, laenn e tout sort kalite simagri, zis akoz zot anvi retourn lo pouvwar. I nou devwar la anndan pou nou fer Seselwa konpran ki lavenir Sesel zot in fini deside le 24 Oktob 2020.

E ki sa ti sa meyer desizyon ki zot in kapab pran e alors i enportan ki zot reste fikse lo sa lavenir ki nou'n trase ansanm sa zour. Pour ki pti ta pti, sa pei ki apel Sesel i vin sa landrwa ki nou tou nou'n reve pandan sitan lontan.

E i enportan Mr Speaker, pour sa kapab arive, ki Seselwa i reste ferm dan zot desizyon. E kontinyen fer konfyans *LDS*. Me non pa les zot tonm dan latrap bann mersener politik, ki nou war pe konmans aparet.

E osi sirtou sa parti ki ler zot ti la, zot pa ti fer. Me ki la prezan zot dan Lopozisyon. Me ki selman pe dir nou; si zot retourn lo pouvwar, prezan zot

pou fer. Be Mr Speaker, pou ki zot pran Seselwa se zans?

La napa bann pli bon dimoun ki zot. Zot pou fer tou keksoz en sel kou. Ogmant lapey tou travayer. Redwir laz retret. Annou pa bliye ki sete zot Gouvernman menm ki ti inisye en tel desizyon akoz ti enn ki ti nesaser dapre bann eksper.

Lalis kado ki sa gro Per Noel pou donn Seselwa i long Mr Speaker. E sa ki zot pa dir nou, se kote zot pou ganny sa larzan, pou fer tousala en sel kou. Ler dapre zot, zot retourn lo pouvwar an 2025?

Ler ou mazine, ni en santer ki zot in vin fer sante dan zot bann *mini rally*, zot pa pe kapab peye.

(APPLAUSE)

HON PHILIP MONTHY

Selman, Seselwa i bezwen prezan demann zot lekor; Be si nou remet zot lo pouvwar, ki logmantasyon saler nou pou gannye? Ki logmantasyon nou bann pansyoner pou gannye Mr Speaker? Sel logmantasyon ki pou annan se lakantite larzan ki pou al dan zot bann pos personnel. Parey in touzour leka anba zot Gouvernman.

An di-z-an sa Mr Speaker, petet mon mazine zot pou

pran en pe dan sa bann santenn milyon ki zot pe anmase atraver lavant plizyer sa bann propriyete, ki alors en zour ti pour pep Seselwa. Ki zot, zot in santi i pli ale avek zot.

Me si menm zot bann pli gran siporter pa pe konnen ki kantite larzan zot pe anmase. E kote sa bann larzan pe ale atraver lavant sa bann propriyete, i laprev ki tou sa ki zot pe dir Mr Speaker, i zis bann bat latet.

Mr Speaker, zot in sitan les zot ganny anvair avek sa lobsesyon retourn lo pouvwar, ki zot vin fer kankan ziska avek en kalandriye la anndan dan sa Lasanble Nasyonal.

(APPLAUSE)

HON PHILIP MONTHY

Kot nou sipoze pe diskit bann keksoz serye ki pou benefisy Lepep Seselwa. Kisisa sa? Kekfwa akoz i annan bann zoli figir lo sa kalandriye Mr Speaker.

(APPLAUSE)

HON PHILIP MONTHY

Akoz mon annan enn sa lo mon laport *fridge*. E sak fwa ki mon ouver mon get lo la, mon war zis bann zoli dimoun. Petet zot anvi

fer enn parey, me selman zot pa kapab.

Apré zot a dir *LDS* i en parti ki *intellectually spent*. Be sa ki mannyer i apele sa? Ennler olye pran lakoler i demann ou zis riye telman zot in antre dan ridikil.

Sitan ridikil kot ou war sa ki *Chairperson FPAC* ki sipoze annan manda pou somonn e kestyonn okenn departman Gouvernman lo zot depans, i vin la dan sa Lasanble e i vin akiz Gouvernman *LDS* konmkwa i pe fer koripsyon.

Be ou Onorab Pillay atraver ou Mr Speaker, ki ou pe fer? Zis pas ou letan anmenn bann *PNQ* ridikil? Fer ou louvraz e kestyonn sa bann ka koripsyon ki ou pe swadizan dir i pe arive!

(APPLAUSE)

HON PHILIP MONTHY

Onorab Gabriel ki osi en lot Manm *FPAC* in osi vin koz lo koripsyon dan prosedir *procurement*. Selman, zanmen ou war li pe demann en kestyonn pandan sa bann rar moman ki *FPAC* i zwenn konmela. La i vin koz lo koripsyon. Onorab, met ou larzan kot ou labous i ete.

(APPLAUSE)

HON PHILIP MONTHY

Koz ek ou sef e fer li kestyonn sa bann departman Gouvernman. Akoz konpare avek zot, ler zot ti dan Gouvernman, sa Gouvernman *LDS* ki la napa naryen pou kasyet Mr Speaker.

Nou'n tann zot koz lo gro saler Minis ek Prezidan. E Mr Speaker, ler mon get dan Bidze, mon pa war okenn alokasyon ki pe fer provizyon pou donn Prezidan, Minis ek bann Manm Lasanble Nasyonal bann gro saler.

Selman sa ki mon kapab dir se ki sa bann menm Manm Onorab ki'n vin koz sa bann mansonz, zot menm ki tou kou pe rode kan ki *MNA* pou ganny logmantasyon saler. E Onorab Cosgrow i enn parmi Mr Speaker! Ou war ki kalite dimoun nou pe fer fas avek la.

Sa ki enteresan ankor Mr Speaker. Sa ki vin osi kestyonn *allowance* Minis, i li menm li Manm ki *travel* plis la kot sa Lasanble. E sak *travel* i ale, i ganny en *per diem* ki en *allowance* dan li menm. Ti devret omwen annan kouraz pou ou dir ek zabitan Roche Caiman konbyen fwa in ganny *allowance* sa lannen. Sa pa larzan *taxpayers'* sa?

Mr Speaker, si ou annan en responsabilite ki vin avek

serten benefis, annou pa kestyonn pour nou prosen. Pou ou sey vin pas koman pli bon dimoun devan sa pep, zis pou ganny *mileage* politik.

Nou tou nou bann profesyonnel ki pe desarz nou responsabilite dapre kondisyon ki sa pos ki nou pe okipe, i vin avek.

(APPLAUSE)

HON PHILIP MONTHY

Alors annou get nou byen dan laglas avan nou montre ledwa lo lezot.

Mr Speaker, sorti dan en tanpet ekonomik san presedans, sa ladministrasyon in kapab re donn lespwar en pep, ki zis detrwa lannen pase ti pe prepare pou pran en koupir dan zot saler. Oubyen menm ganny fer aret travay. Tousala ozordi zis bann vye kosmar lepase.

Travay ki sa Gouvernman in fer, Seselwa in menm bliye si apenn 3 an pase nou ti pe get en tel sityasyon drwat dan son figir. Nou dan *LDS* nou pou alors anmenn nou bann frer ek ser Seselwa pour nou konsantre nou zefor lo lavenir. Akoz apre tou, se en meyer lavenir ki sa Gouvernman pou anmennen pour sa pep an

antye. Me pa pour zis en pti group.

Bidze 2024 Mr Speaker, ler mon'n ekout reaksyon plizyer dimoun, i kler ki sa rev pour en meyer Sesel pe konmans transform an realite. Me mon pou dir avek tou Seselwa ki i annan ankou bokou pou nou akonplir.

Akoz nou vizyon i pli lwen ki zis vin donn bal dan larzan Leta pou ganny eleksyon 2025. Apre les en lalis det pour nou ban zenerasyon ki pe monte vin peye. Parey en gran filozof Sinwan in fer nou remarke, ki sa pli gran vwayaz i konmans avek en senp lepa.

E sa Bidze Mr Speaker, i sa bann premye lepa, ki nou pe fer lo sa gran vwayaz ki son destinasyon i apel en nouvo Sesel e i en meyer lavenir pour sa pep ki apel Seselwa. Pe enport ou klas sosyal oubyen ou apartenans politik.

Ler *US* in analiz sa Bidze, e zot in war sa kantite benefis ki i pe anmenn pour Seselwa, zot pe konmans panik. Petet i annan serten nou frer ek ser Seselwa ki pe les zot tonm dan sa bann lasenn negativite, ki reprezantan sa parti minoriter la anndan pe sennen.

Me o firamezir Mr Speaker, zot pou santi sa lenpak pozitiv ki sa Bidze pe

annan lo zot lavi. E zot pou war ki sa ki nou ti pe dir ti pirman laverite. E ankor enn fwa zot pou kapab war lekel sa bann ki vin gaspiy letan e resours Lasanble Nasyonal zis pou vin abet zot.

Mon'n dir *US* pe panik Mr Speaker, akoz zot konnen ki si avek lagras Bondye, napa okenn sok eksteryer ki afekte nou lekonomi, sa prosen Bidze ki pou vini pou kontinyen anmenn plis benefis ankor pour sa pep. Sa ki pou fer ki an 2025, ler Seselwa pou vote, i pou swazir pou kit zot ankor dan Lopozisyon kot zot ete.

E kot avek letan, zot pou dezentegre konman en parti. Akoz zot en parti ki parey en prodwi lo letazer ki'n depas son dat konsonmasyon. *En d'autres mots* Mr Speaker, zot in fini *expire*. Me ankor pe sey debat pou anbet Seselwa e fer krwar ki zot en prodwi ki ankor sen e bon pou konsonmen.

Mr Speaker, tou lanmor i annan son siny. Ler konman en parti, olye ofer bann lide, sizesyon konstriktiv ki ansanm parey Onorab Simon Gill ti kontan dir; *"together"* Zot ti ava ede pou bouz sa pei devan e kontribye dan son lepanouisman pour byennet sa nasyon ki apel Seselwa.

Me ou swazi pou ou zis kritik tou sa ki sa Gouvernman i vin avek. Ou swazi pou perdi respe pour lofis pli o dan pei. E ou swazir pou zis senm laenn, mansonz e rod rekours avek bann lespri demonik. Mon pou dir ki sa parti minoriter ki apel *US*, i pa dan en pozisyon pou li vin donn nou okenn lesan Mr Speaker.

Mr Speaker, i sitan annan keksoz pozitiv dan sa Bidze pou koz lo la, ki ou pa ni konnen kote ou pou konmanse. 1.3 bilyon ki'n ganny bidzete pour bann benefis ek program anba Lazans Proteksyon Sosyal. Kot nou'n war en logmantasyon signifikan dan plizyer benefis parey pour *orphan*, *semi-orphan* ek dezabilite.

Sa sonm i konpri 868.4 milyon benefis retrait. 161.2 milyon benefis dezabilite. 109.1 milyon pour benefis envalidite. 61.8 milyon konman *social safety net*. Apre zot dir nou, nou pa pe get bann dimoun ki pli vilnerab.

Dan sekter kominoter, en sonm ki mon pou koz lo la se sa 3.2 milyon pour renovasyon lakaz bann dimoun aze. Onorab Lemiel atraver ou Mr Speaker, in dir ki sa *scheme* sete son Gouvernman ki ti entrodwir. E ki sete Gouvernman *LDS* ki ti

fer arete. E la prezan nou pe reentrodwir.

Mr Speaker, mon pou zis fer Onorab konpran, ki sa *scheme* ti ganny fer arete akoz sityasyon ekonomik pei ti pe fer fas avek, gras a *COVID*. E osi akoz parey in touzour leka anba son Gouvernman, ti annan labi. Annan sa bann lakaz ki pe ganny lwe la konmela. E napa rikord konbyen ki'n ganny fer lo later Gouvernman Mr Speaker.

Cascade tou vizit e prosedir nesese in ganny fer pour bann zabitan ki pou posibleman ganny asiste anba sa *scheme*. E ler mon pe get kondisyon lakaz sa bann pov dimoun Mr Speaker, mon demann mon lekor si sa ki ti vreman merite ti ganny konsidere anba sa ansyen Gouvernman?

Onorab Uranie atraver ou Mr Speaker, in dekrir nou konman en Gouvernman *maintenance*. Ou pa ti pou kapab pli byen koze ki sa Onorab. E Onorab, si ou Gouvernman ti'n kit nou avek en pli meyer lenfrastriktir, olye enn ki delapide e anpyang, nou pa ti pou bezwen pe pas tou nou letan pou fer *maintenance*.

E nou pa ti pou bezwen pe depans R48.3 milyon pour renovasyon bann diferan lenfrastriktir sportif. Enkli sa ki

lo ou zil. Ki prezan ou annan lodas vin demann sa Minis ki bezwen pas tou son letan zis fer *maintenance* pou demisyonnen. Onorab Loze osi Mr Speaker, in kestyonn konpetans nou bann Minis. I dir i annan ti pe vey zanfan...

(Interruption)

HON PHILIP MONTHY

Mr Speaker, mon a *retract*. I annan en Onorab lo lot kote latab – (i *ok* Onorab Loze, reste trankil) I annan en Onorab lo lot kote latab in kestyonn abilite nou bann Minis. In dir i annan ki ti pe vey zanfan ki'n ganny kriye pou vin Minis. Me zot bliye pou dir anba zot ladministrasyon, zot ti annan en Minis Finans ki li menm li i ti admet i pa konn konte.

(APPLAUSE)

HON PHILIP MONTHY

E zot ti annan en Minis Lasante ki se pa ti konnen si *panadol* i servi pou redwir douler Mr Speaker. Si sa Gouvernman *US* ti'n fer son louvraz parey Lepep ti'n elekte li pou fer, sa 48.3 milyon ti a ede fer nou bann dimoun aze ganny en logmantasyon dan zot Sekirite Sosyal.

Oubyen logmantasyon dan *allowance* bann etidyan pos segonder. Mr Speaker, parey mon'n dir, i sitan annan keksoz pozitiv dan sa Bidze, me bann reprezantan *US* in swazir pou koz lo sa ki i napa.

Me mon a dir zot sa ki napa la dan sa enn, dan sa lot ki pe vini i pou annan. Prezan nou a gete ki kalite lipou zot pou vin rode.

Mr Speaker, si i annan detrwa distrik ki kapab dir zot pe vreman byen pase atraver sa Bidze, sa i dabor Anse Royale, ki malerezman son reprezantan la anndan olye dir mersi in prefere al rod tou sort kalite lipou ankor. Sa i pa lot ki mon distrik Cascade.

Cascade i en distrik ki parey tou kou mon'n dir, in annan plizyer proze ki'n ganny fer dan lepase. Akoz mwan mon sa dimoun ki kot i annan kredi, mon pou donn kredi. Be Mr Speaker, mon pou osi dir - E sa i pa mwan, me i remark zabitan Cascade an zeneral.

Se ki keksoz in ganny fer en kantite lannen pase. Me ler ou get sa dernyen 5 a 10 an avan dernyen eleksyon 2020, mon pou dir ki malerezman napa bokou ki'n ganny fer pou benefisye bann Kaskadyen, e fer transformen nou distrik.

Nou bann paran pe bezwen war zot pe al Anse aux Pins oubyen dan lezot distrik, pou zot benefisye avek servis *day care*. Sa i en martir Mr Speaker. E mwan i fer mon tris ler mon war batiman ki i ti pou ideal pou ofer sa servis *day care*.

Me olye sa, priyorite zabitan in ganny met a kote. Me plito priyorite en parti politik ki'n pas avan. Kot nou'n war sa batiman in ganny swadizan aste par Parti *US* e ganny servi pour bann aktivite politik.

La Mr Speaker, mon pou profite pou dir avek tou bann paran dan Cascade ki pe esper sa servis *day care*, ki mwan ansanm avek mon *DA*, nou'n konmans demars pou fer ki Cascade dan en fitir pros i a kapab benefisye avek son prop *day care*.

Problenm sete ki nou ti pe war li difisil pou ganny en lokasyon, vi ki lokasyon ideal in ganny pran par sa parti minoriter ki mazin son lentere avan sa enn ki pour son pep.

Lokasyon Mr Speaker, nou'n idantifye. Finalman e la konmans bann demars ki menm si i pa pou ariv dizour lanmen. Selman sa Proze *Day care* i enn nou propriyete ki nou pou fer tou pou konkretize.

E ler mon pe koz lo lokasyon *day care*, mon pou profite pou dir zabitan Cascade ki sa transformasyon pe vini. Akoz kantmenm nou konnen lespas i en problem. Ansanm avek bann Lotorite konsernen nou'n idantifye bann serten landrwa kot ou a kapab konble.

E alors ganny sa lespas pou konstrir bann lenfrastruktir nesese ki manke dan nou distrik. Sant Kominoter Cascade in brile plis ki 10 an pase Mr Speaker. Cascade i enn bann sel distrik ki'n war li san en Sant Kominoter pandan plizyer lannen.

Depi ki mon'n ganny elekte, mon'n kontinyelman pouse pou ki sa sant i ganny rekonstrir. Akoz konman Lotorite Distrik, nou annan en kantite aktivite program ki nou anvi lanse. Me san en lokasyon ideal, i fer li difisil. Kot parfwa nou'n war nou pe bezwen demann pret lasal a manze avek *headteacher* lekol Cascade.

Dan sa Bidze Mr Speaker, i annan en alokasyon R5 milyon pour komansman konstriksiyon, pa zis en Sant Kominoter, me osi en nouvo Ladministrasyon Distrik. Ki vedir ki sa enn batiman ki la pandan plizyer lannen, pe al ganny demoli pou fer plas pour

en nouvo batiman pli zoli e pli modern.

Sa dan li menm Mr Speaker, i pou en soulazman pour tou nou bann zabitan. Akoz apre tou sa espere, finalman sa proze pe al ganny realize anba nou Gouvernman. E mon konnen ki zot pou dir Mr Speaker, ler sa proze pou'n konplete. Zot pou dir sa ti lo plan zot Gouvernman.

Selman plan sa *building* fek ganny fer la anba sa ladministrasyon avek *input* Lotorite Distrik ki enkli mwan, DA e Minis osi – Minis Hoareau in donn son *input* lo sa proze.

Dezyenm faz Proze Lakaz Vilaz Zanblon pe al demare avek en alokasyon R14.3 milyon pour konstriksiyon 24 *unit* lakaz. Ki vedir byento en lot 24 fanmir ki pe fer zot kontribisyon dan *Home Saving Scheme* a war zot rev pou posed zot prop lakaz ganny realize.

E parey mon'n deza enform bann zenn dan Petite Paris, anba sa menm proze sa laplenn anba kot bann zofisye *Dog Unit* ti pe servi pou *train* zot lisyen, pou ganny transformen an en vre laplenn foutbol pou deservi zot. Tel parey sa enn ki nou pe fer anler dan leo Cascade e Anse Des Genets o bor *airport*.

R14.3 milyon pou konplet bann lenfrastruktir de baz pou fasilite konstruksyon bann proze *mid-range condominium*. Dan 5 landrwa, parmi lekel Cascade osi pou benefisye avek 32 *unit* kot *ex Tarmac* anler Petit Paris.

Sa proze i *self-finance*, ki vadir i ouver pour nenport ki dimoun. Menm si ou sorti dan en lot distrik. Osi lontan ki ou mwayen finansyel i permet ou antre lo sa *scheme*. Me mwan ansanm avek *DA*, nou'n ankouraz *maximum* nou bann zabitan ki *meet* kriter pou zot al anver sa enn prodwi.

E la Mr Speaker, ler mon get lo mon lalis, mon war mazorite zabitan Cascade ki'n montre lentere dan sa proze. Ki vadir ankor 32 nouvo fanmir pou pe war zot pe antre dan zot prop lakaz anler Petit Paris ler sa proze a ganny realize Mr Speaker.

La mon asire ki i annan ler zot pe ekout mwan, ou pe dir; sa ti dan plan. Tel parey mon'n al tap laport *Rotary Club*, *Coco Der Mer* ki'n fer sa *bus shelter* Petite Paris. E mon pou profite remersye zot ankor Mr Speaker. E ki mon tann dir? Sa ti dan plan.

Sa Gouvernman *US* ki en Gouvernman plan lo plan. Onorab Vidot atraver ou Mr Speaker, tou sa plan lo plan ki

zot in fer, n ou, nou pou vin realiz sa bann plan nou. En keksoz ki zot zanmen zot in kapab fer.

(APPLAUSE)

HON PHILIP MONTHY

Mr Speaker, en alokasyon R1 milyon in ganny bidzete pour bann pti proze distrik ki en logmantasyon plis ki R200 mil. Mon asire ki lezot mon bann koleg pou agree avek mwan Mr Speaker, ler mon pou dir ki mon ti a kontan si sa alokasyon ti ava en pe plis. Akoz annan en kantite pti proze semen e drenaz pou fer dan Cascade.

Me mon pou dir mersi pour sa sonm kantmenm. E nou'n deza fini vizit e dokimant 95poursan nou bann proze pour 2024 ansanm avek *DA* e lekip proze kot Gouvernman Lokal.

Ki mon pou profite pou remersye Elsia, Benny ek zot lekip ki touzour la pou fer en travay formidab avek nou lo kote Lotorite Distrik.

Me menm si sa alokasyon i zis R1 milyon. I annan en lot alokasyon R10 milyon dan Bidze anba Sekter Kominoter pour bann proze semen, drenaz e lezot ankor dan bann distrik.

Atraver sa alokasyon mon pou pouse ki sa proze drenaz

dan *Parson Estate* anba Petit Paris i a ganny konkretize. Akoz sa bann zabitan i pas martir laba anba Mr Speaker. Sirtou la avek sa sezon gro lapli.

Vizit avek enzenyer in ganny fer e travay preliminar lo sa proze in konmansé. Ler mon lo drenaz Petit Paris, mon profite pou asir zabitan Petit Paris anler Anba Tanmaren ki osi ganny afekte ek sa problem linondasyon. Ki sa enn proze drenaz i dan nou lalis proze pour sa lannen. E *tender* in fini ganny fer. E kontrakter in fini ganny kontra.

Sa ki vedir ki travay pe al konmansé a nenport ki moman la dan bann zour ki pe vini. Menm si i annan pe dir ki naryen pa pou ganny fer.

Ler ou annan en travay pou ou fer Mr Speaker, e ou konnen kwa egzakteman ki ou annan pour ou fer, ou anmenn plis konfor pour ou zabitan, ou konsantre lo ou travay. E ou les kozer koze.

En sonm R7.5 milyon pou *cater* pour bann *disaster emergency works* dan bann distrik. I en lot alokasyon dan sa Bidze ki pou annan en lenpak direk pour nou bann zabitan.

Dan distrik Mr Speaker, nou ganny plizyer konplent lo bann pye dibwa danzere.

Ansanm avek Departman Lafore nou'n fer vizit, e plizyer sa bann pye dibwa in ganny koupe. Me sa Mr Speaker, i aplik pour bann pye dibwa ki lo later Gouvernman.

Me ler pye dibwa i ganny konsidere konman danzere, i lo en later prive, fodre ki nou bann zabitan i konnen ki responsabilite i tonm lo sa propriyeter me non pa Gouvernman.

Me i annan dan serten ka kot sa propriyeter i napa sa mwayen pou koup sa pye dibwa. E osi serten ka kot propriyeter i aletranze. Cascade mon annan serten sa bann ka spesifik Mr Speaker. E mon konn tre byen sa bann ka. Mon pa bezwen person pou vin dir mwan ki pou fer Mr Speaker.

Sa R7.5 milyon pou ede pou rezourd sa bann tel sityasyon e retir sa lenkyetid ki sa bann zabitan ki pe fer fas a bann tel sityasyon pe viv avek.

Ler nou pe apros lafen lannen, mon kapab dir ki an term pti proze distrik pour sa lannen, plizyer in ganny konplete dan Cascade. Plizyer *bin site* ki ti dan move leta. *Bus shelter* kot zanmen in annan, in ganny fer. E nou pou kontinyen fer.

La mon pe mazin bann zabitan Brilliant. E mon pou dir

zot ki zot osi zot pou ganny en *bus shelter* byento. E zot pou arete esper bis anba lalyann anvaisan.

Drenaz ki'n ganny fer olye amelyore. Bann pti semen santye ki'n ganny aranze. Plizyer semen segonder ki ti dan move kondisyon, ki'n ganny en nouvo sirfas koltar. E ki pou gannyen avan lannen i terminen Mr Speaker.

E nou'n fer enstal 26 lalimyer partou dan distrik pou retir nou zabitan dan fernwar. Avek en sonm 7.7 milyon ki'n ganny bidzete pou enstal lalimyer dan semen, sa detrwa landrwa dan distrik ki bezwen lalimyer pou gannyen lannen prosenn.

Dan sa travay kontinyel pou amelyor lavi zabitan Cascade, mon pou profite pou remersye mon *clerk* Lynn, *DA* Beguitta. E tou sa lekip kot Ladministrasyon Distrik. E mon pou demann zot pou kontinyen met distrik an premye e les politik deryer.

Mr Speaker, Seselwa in met konfyans dan sa parti ki apel *LDS*. Pa avek lentansyon pou vin fer mazik e koriz tou sa ki mal en sel kou. Oubyen zis vin depans larzan Leta san mazin demen.

Seselwa ler ti fer sa sanzman, pa ti swazir pou fer

sanzman tanporer pour zis 5 an. Me zot in met nou la pou fer en travay konpreansiv ki zot konnen pou pran plis ki 5 an pou realize.

Depi ki later i later, i annan en keksoz ki'n tou kou arrive. E sa se ki dibyen in touzour raport laviktwar par lao dimal Mr Speaker. Ansanm avek nou bann siporter ki'n la avek nou e ki'n reste fidel tou sa lannen; ansanm avek sa bann ki fek zwenn nou, nou pou kontinyen sa semen ver Sesel meyer.

Menm si larout parfwa pou vin difisil, menm si nou pou rankontre adversite. E menm si nou pou rankontre bann lafors nwar, nou pou reste fikse lo nou lobzektif, akoz nou tou senpleman nou pa pou zanmen e zanmen les tonbe! Mersi Mr Speaker.

(APPLAUSE)

MR DEPUTY SPEAKER

Mersi Onorab. Dernyen entervenans avan nou pou *break* se Onorab Johan Loze. *Proceed* Onorab. *Proceed* Onorab Loze.

HON JOHAN LOZE

Mersi Mr Speaker. Mr Speaker, i annan en gran filozof Sinwan ki ti dir “en voler pou touzour en voler, i reste en voler menm si i

vol tapi lili lopital” me egalman sa gran filozof Sinwan ti dir pou dir “ti annan en letan kot *CEO NSC* ti fer sekirite ouver baro tou le bomaten, pou li al *jog 5er edmi bomaten* avek en *leader parti politik*.”

Sa ti dan bann letan kot travay *maintenance* lo bann landrwa sportif ti pran travayer ti met reste Stad Linite.

Ti fer en *mess* avek renovasyon *gymnasium* anvil. E *leader* parti politik ti pe *jog* avek *CEO* tou le bomaten sa bann letan. E mon war zot, zot anmas *CEO* zot anvoy La Digue. So, petet zot annan par ladan dan tou sa bann lenfrastruktir delapide ki zot pe dir nou.

Mr Speaker, devan nou, nou annan en Bidze ki’n fware, sorti kot en Gouvernman ki’n egalman fware. En Gouvernman enkonpetan, mank direksyon ki fernwanr in fini fer li dan semen. E la, son sel kart ki reste li pou zwe, se pour blanm sitwayen pour mankman kapasite zot dirizan, blanm travayer pour lenkonpetans zot ladministrasyon, e blanm lepase, pour malediksyon ozordi.

Annou komans avek Bidze 2023, sa Bidze ti sitan byen, ti sitan bon, ou ti’n byen benny li

Minis, ou ti’n byen pirz li, ki ni en pis ti napa lo la. Si Bidze ti’n sitan byen bennyen, ki mannyer alors eski sa Bidze byen bennyen in fer pou li mank target?

Pou premye fwa depi lannen 2009, nou annan nou en Bidze ki mank son target. E olye kestryon Minis lo ki fason ki en tel keksoz in kapab arive, zot asize zot dekri Minis koman en kado sorti dan lesyel, son bann koleg Minis koman bann lanz, e Prezidan koman leternel li menm. Avek sa mazorite kontrole par *LDS*, legzersis Bidze, in vin en legzersis flate.

Sirplis ki ti orizinalman ganny prozekte dan Bidze 2023, ti pou an tou 1.1poursan. Me sa ti ganny swiv par en revizyon an Septanm sa lannen, kot Vis Prezidan ti dir nou ki Bidze ti’n atenn en sirplis fiskal 365.8 milyon, ouswa 1.2poursan *GDP*. Letan ki nou lo sa kote latab, nou ti pe dir avek Minis ki sa bann prozeksyon dan son Bidze pour 2023 pa ti realis, zot laba lo lot kote, zot ti pe zis bat lanmen, aplodi, e sant louanz Minis koman nou sover.

Me apre ki zot in fer sa, nou’n vwar ki Minis in *fail*, son Bidze in *fail*, e Minis in konpletman mank target ki li menm li ti’n set, senpleman akoz Minis i mazet.

Gran mersi ki nou pa'n anvoy ou zwe petank Minis, akoz sa pwa mazet ki ou mazet, ni bronz nou pa ti pou'n desan avek. Sa sikse ekonomik lo nivo mondyal ki ozordi Minis pe sant laglwar lo la, i rezilta en travay kontinyel, ki Minis in vin zwenn la deza.

E li Minis, i pe zis batir lo sa fondasyon solid egzistan. Dapre zot *LDS*, nou lo sa kote latab nou negativ, e zot, zot pli pozitiv ki leternel li menm.

Me dan zot swadizan pozitivite, zot pa zanmen kapab rekonnet okenn dibyen ki zot in erite. Sa lalang serpan ki bat san lezo Onorab Larue, i penn en portre en leritaz negativ, en pei *faid*, ki se gras a zot ki i lo son lipye ozordi.

Mr Speaker, dan langaz tre senp, an 2019, avan ki *COVID* ti vin afekte nou, to krwasans ti par lao 4 poursan. E lenflasyon ti bokou pli ba, ki 4 poursan, nou ti pe fer en sirplis fiskal an mwayen 2.5 poursan.

E depi reform ekonomik 2008 tou Bidze in reisi pou atenn target ziskan lannen 2023. Kot nou zwenn premye Bidze ki pa reisi pou atenn son target depi 2009.

Bann lakonplisman Sesel pa'n ariv dan 3 an. Depi san lannen 2008 Sesel nou pe

ganny felisite pour nou sikse ekonomik. An 2019, *UNDP* ti raporte ki *Human Development Index* pou Sesel i tre o, e pou menm premye lo nivo Lafrik. Se sa, baz ekonomik ki ou'n erite Minis.

(APPLAUSE)

HON JOHAN LOZE

Nou'n kit zot avek en lekonomi ki ti stab, e performan, avek tou keksoz deza an plas pou kre larises pou sa pep ki apel Seselwa. Me sa ki nou'n war an 2021, se ki zot bann dirizan i dezonnnet.

E ki zot en bann move dimoun, ki pare pou envant en bann mansonz kof vid, kales kase sepa ki lot ankor, zis pou zot kapab vol bann lakonplisman *United Seychelles*, e dir ki sa sete zot lakonplisman.

Kestyon ki zot, lo lot kote latab, zot pe kontinyelman demande, se kote ki nou, nou pou ganny larzan pou finans bann benefis ki nou pe propoze anmennen an 2025? Me olye rod nou, kestyon ki zot devret pe demande, se ki vre motiv deryer sa rediksyon taks par 5poursan ki Minis ti donn bann pli gro lakonpanyen an 2021.

Ki lozik ki zot ti annan pou donn en *tax rebate* dan en

moman kot nou pei ti pe eksperyans enn bann kriz finansyel pli pir ki nou pei ti'n zanmen eksperyanse? Dan en moman kot zot ti pe dir kof vid, e kales kase, zot in fer kado gro biznes en bel manman ta *welfare*.

E zot in egalman fer zot lekor kado plis *welfare* ankor atraver *allowance* palto, ledan, lakaz, linet, e sepa kwa ankor.

Zis pou montre, ki sa zistwar kof vid ti zis sa, en zistwar, e alors en zour fabrike par en bann move dimoun. Me akfer fabrik en tel zistwar? Sa zistwar in permet zot pou rap lapo labous sa malere kreol, dray li, e met li dan son plas enn fwa pour tou.

E zot in reisi pou fer sa lo kredi, akoz pandan letan ki zot ti pe fer sa pep soufer, sete *United Seychelles* ki ti pe ganny blanmen atraver sa zistwar kales kase ek kof vid.

Sa zistwar kof vid ti osi permet zot pou deklar en lager lo tou sa ki saler ti pli ba dan sa pei. Zot in komans par ogmant pri bis, koup akse avek tou form lasistans, e zeneralman ran lavi nou pep en martir, e fer zot viv en vre kosmar. Anba leskiz met lord kot *ASP*, zot in dreng sa malere kreol ziska en staz kot tin reste zis 115 dimoun ki ti pe resevwar lasistans avek *ASP*. Sa

i pa apel met lord sa, i apel kriyote, en krim sa ki zot in fer avek dimoun, sa i apel labi avek sa ki pli vilnerab.

La ozordi i annan en larme ipokrit ki pe sorti pou koz lo amelyorasyon servis kot *ASP*. *ASP*, isi, *ASP* laba, selman ler laverite ti sorti, isi menm anndan dan sa Lasanble, konmkwa ki *ASP* pe martiriz dimoun, ti napa enn zot laba lo lot kote ki ti annan kouraz pou koze. Zot ti reste silans, e les nou anmenn sa lager nou tousel.

E pa bliye, ki sa zistwar kales in osi permet zot pou fors nou pou pran en bann pikir kosonnyen. Menm bann ki ti ankor dan faz pe ganny teste, e pa ti ankor ganny laprouvasyon son prop pei lorizin letan ki ti antre se nou.

Sa in en lenstriman ki'n okazyonn lanmor plizyer nou bann frer, e ser Seselwa. Zot lanmen i sal, zot responsab. E an 2025 zot pou rann kont pour tou nou bann frer e ser Seselwa ki zot in touye atraver neglizans zot dirizan.

(APPLAUSE)

HON JOHAN LOZE

Depi ler ki sa deba in komanse, lesel largiman ki pe sorti lo kote, se ki nou dan *United*

Seychelles nou negativ. Les mwan dir zot, ki pli gran form negativite, se ler ou konnen en keksoz i mal, me ou reste silans. Ler ou konnen en keksoz i mal, e ou pa lev en pti ledwa pou fer nanryen.

E ler ou konnen ki en keksoz i mal, e olye donn en koudmen pou aranze, zot bat lanmen, e aplodi Minis, e dir li bravo, fer ankor Minis.

Dan plas sey penn nou koman negativ, akoz zot pa sey rekonsilye zot avek lefe ki nou en pti group dimoun ki fran, onnet, e travayan, sa pti group nou isi anndan ki pe fer zot 4 tim foutbol *Sunday league* travay en pe.

Se nou ki kestyon Minis lo son target, e konsey li pou amande letan pa realis, zot laba, dan plas koz lo Bidze zot vin koz lo *KIS*.

Sa Bidze 2024, in en dezapwentman konplet, e total, Bidze ti sitan dezapwentan, ki in menm dezapwent Minis. Si zot oule laprev sa ki mon pe dir, zis al lo *YouTube* e al reget ladres Bidze Minis. Sa ki ti tre kler e evidan, se ki Minis pa ti oule vin la li.

Onorab Georges dan son repons ti sey senm en pti divizyon sal, sal lo nou *Caucus*. Be laba kot zot, Minis in fer en sitan move travay pou delivre

Bidze, ki yer Onorab Henri in bezwen vin rek calibre son ladres. E montre li ki mannyer sa zafer i fer.

Selman *comme* labitid, pa met zot likou lo biyo konsernan lekel ki'n ekri sa zafer la. Me Selman Onorab Henrie in sorti bokou mwen maf ki Minis, ki li klerman *cannot be reached*. Minis pe zis *mark time* ziska ler son avyon i pare pou li osi kit pei.

Dezapwentman in vin pou nou bann *civil servants*, ki pe ganny menase ek gos dwat isi la dan sa Lasanble. E parey labitid i annan ki pare pou menm dekri nou bann travayer servis piblik koman move zerb. I pa en koensidans sa, akoz i pa fer premye fwa ki zot fer li.

SNP ler zot ti dan Lopoziyon, zot ti annan en kiltir maltret travayer servis piblik. La zot in ganny elekte dan Gouvernman, keksoz in vin pli pir ankor, la maltrete i double, ziska sef Gouvernman tou i debout lo *stage* pou maltret zot.

Napa pli gro siny en sentonm move *leadership* ki en dirizan pe debout lo en *stage* pou maltret bann ki travay par anba li. Dezapwentman pou nou bann travayer servis piblik ki pa pe war okenn mezir

soulazman pou zot dan sa Bidze.

Bann ansenyan ki sipoze annan en revizyon *scheme of service* ki lo papye sipoze vin an fors pou zot depi Avril 2023, pa'n tann okenn mansyon dan Bidze. Zot asize pe espere dan lenzir ditan konmsi en bann ebete.

Pourtan, si i annan en group dimoun ki donn tou, se nou bann ansenyan. La ozordi Gouvernman *LDS* in abandon zot lo en stasyon tren dan en pei ki napa ni tren. Ki ou en polisye, solda, ners, ansenyan, kad sipor, ou lezot profesyonnel dan servis piblik ki'n war ou bann benefis tel koman trezyenm mwan saler, ouswa *long service allowance* ganny vole par sa Gouvernman, mon le enform ou ki sa Bidze pa pe ofer ou okenn form soulazman.

I napa absoliman nanryen ladan pou ou. Sa Bidze i pa en veikil ki'n ganny met an plas pour ed ou motoris ou rev, ouswa pous ou lanbisyon pli devan. Sa i zis en Bidze tir la met la, e zis parey son met, i pa'n anvi vin la li osi.

Letan mon pe koz lo travayer servis piblik, ankor enn fwa mon oule redemann en kestyon, lekel ki pou pran ka avek nou bann travayer lasante silvouple? Lekel ki pe pran

swen avek sa bann ki pran swen avek nou? Lekel ki koz avek zot, konsey zot, *check in* avek zot, e gete si zot, *ok*? 3 an apre en pandemi global, la ozordi nou pe pas atraver en lot kriz sanniter, en lepidemi maladi respiratwar.

E se sa bann menm travayer lasante ki'n ganny rape, brile, ize diran *COVID*, la ankor enn fwa bezwen trouv zot a la oter pour reponn a irzans sityasyon ki devan nou.

E pandan sa letan ki'n pase depi *COVID*, in napa person ki'n *check in* avek zot, pour gete si zot *ok*. Ki mannyer zot pe *cope* avek sityasyon. Si zot leta mantal i ankor entakt swivan sa pandemi *COVID*.

Si zot pa santi zot fatige, epwize, deprimen, depase, ouswa senpleman trouv zot dan bezwen en pti led pou sey *cope* avek lavi. *Sadly*, mon pa vwar nanryen plis ki sa Bidze i annan pou ofer nou bann profesyonnel lasante. Sa Bidze, sa Gouvernman, sa Minis e menm Minis Lasante in fel nou bann travayer lasante dan en fason spektakiler.

Minis, a sa pwen mon annan en keksoz ki mon anvi adres avek nou bann ners. Nou bann ners i ava rapel letan zot ti desann lo semen, e fer lamars pou ganny en R30 mil *retention*

allowance. Mon anvi dir zot ozordi ki sa R3 mil la, ti'n fini ganny diskite. *Cabinet* ti'n fini aprouve, ti pe al ganny bidzete.

Eski zot konnen lekel ki ti konnen. Lekel ki Minis Adam ti diskite sa size avek? Sanmenm sa dimoun ki ti fer zot desann dan semen i ti konnen sa R3 mil i la.

In mont lo zot ledou, la ozordi i asiz li dan en gro sez kot i tous son *end of year gratuity* e i dir zot al soumet zot lekor anba *result base management* sa ki'n arive avek zot bann ners.

Ou kapab mazine ki la, o plen milye en lepidemi maladi respiratwar, nou bann profesyonnel lasante pe bezwen anmenn sa konba arme zis avek panadol e avek 2 zour konze. Akoz lamazorite latizann ki zot bezwen preskri pe fini, ouswa pe ganny prioritize pou lezot servis.

Letan ki mon pe adres nou bann kad, si i annan en group dimoun ki non selman dezapwente, me egalman demoralize, sa se nou bann solda, sa larme profesyonnel ki entel ti pe koz vantar lo la, ozordi in ganny pous a kote.

Sivilyen ki pe zwe *toy soldier* dan larme i fer sa ki i oule dan larme. E si lord i ganny mete, i tay kot son met, i al gele e la telefonn i marse. Me

pli pir ankor, i annan bokou promes ki'n ganny fer avek nou bann zonn dan liniform. E napa ni enn sa bann fo promes ki'n ganny reflekte dan sa Bidze.

A sa pwen permet mwan pour anvoy en mesaz pour Onorab Henrie. Mr Speaker, i napa person dan sa pei ki enterese pou pran pei par lafors, ni *United Seychelles*, e sertenman pa okenn nou bann solda. Be sa ki sa 80 pousan solda pou fer an 2025, se talonn *LDS* dan bwat vote, e donn zot en leson ki ava mark zot pour lavi diran!

Me dezapwentman i pa zis pour nou bann travayer, nou bann retrete osi in vwar zot rev ganny brize. E zot konfyans ganny vole par en group bater latet ki ti promet zot en Sekirite Sosyal R10 mil Sa Bidze i reprezant zero amelyorasyon dan zot sityasyon lavi, in napa okenn mezir ki'n ganny met an plas pour adres zot direkteman.

I napa okenn zefor ki'n ganny fer par sa Gouvernman pour esey soulaz bann dimoun ki pli aze dan nou sosyete, e sa dan li menm i fer onte Mr Speaker.

Be sa sityasyon i aktyelman pli pir ki nou le krwar. Bann *carer*, ki zot, zot sipoze okip nou bann dimoun

aze, zot osi zot in ganny konpletman rezete par sa Bidze. E i napa okenn provizyon ki'n ganny fer pou esey soulaz zot dan okenn fason.

Gard an tet, ki sa Gouvernman *learner* in kre en sityasyon *stress* otour nou bann dimoun aze. Kot non selman zot in elev laz retret, me zot in egalman fer li preski enposib pou fer en dimoun aze ganny akse avek servis *homecare* atraver sa ta lipou ki zot rode avek dimoun.

Ler mon get sityasyon ki pe ganny kree par sa Bidze, mon ganny lenpresyon ki si ou eze ou devret *ok*. Me si ou dan difikilte i annan en gran posibilite ki ou noye, e menm sa term eze osi pou bezwen ganny kalifye, akoz si ou pa tro, tro *secure* dan milye nenport ki ler ou, avek ou fanmir kapab war zot pe tonm pli ba fas avek bann sityasyon.

Lot size ki mon anvi aborde se koripsyon, en size ki pa'n ganny touse ditou dan sa Bidze. Koripsyon konmela nepli apel koripsyon, me i plito apel en *commercial confidentiality clause*. I annan en serten Minis, ki partou kot i touse, ou zis war sa zafer aparet konmsi par mazik. Apre i annan en bann laranzman dalon ki komans deroule.

Les mwan akont zot en zafer, dan kad reform ekonomik 2008, Sesel ansanm avek *World Bank* ti met an plas en *Government Development Committee*. Sa ti en Komite Endepandan, ki ti *vet* fezabilite bann proze kapital, avan ki proze ti resevwar finansman, zot in ferm li.

E ranplas li par en Komite enterministeryel, ki vedir nepli annan okenn form *project appraisal* endepandan lo bann proze kapital Gouvernman. Zot pe zis soz, zot soz antre zot menm la aprezan. Not byen, ki sa Komite ti en rekomandasyon *World Bank*. E la en sel kou an gran sa komite i ganny fermen, an menm tan nou vwar en leksplozyon dan la kantite proze kapital, apre pa bezwen oublie ki ou annan sa fame *commercial confidentiality clause*.

Prezan mon pou poz en kestyon, akfer ki en boug i tay devan e vin dir ki li son lanmen i prop, san ki person in akiz li? Dan labsans okenn lakizasyon, zis i decide vin devan e deklar lanmen prop.

Dir mwan sa ki ou anvi, me selman i annan en bon pe gro lera de pat la ater. E i annan lera ki lanmen i prop, prop pli prop ki tou prop. Be..e., apre 2025 mon krwar ki

nou pou bezwen pas en pe sa bann lanmen anba mikroskop.

Koman mon lo sa size koripsyon Mr Speaker, enn bann lazans ki vin en nespes trou san fon bidzeter se ACCS. *Now*, ACCS dan lannen 2021, ti vin amann son Lalwa pou permet li fer prosekisyon. Alors mwan koman en lezislater, mon'n preziman ki ACCS ti pare pou li fer kes.

E ki i ti bezwen annan en lalis kes pou li fer. ACCS i annan li 3 avoka etranze, avek en avoka Seselwa ki lo *retainer* e 38 *investigators* dapre ki ti ganny dir. E en pil pake milyon Roupri ki pe zis disparet dan zot trou san fon.

Ser, frer, Seselwa, avek tou sa ta resours, *guess* konbyen kes ki ACCS pe prosekite lo li menm devan Lakour, ale *guess? The grand total of* enn, en kes, zis enn, en sel, enn menm, pa plis, zis enn. Non, be konmsi, ennlè ou pa war sa zans pe pran nou pou yonyon?

Konmsi, ou le dir mwan sa gro ACCS, ek tou sa ta resours, i annan li zis en kes depi 2021 ki in kapab anmenn Ankour? *Wow*, be zot efikas selman, en?

An parlan *run* pei parey en biznes, ki biznes egzakte man ki *run* avek sa kalite zero lefikasite parey ACCS? Ki kalite biznes sa

enn ankor? Sa i bezwen en nespes biznes Bar Kourpa sa. Be ACCS i pa fer *result-based management* li? Oule dir mwan ki tou travayer Sesel i bezwen soufer avek sa malediksyon *result-based management* be selman li ACCS i kapab gaspiy kantite milyon ki i oule pou li fer zis en kes. Ensel kes. Enn menm.

Prezan, pou fer pli gou, ACCS i *answerable* direkteman avek Prezidan. Zot pe akiz tou travayer servis piblik pou trenn lipye, kan saler ACCS li pe trenn en manman lapat rezipel lelefan dwat anba nennen Prezidan e zot zwe pa war zot ditou.

Zot ava pardon mwan, si mon pe komans ganny lenpresyon ki nou Lazans Anti-Koripsyon, pe komans anvoy en bon loder koripsyon li osi.

La koman mon'n tous lo sa zafer *result-based management*, tou politisyen, ler in ariv lafen lannen, nou tou nou tous nou gratwite san ki person i vin rod okenn lipou avek nou.

Aprè nou menm nou politisyen, nou asize e nou dikte, ki nou prosen bezwen pas test pou tous zot trezyenm mwan saler. Non, be konmsi, ki kalite lepeser toupe kanze eski nou, nou annan isi anndan?

Bann pli gro ipokrit ki nou pa ankor ne lo sa later. Non be seryezman konmsi? In napa enn antre nou la isi anndan, ki'n nobou reisi anmenn en largiman ki lozik e koeran lo sa zistwar *result-based management*. Tou largiman ki mon'n ekoute i maf, i las, senpleman akoz nou en bann ipokrit nou tou.

Si politisyen *entitled* en *end of year*, tou travayer i devret mars parey, senp, se tou.

(APPLAUSE)

HON JOHAN LOZE

Sa i pa ni menm mon largiman, me i plito largiman zot Prezidan avan ki i ti menm vin Prezidan, alors, oli problem? Selman la ozordi zot in vin robot *yes men*, ni konn zot prop prensip zot pa konnen.

Minis i annan en zafer ki mon oule dir ou, ou war sa bout program sosyal, kot ou'n antre dan detay bann *statutory benefits* la, mon pa pe vin antre ladan sa enn. Akoz sa la, ou'n kopi direkteman dan kaye *SPPF* sa.

Ou'n asize ou'n kopi sa *homework* antye, mo pou mo, e ou pann sanz nanryen. Mon krwar ki kek par ou bezwen annan en bon disan *SPPF* ek ou pa posib! Zot ganny elekte pou

fer pli byen, pou aport sanzman radikal, pou anmenn bann lide inovativ liberal, e 3 an apre zot eleksyon zot ankor pe zwe dan bann *statutory benefits* anba Sekirite Sosyal? Vreman zot en nespes parti bat kannel zot! En parti kanmaron ki pe fer zis mars aryer.

Mon oule profit sa moman pour mwan osi felisit nou bann profesyonnel dan Minister Finans. Parey i toultan leka, zot pe fer en travay ekselan, avek en tre o nivo profesyonnalizm, ki fer nou tou Seselwa tre fyer koman en nasyon. Be en keksoz ki mon pa konpran selman, ki mannyer zot kapab felisit sa bann profesyonnel en moman, apre deswit vire e maltret zot?

Ler zot dir ki i annan trik, manboulouk, avek koripsyon dan *FA4JR*, lekel konmsi ki zot pe akize? Si pa sa bann menm profesyonnel finans? Lekel ki zot pe maltrete, e ensilte, si pa sa bann menm profesyonnel finans? Menm Minis in ensilte zot. In deza dir ki ti annan manboulouk ek koripsyon dan *FA4JR*.

Pourtan, i travay avek sa bann dimoun toulezour. E nou tou nou konnen ki *staff* finans ti annan *full* lotonomi pou zer *FA4JR*. Be lo lot kote, apre 3 an ou pa ankor fer nanryen pou adres manboulouk ek

koripsyon dan *FA4JR*, zis ou gronnyen? Be konmsi, ki kantite enkonpetan eski ou enkonpetan Minis?

Napa mezir pou adres pri lavi, sa i en keksoz ki bezwen ganny dir e repete. Menm si Gouvernman pe deklar nivo lenflasyon ki ba pour lannen 2023, sa i akoz bes dan depans anvi kou lavi ki ser.

(Interruption)

MR DEPUTY SPEAKER

1 minit Onorab.

HON JOHAN LOZE

Mersi Mr Speaker. Me an 2024, Gouvernman i espekte ki lekonomi pou grandi par 4poursan. Krwasans dan tourizm i pli gran faktor pou sa lagrandisman. Alors demann pou lenportasyon pou osi ogmante an 2024. Sa pou met presyon lo departman pou deviz etranzer ki fer ki nou Roupri i ekspekte deprese an 2024.

Sa pou fer ki pri komodite pou osi monte e fer lenflasyon pou alor monte parey Gouvernman in fer resorti. Alor ki mezir ki Gouvernman in met an plas pou 2024 pou soulaz kous popilasyon ki pou pli vilnerab Minis?

Pour mon konklizyon, mon pou retourn kot mon ti

komanse avek Bidze 2023. E reponn sa de kestyon poze par Hon Vidot, lo si nou koman en nasyon, nou kapab fer konfyans Minis? I reste mwan zis en paz Mr Speaker. Gouvernman in bezwen redwir son depans par R345.9 milyon dan *Mid-year Review* pou asire ki i pa fer en defisit plis ki R345.9 milyon an 2023.

Sa ti pou fer en defisit fiskal apepre 1.2 pousan konpare avek en sirplis fiskal 1.1 pousan ki Gouvernman ti'n planifye pou Bidze 2023. Sa i demontre move planifikasyon bidzeter e osi posibleman move prozeksyon bann faktor makro-ekonomik par Gouvernman. Sa i met an dout si Gouvernman pou akonplir son target 1.1 pousan ki in mete ankor pou 2024.

Menm avek sa move rikord dan prozeksyon fiskal, Gouvernman pe kontinyen avek depans tro o, partikilyerman dan proze kapital. Menm si lenvestisman dan proze kapital i enportan, sa osi i depan lo abilite Gouvernman e leta lekonomi en pei pou finans en Bidze.

I probableman ki pou lannen 2024 Gouvernman pou osi bezwen redwir proze kapital pandan *Mid-year Review* pou ki i pa fer en lot defisit fiskal.

An vi ki nou lekonomi ankor pe rekipere e bann devlopman enternasyonal i kapab osi enpakte nou adversman, i rekomannde ki Gouvernman i kontrol pli byen son depans.

De plis, nou ava rapel ki pou fer reveni monte, Gouvernman in entrodwir 2 nouvo *levy* lannen pase lo Sekter Tourizm. Mr Speaker, an lannen 2020 ler Gouvernman *US* ti prezant lamannman Bidze 2020, nou ti prevwar ki pou pran nou 5 an pou re-ariv lo nivo 2019. *LDS* pe tro tay avek keksoz. E zot pe met nou prose Bidze e finans piblik an risk.

Mr Speaker, mon oule termin lo sa not ki mwan, mon pa kapab fer konfyans sa Bidze e sirtou pa sa Minis. Sa Bidze i en Bidze trik ki'n ganny anmennen devan nou par en triker. Mersi Mr Speaker. *US* Sesel!

(APPLAUSE)

MR DEPUTY SPEAKER

Mersi Onorab. Nou *adjourn* la, e nou repran travay 2er.

(BREAK)

Mr Speaker in the Chair

MR SPEAKER

Bonn apre midi tou dimoun. Bon apre midi Minis. Bonn apre midi tou Manm Onorab. E nou zofisye Lasanble e osi piblik ki swiv nou. Nou a pran nou dernyen *round* entervansyon dan deba. Laparol i pou Onorab Wavel Woodcock.

HON WAVEL WOODCOCK

Mersi Mr Speaker. Bonn apre midi tou Manm e tou dimoun a lekout espesyalman zabitan Grand Anse Praslin. Mr Speaker, avan ki Ladministrasyon *LDS* ti antre dan Gouvernman an Oktob 2020, pour plizyer lannen zil pros, Praslin avek La Digue ti'n ganny negligez.

Bokou bann fasilite Gouvernman ti'n tonm anrim e plizyer servis enportan ti manke lo nou zil. *Fast forward* 3 an pli tar e nou vwar ki bokou Servis Gouvernman in ganny desantralize e nou annan plizyer nouvo lofis Gouvernman ek bann lazans lo Praslin, pli resaman lofis anrezisteman, pou later avek biznes.

An plis ki sa, bokou nouvo fasilite ki pou plizyer lannen zabitan Praslin avek La Digue ti a pe demande in ganny konstrir. Depi ki *LDS* in antre dan Gouvernman menm si nou pei in fer fas avek en kriz

lasante e ekonomik Ladministrasyon LDS in fer devlopman zil pros vin en priorite.

Mr Speaker, atraver ou yer Onorab Uranie ti pas en komanter lo Komite MYSCC, Komite ki responsab pou Meday, Lazenes, Sport avek Kiltir ki mon *chairman* sa Komite. En Komite Lasanble ki annan 5 Manm LDS ek 2 manm US.

In dir ki menm si sa komite in fer plizyer vizit avek Minis ek bann zofisye, e menm prezant rapor devan sa Lasanble, sirtou kot i konsern bann fasilite *sport* Gouvernman in sourd lo nou.

Mr Speaker, mon bezwen koriz Onorab Uranie aköz apre plizyer *meeting* ki nou Komite MYSCC in fer e apre plizyer rapor ki'n ganny prezante in annan rezilta. Onorab Uranie pou rapel Mr Speaker ki le 16 Oktob 2021 MYSCC ti fer en visit La Digue, kot nou ti visit *La Digue Sport Complex*. Onorab Uranie ti la dan sa visit.

Dan sa visit nou ti vwar leta sa *Sport Complex La Digue*, avek tou son defayans. Tol *sport complex* ti'n ariv lo *court tennis*. Nou pa ti kapab mont lo premye letaz, aköz ou ti kapab pas an pasan e tonm anba. Laplenn ti deza dan move leta.

1 an pli tar lo en lot vizit komite, nou'n vwar ki plizyer travay in konmanse enkli en twatir, en nouvo twatir lo *grandstand* kot spektater i asize. E lannen prosen pou annan ankör R1 milyon pou fer travay lo sa *sport complex*. En *sport complex* ki ti dan en letan enpitwayab!

Mr Speaker, Onorab Uranie pour MNA ki son zil pe ganny plis proze pour benefis son zabitan i konplent plis ki tou lezot MNA. Dan vizit ki nou ti fer La Digue, nou ti osi vizit *Youth Service Bureau La Digue*, ki ti dan en pti lespas dan en *attic* ki pa konvenab pour bann zenn servi.

Bann zenn enkli *staff* SNYC La Digue ti fer demann pour en lot landrwa e Onorab Uranie ankör enn fwa i ti la prezan.

Mr Speaker sa ki Onorab Uranie pa'n dir, se ki dan Bidze 2024 i annan 6 milyon pour en *Youth Service Bureau La Digue*. Mr Speaker, Gouvernman i ekoute.

I pran kont rapor bann komite ki sorti dan Lasanble, sa i enkli rekomandasyon pou lofis *Youth Centre* retourn English River ki pli konvenab. E pour annan en Bidze R3 milyon an 2025 pou fer renovasyon e *extension* lo sa sant.

Mr Speaker, mwan personnelman a plizyer repriz mon'n anmenn plizyer konsern bann zenn lo Praslin dan Lasanble, swa atraver kestyon, dan deba Bidze, SONA e dan plizyer vizit avek Minis e menm dan bann travay Komite lo size Lazenés ek Spor.

Mr Speaker, dan 7enm Lasanble mon'n fer de vizit ofisyel *Youth Hostel*, enn konman MNA Grand Anse Praslin ki mon ti fer avek Minis Valentin. E lot vizit dan mon kapasite konman *Chairman* Komite MYSCC avek bann lezot manm komite.

Mr Speaker, Minis pour ledikasyon i en Minis ki ekoute. Dan tou le de vizit nou ti ganny sans enterakte avek bann zenn *Youth Hostel*, e demann ki bann zenn zil pros ti fer se:

1. Pou ogmant zot *allowance*, ki'n ganny ogmante par R600 pour 2024. En demann ki nou komite ti fer resorti dan nou rapor ki ti ganny prezante devan sa Lasanble.

Mr Speaker, apre mon enteraksyon avek plizyer paran lo Praslin, i annan bokou paran ki ti pe propoze ki zot zanfán i kontinyen zot letid pos segonder lo Praslin. E mon annan de trwa paran ki ti demann mon pou koz avek

Minis Ledikasyon e propoz avek li pou antre dan en konversasyon avek *Vijay International School* pou ki zot zanfán i kapab fer *A Level* dan sa lekol olye al Mahe.

Mr Speaker, en propozisyon ki mon ti diskite avek Minis. Minis ankore enn fwa in ekoute, e in koz avek *Vijay International School* e vwala rezilta. En desizyon ki bann paran lo Praslin i byen apresye.

(APPLAUSE)

HON WAVEL WOODCOCK

Mr Speaker, depi ki *US* i o pouvwar, zanmen en konvansyon in ganny organize pou bann *teachers* lo Praslin ek La Digue, kot zot kapab enterakte avek Minis, e devid zot leker san okenn reperkisyon.

Mon rapel dan en konversasyon avek Minis kot mon ti dir li ki bann *teachers* Praslin zot anvi vwar li e annan en konversyon avek li. Akoz person pa'n enterese avek bann *teachers* Zil Pros dan le pase.

Vre Mr Speaker, en konvansyon ki premye fwa dan listwar Zil Pros in ganny organize pour tou bann *teachers* Praslin, La Digue, e

mon ti la Mr Speaker. Me Onorab Uranie ki en *ex teacher*, i pa ti la parey son labitid.

Mr Speaker, *allowance* pour bann manman lo Zil Pros ki al donn nesans Mahe pou sorti R1500 pou vin R5 mil. Mr Speaker atraver ou mon anvi dir avek Onorab *Leader* lopoziyon ki avan ler i koze rod son lenformasyon byen, si i napa nanryen pou dir pa dir nanryen.

Mr Speaker, *LOTO* ti demande akfer met sa R5 mil dan Bidze pour bann manman ki al donn nesans Mahe si nou annan Lopital La Digue? Mr Speaker, sa larzan i pou tou bann manman Praslin ek La Digue ki donn nesans pour la premye fwa. Sa in leka pou bokou letan, an ka konplikasyon tou bann manman ki donn nesans pour la premye fwa zot al Mahe.

Sa i enkli bann manman ansent ki annan konplikasyon dan zot lansentman. Bann manman ki'n deza fer *caesarean* e osi bann manman ki pe al ganny zot 4enm zanf. Annou koz sa ki nou konnen silvouple.

Mr Speaker,
Lopoziyon zot leker i fermal, akoz Ladministrasyon *LDS* in fer sa Lopital La Digue,

enn parmi plizyer promes vid ki zot pa'n deliver Mr Speaker.

Mr Speaker, *Leader* Lopoziyon ti dir ki Ladministrasyon *LDS* i zis fer plan parti plan, annou koz lo plan:

US in toultan annan plan, *master plan* isi, *master plan* laba, bann proze ki ti pou materyalize lannen de mil zanmen. Dan zis 3 an tou sa bann fo promes, ek sa bann plan ki ti pe pous gommon lo *shelf*, nou Gouvernman in tire, in tap lapousyer lo la. E bokou swe sa pep pou plizyer lannen pe ganny akonpli sirtou swe zabitan Zil Pros.

Zot le koz lo plan ek proze, annou koz lo plan ek proze: Ile Eve, Mr Speaker, napa en dimoun dan sa Lasanble enkli 6enm Lasanble ki'n koz lo Ile Eve plis ki mon. Ler mon ti konmans koz lo Ile Eve Mr Speaker, lo komansman ti annan en Onorab ki ti trankil, akoz son non ti osi ti lo lalis Mr Speaker, pou li ganny en bout later Ile Eve.

Son non ti lo Lalis Mr Speaker menm si i ti deza pe *lease* en gran bout later Marie-Jeanne ki i ti drwa R1.05 milyon sa letan. Mon pa konnen si in fini peye ouswa in rann, sa son zafer pou li. Sa later Marie-Jeanne Mr Speaker, fodre note

ki i ti a pe e *lease* i enn parmi bann later ti ganny *acquire* malapropo par Gouvernman Albert Rene avek en manm fanmir Grandcourt.

Mr Speaker, mon pa konnen prezan si sanmenm son lakoler avek non sa *passenger terminal* i “ERO”, en proze ki swadizan ti vizyon Albert Rene 2000 ‘zanmen.’ Mr Speaker, mon remersye Minis Devika pour sa lord ki in mete Ile Eve.

Ile Eve ti en dezord total. Se mon ki ti kler sa tors 15 batri dan 6enm Lasanble lo koripsyon ek *lands speculation* Ile Eve, kot dalon bann *ex MNA*, aktivis *US*, enkli en bann ki ankor pe *campaign* avek Onorab Gill ti ganny later pou R30 mil, R40 mil apre vann pour milyon Roupi.

La ozordi zot annan lodas pou vin koz Ile Eve labous plen. Mon’n fer remark Mr Speaker, depi ler sa *parcel* in antre i pe koz en pe bokou. I annan en alokasyon R30 milyon pour devlopman Ile Eve.

Ile Eve ti en dezord. Ti napa okenn *land use plan* ki ti pe ganny swiv. La lord in ganny mete, semen pe ganny fer, drenaz, koneksyon delo ek elektrisite dan plizyer landrwa ki ti napa. E sa lannen 25 morso later in fini ganny

allocated avek bann biznesmenn Praslinois.

Sirtou bann ki ti’n ganny pini e viktimize dan le pase. I reste 27 morso later ki pou al lo *tender* byento. Zil Kato Nwanr osi byento pe al lo *tender*. I pa pou ganny partaze parmi dalon ek zanmi parey ti leka pou Ile Eve dan le pase.

Mr Speaker tou bann travayer Gouvernman in ganny en logmantasyon 10poursan sa lannen. Ozordi *US* in dir zot pou donn plis.

Kan dan listwar *US* ki zot in deza donn 10 poursan logmantasyon? Kekfwa ou ti a ganny en pti R100 ouswa R200, ou R50 Sekirite Sosyal sak fwa lanniverser Prezidan Rene.

Apard sa ou ava rape. Sel letan ki zot ti le donn 5poursan sete avan eleksyon 2020 kot zot ti le donn 5poursan zis lo saler de baz.

Menm dan en letan kot pei pe *recover* apre *COVID 19*, *LDS* in donn 10poursan lo saler debaz azoute avek *allowance*. Si zot ti anvi donner, akoz ki zot pa’n zanmen donner tou sa letan? Akoz ki Sekirite Sosyal ti dan R3 mil ziska ler *LDS* dan Lopozisyon ti met presyon lo zot pou fer monte? Akoz ki zot pa ti zanmen donn goute zanfan lekol parey *LDS* in fer ozordi?

Ladan menm, en gran dokter i dir ki zanfan pe mor lafen La Digue. Tou zanfan ozordi i kapab ganny goute e dezennen lekòl, sa en lakonplisman nou ladministrasyon. Zanfan pa bezwen konmans leson vant vid.

Mr Speaker, *LOTO* pe demann eleksyon an 2024. Iresponsab Mr Speaker. Manda i 5 an, sa se laswaf e vorasite pouvwar!

(APPLAUSE)

HON WAVEL WOODCOCK

I fek pe koz lo gaspiyaz larzan selman i pe rod eleksyon ki vin avek en kou sibstansyel. Zot abitye fer eleksyon boner Mr Speaker, parey ler zot ti dizourd Lasanble an 2020 apre zot ti anmas en ansonmen kondire!

(APPLAUSE)

HON WAVEL WOODCOCK

Prezan sa ki enteresan, en Manm ki pa'n zanmen ganny elekte ki pe demann eleksyon, ki pa ni konnen ki savedir debout dan en eleksyon e travay ki en *MNA* elekte i fer Mr Speaker!

(APPLAUSE)

HON WAVEL WOODCOCK

Annan en pe pasyans zot gro defet pe vin ankor an 2025. Bokou lanfaz pe ganny mete lo *maintenance* bann semen primer avek segonder. En konsern nou popilasyon pour bokou lannen, se leta bann semen, sirtou lo nou de zil prensipal Mahe avek Praslin ki ti dan bann move kondisyon.

Koltar pe ganny mete partou Mr Speaker. Koltar in ganny mete lo Semen *Consolation* ki pou bokou lannen zabitan pe demande. I annan R3 milyon osi dan Bidze pour kontinyen travay lo Semen Pasquiere. R21 milyon pou re sirfas semen lo Praslin avek La Digue.

Ozordi partou kot ou pase, lo Mahe, avek Praslin ou vwar nouvo cours koltar pe ganny mete, e plizyer semen pe ganny agrandi.

R1 milyon pe ganny donner pour sak distrik pour bann pti proze kominoter pou tou bann zabitan dan nou distrik.

Mr Speaker, *United Seychelles* i annan problemm avek nouvo lopital lo Mahe, parey zot ti annan problem avek Lopital La Digue. Olye donn en koudmen, zot kritik Gouvernman akòz i pe demann Seselwa pou kontribye

volonterman dan en fon pour konstriksyon sa lopital.

Mr Speaker, sa ler *US* i kapab fer en kontribisyon, sirtou la ki zot pe taye pou vann zot bann later, *asset*, met en pti mwenza dan sa fon, dapre konpran setaki pe donn bal dan sa bann milyon. Be ou le dir mwan, zot pa pou rann kont avek zot siporter ki zot pe fer ek sa bann milyon?

Mr speaker, mon pa la pou fer konpetisyon avek Onorab Gill lo lekel ki'n demann plis pou Praslin? Lekel ki ti demann tel proze avan? Me sa ki mon konnen se ki ler nou ti dan 6enm Lasanble, mon ti demann son ladministrasyon, e li osi i ti demann son ladministrasyon.

Me son Gouvernman ti sourd lo nou; nanryen, nanryen son Gouvernman pa ti fer.

Dan 7enm Lasanble ankore Mr Speaker, mon'n demande, li osi in demande Mr Speaker. E Onorab Porice osi in demande, me diferans se ki Ladministrasyon *LDS* in ekoute.

(APPLAUSE)

HON WAVEL WOODCOCK

E zot in aksyon lo demann zabitan Praslin. Zot in fer sa bann proze ki ti zis bann promes dan vid, bann promes

bat latet e fer krwar sak fwa eleksyon pe aprozé. Nou Gouvernman pa'n zis koze in pran aksyon. E rezilta se plizyer proze lo Praslin ki pou benefisyé tou zabitan Praslin, Baie Ste Anne avek Grand Anse.

Mr Speaker, Lopozisyon i ankoler aköz *STC* in fer en profi. *STC* i bezwen fer profi, aköz zot in tir *middleman*, pli gran *middleman US* Mr Speaker.

Pli gran *middleman US* Mr Speaker pe ganny zize ozordi, fodre pa zanmen bliye sa gran *middleman Capital trading* ki ti pe fer profi lo lasyer Lepep Seselwa! Fodre osi pa bliy sa gran parti voler *SPUP*, *SPPF*, ki ti pe lwe en propriyete avek Gouvernman pour selman R73 mil apre re lwe sa menm propriyete pour R850 mil avek *STC*.

(APPLAUSE)

HON WAVEL WOODCOCK

E pli tar vann sa menm propriyete pour R17 milyon Mr Speaker! Annou pa bliy letan *SMB* kot *SMB* ti *personal bank account* en parti politik ek de mafia, enn i lo rimann, lot i anba beton ozordi. Ti napa okenn rann kont ki fason larzan ti pe ganny depanse sa letan. E pa bliye sa 50 milyon Dolar ki Prezidan Rene ti dir ti antre dan

kont *SMB* pou aste manze pour Seselwa ki'n disparet lo en balye fatak ozordi Mr Speaker.

Zot pe koz lo soulaz sa pep? Donn en pe sa R17 milyon malaki avek tou sa larzan ki zot in akimile pandan sa dernyen 43 an.

Mr Speaker, nou Gouvernman pe fer bokou pou ede donn en soutyen nou pep, fer vini manze zannimo pou ede fer desann kou elevaz zannimo an giz pou ede fer desann kou lavyann.

Pou osi ed sa sekter, Gouvernman i bezwen ed zot ganny akse avek *loan* ek finansman ki difisil pou zot gannyen sirtou ler zot al kot bann Labank Komersyal e menm *DBS*. Zot pe akiz Prezidan pou voyaze, sa ki enteresan se ki sak fwa nou Prezidan i voyaze i pa retourn Sesel lanmen vid. I pe re batir kredibilite e repitasyon Sesel.

Atraver Prezidan ansanm avek nou Minis Zafer Etranze ozordi Sesel in benefisy e avek plizyer *grant* pou bokou proze enportan, sirtou proze semen *west coast*. I annan R200 milyon pour faz 2,3 ek 4 sa semen.

US pe konplent ki sa larzan pa pe antre dan kont piblik, me pe pey kontrakter direktman. Mr Speaker,

konman lontan si sa larzan ti antre dan kont piblik bann mazisyen ti pou fer disparet parey zot ti fer disparet 50 milyon Dolar!

(APPLAUSE)

HON WAVEL WOODCOCK

Sanmenm zot lakoler Mr Speaker zot nepli kapab fer larzan disparet dan kont piblik parey zot ti abitye fer dan le pase. Atraver bann negosyasyon Gouvernman avek bann pei zanmi ozordi Sesel pe benefisy e avek bokou proze ki enkli lekol La Digue e osi Lopital *St Mary* ki'n fini konplete e pe deservi zabitan La Digue.

Mr Speaker mon kontan tann *US* pe koz lo egalite loportinite, me selman tou Seselwa i konn tre byen ki mannyer zot ti viktimiz e pini bann ki pa ti ek zot dan le pase.

Bann letan kot zis zot bann dalon ki ti benefisy e avek tou kontra Gouvernman. Ozordi tou proze i al lo *tender*, e tou dimoun i kapab *apply*.

Mr Speaker, ozordi zot pe sot anler pe koz lo viktimizasyon, me selman i annan bokou manm Komite Santral ki dan bann bon pozisyon dan Gouvernman. Konman lontan zot ti'n fini ganny pouse.

Zot pe dir ki Prezidan ki'n donn lord pou anmas Mr Herminie, me selman tou Seselwa i konnen lekel sa parti ki'n pey Ali Ali £4000 pou vin Sesel pou fer *voodoo* pou zot ganny eleksyon 2025.

Mr Speaker, zanmen dan listwar nou pei in annan sa laliberte lekspresyon parey i egziste dan nou pei ozordi. Sa se gras a en Ladministrasyon LDS ki'n liber sa pep. Ozordi personn pa per pou koze, zot kapab dir nenport kwa.

Zis parey ler Dokter ti dir ki son larm i koule, ler i vwar en lopital vid La Digue, i pa ni ti ankor fini koze Mr Speaker, pa konnen keler ban Lopital *St Mary* ti'n plen avek aktivis *US* ki ti bezwen swen lasante enkli en *MNA* apre ki *voodoo* ti'n refoul ek zot La Digue! Zot ki'n batiz Lopital *St Mary*.

Sa Minis Finans Mr Speaker, ki la devan in deza ganny nominen a de repriz konman *Finance Minister of the year* parmi 54 lezot Minis dan pei Lafrik.

(APPLAUSE)

HON WAVEL WOODCOCK

Sa i en *recognition* travay ki sa Minis in fer pou ed sa pei redebout lo son lipye. I pa en Minis *organic loss* ouswa en

Minis ki pa konn konte parey zot Minis avan.

Mr Speaker, lalis proze ki nou Gouvernman in fer pandan zis 3 an i remarkab. Proze Lasose Praslin ek La Digue, proze lapes, *ice plant*, *gear stores*, bazar Grand Anse avek Baie Ste Anne, proze batiman *NIHSS* ki ti'n ganny abandonnen, Libreri Nasyonal, renovasyon e konstriksyon plizyer nouvo Ladministrasyon Distrik, proze lopital La Digue, proze drenaz La Digue, proze *VTS* Ile Eve Praslin, en proze ki depi dan 6enm Lasanble mon'n demande sanses.

Menm si *A New United Seychelles* pa ti ekoute, me mwan mon apresye ki nou Minis, Minis Derjaques in tann nou lapel. En proze ki pour bokou lannen nou zabitan pe espere.

Mr Speaker, *MRP* in ganny mete lo 15 komodite de baz pour ede kit sa bann komodite Sesel lo en kou abordab. Mr Speaker, *United Seychelles* zot lekor zot pa ankor kapab *investigate*, selman zot le *investigate LDS*.

Mon demann *Chairman FPAC*, Onorab Pillay, pour *investigate* bann Later Gouvernman malaki ki *United Seychelles* in akimile.

Zot pe kritik leta Linyon La Digue ozordi, me zot bli vitman ki se Prezidan Ramkalawan ler i ti *Leader* lopoziyon e *Chairman FPAC*, se li ki ti al met lord Linyon e ozordi Linyon pe fer profi.

Anba *United Seychelles* Linyon pa ti pe fer en sou profi e larzan ti pe zis anvole lo balye fatak. Kote larzan tiket ti pe ale? Mon poz sa la.

Leader Lopoziyon, *Leader* Lopoziyon pe fer bann fo alegasyon ki nou Gouvernman i koronpi. Si ou annan levidans, vin devan avek, pa ou ki *Chairman FPAC*, fer ou louvraz!

Ozordi *SPGA* ki avan ti *SNPA*, pe anmas plis larzan dan bann park maren e bann Park Nasyonal pe zer larzan bokou pli byen. Nou pa pe tann zistwar dife dan Zarden Botanik pou kasyet vol larzan Leta. *SFA* pe fer plis profi e pe pey pli gro *dividend* Gouvernman.

Mr Speaker, sa lespri *marxist* kominis i ankor avek zot. Sa disan diktater, kontrol e manipil dimoun i ankor avek zot.

Si ou ekout zot koze, ou ava krwar ki zot anvi ki tou dimoun i ganny menm saler, kot en sekreter pou ganny menm saler avek son *manager*. Kot en *pool attendant* pou ganny menm saler avek en

general manager, kan nou tou nou konn tre byen ki dan en pei demokratik saler i depan lo pozisyon, responsabilite, leksperyans e ledikasyon. Sa kalite lespri ki *US* pe sey avanse se en lespri kominis.

Sak fwa bann Manm *US* i koze, ou pou krwar zot bann profet *doom*. Napa nanryen ki bon pou zot, tou keksoz pa bon. Zis parey avan eleksyon 2020 zot ti pe senm zot bann fo propagann ki pei pou *faid*, avyon pou aret apoze, lapli pou aret tonbe, tou dimoun pou mor lafen, bann pei a aletranze pa pou rekonnnet Sesel.

Mr Speaker, ozordi Sesel pe pli byen ganny rekonnnet dan lemon ki anba *US*. Ozordi bann Lanbasad ki ti'n sorti Sesel pe retournen.

Bann pei zanmi e bann lorganizasyon enternasyonal i annan plis konfyans dan Ladministrasyon *LDS* ki dan ladministrasyon *United Seychelles*.

Mr Speaker, mon'n war en pti *clip* kot *ex* Minis, Onorab Cosgrow pe entrodwir son bann *leaders* dan zot *rally* La Digue, Dokter Herminie, Dokter Fanny e in menm entrodwir Onorab Pillay konman Dokter Pillay, in byen donn li son tit. Akoz Onorab Pillay i dokter dan mansonz, dokter dan

fabrikasyon e dokter dan fo propagann.

(APPLAUSE)

HON WAVEL WOODCOCK

E i pe byen ansenny son bann zelev. Byento zot tou zot pou annan Doktora dan lagrikiltir, pou plant lagrenn bat latet.

I enteresan Mr Speaker, ler mon'n tann Onorab Vidot pe dir ki *LDS* in pran, pran e pran tou sa ki pou zot. Wi Mr Speaker, nou'n pran tou sa ki pou nou. Me *United Seychelles* in pran, pran e pran tou sa ki pa pou zot.

Sa diferans ant *LDS* avek *US*. *US* zot anfanmen, ler zot war sa ki pa pou zot, zot eksite, zot le plere Mr Speaker. Me *LDS* i krwar dan travay dir pou ganny sa ki pou li, pa ranpli zot pos avek larzan malaki parey Onorab Lemiel ti pe koz lo la yer.

Onorab Vidot i annan lodas pou dir ki Seselwa ti pe viv pli an sekirite anba *US*. Serye? Mr Speaker, si i annan en parti kot plis Seselwa in ganny plis martirize, bate, tortire, pini, viktimize se pa lot ki anba *SPPF* ozordi *A New United Seychelles*. Ozordi *rate detection* par lapolis i bokou pli o.

Koman en krim i ganny komet, dan lespas erdtan e menm mwens ki en zour sa ki'n komet sa lofans i ganny arete. E ou vwar en pti kominike lapolis ki dir ki entel in ganny arete. Mon felisit bann zofisye lapolis pou sa bon travay ki zot pe fer.

Mr Speaker, Onorab Lemiel in servi en analozi, in fer referans nou pei avek en bef, in dir ki ler nou aksepte bef nou bezwen aksepte bef avek son korn.

Mr Speaker wi, nou pou aksepte sa bef avek son korn, me tou karapat lo sa bef nou pou tire; nou'n tir koripsyon, nou'n tir vol, nou'n tir gaspiyaz larzan, nou'n tir "ek nou pa ek nou", e definitivman nou'n tir lapreferans ek viktimizasyon.

Mr Speaker, mon'n la dan 6enm Lasanble e mon'n perdi kont kantite fwa ki Onorab Lemiel pe demann son Gouvernman pou ganny plizyer proze ki ozordi mon pe war dan Bidze. Parey semen Gran Riviere, *indoor gymnasium*, me ler i ti demande anba son Gouvernman akoz i pa ti gannyen? Zot ti sourd lo li.

Dir gran mersi *LDS* ki tou sa bann proze Anse Royale, pe materyalize. Savedir son ladministrasyon ti pe *fail* li. La mon krwar i reste li zis de swa, swa i *cross the floor* ouswa aret

engra e remerisi sa Gouvernman pou get dan *welfare* son zabitan ki'n met li la.

(APPLAUSE)

HON WAVEL WOODCOCK

Mr Speaker, mon rapel dan 6em Lasanble, mon ti anmenn en Mosyon pou demann plizyer servis ek fasilite kot Lopital Baie Ste Anne, ki enkli en laboratwar, *oxygen plant, maintenance* lo *hyperbaric chamber, laundry* ek lezot ankor.

Pou plizyer lannen in annan en alokasyon bidzeter pou sa proze, me ziska prezan i pa ankor materyalize. I ti osi reflekte dan Bidze lannen pase. Mon fer en lapel avek Minister Lasante pou fer tou posibil pou sa proze vin en realite an 2024, en proze ki'n ganny bidzete pour R4.5 milyon.

Mr Speaker, leta bann fasilite *sport* lo Mahe, Praslin e La Digue, ler *LDS* ti vin o pouvwar ti dan leta deplorab. I annan en bann ki ti'n pouri. Mon konn byen, aköz mon lo Komite Lasanble ki responsab pou *sport* ki'n vizit plizyer sa bann fasilite.

Ladan menm Onorab Aglae i annan lodas apel nou Gouvernman en Gouvernman *maintenance*. Nou bezwen vin

en Gouvernman *maintenance* aköz partou kot nou tyonbo ti pouri.

Zot in les preski tou fasilite nasyonal tonm anrim enkli Libreri Nasyonal ki'n nou refer ozordi. Olye konplent donn legzanp ou avek ou bann *leaders* fer en donasyon liv avek sa *library*, olye asiz dan plantasyon anler Port Glaud.

Si ou pou get dan Bidze 2023 e dan Bidze 2024, ou pou vwar lalis bann travay pou amelyor e fer nouvo fasilite *sport*. R22 milyon pou aranz Stad Linite. R7.35 milyon renovasyon lo *Palais de Spor*. R1.2 milyon pou sanz twatir e fer lezot travay lo batiman *Judo* ek *Table Tennis*.

Renovasyon lo *La Digue Sport Complex*, renovasyon lo *tennis court* Roche Caiman. 1 milyon pour renovasyon *Water Sport Centre* Praslin. R4.35 milyon pour renovasyon lo Stad Amitie.

I osi annan en sonm pour en *Mini-Palais de Spor* Grand Anse Praslin pour en sonm R7.5 milyon ki pou konmanse an 2026. E en sonm R6.5 milyon pour en fasilite *combat sport* pou *Judo* avek Laboks. I osi annan R10 milyon pour renovasyon lo lezot fasilite *sport* lo Mahe, Praslin e La Digue.

Mr Speaker, en proze enportan ki nou bezwen se en nouvo lakres pour Grand Anse Praslin. I annan diskisyon deza avek SIA ek Minister Ledikasyon pou idantifye teren. Annan tandan mon oule remersye Minis Ledikasyon, pour sa zoli travay ki zot in fer lo lakres Anse Kerlan, i en travay ki bann paran e zanfan i byen apresye.

Mr Speaker, mon'n tann US pe koz kont sa *environment levy*. Me i enportan note ki sa *levy* pou ede anmas larzan pou prezerv nou lanvironnman e osi pour amenazman nou bann lakot ki pe ganny andomaze par lerozyon.

Tou touris ki vin Sesel zot kit en *carbon footprint* e i enportan ki zot osi kontribye dan prezervasyon nou lanvironnman. E pour lannen 2024 i annan en sonm R29.3 milyon pour proze lakot Amitie, Roche Corbizeau. En proze ki san ses mon'n demande dan sa Lasanble.

I osi annan R3.6 milyon pour renovasyon lo lekol primer Grand Anse Praslin e R6.5 milyon pour renovasyon lo bann blok Praslin segonder. I annan 8 *housing Unit* Mont Plaisir. Renovasyon Ladministrasyon Distrik Grand Anse. R3.4 milyon pour

renovasyon Anse Boudin pour bann program reabilitasyon pour bann *addicts*.

I osi annan R3 milyon pour *road widening* Grand Anse Praslin. R3 milyon pour kontinyasyon Semen Pasquiere. Konstriksyon en *dog pound* Praslin, ki ava ede rezourd sa problem lisyen eran, sirtou dan Amitie kot zot pe fer bokou dega.

I osi annan R1.5 milyon pour *Coastal Rehabilitation Consolation*. 1.138 milyon pour en *box culvert* mazer lanmar St Joseph. En *Micro-Enterprise Centre* kot *ex STC* o bor lekol Grand Anse Praslin pour R3.685 milyon pou fer provizyon lespas pour bann pti biznes dan mon distrik Mr Speaker.

Mr Speaker, an konklizyon mon le profit sa lokazyon, pou remersye tou zabitan Praslin pour zot rezilyans e sipor pandan sa 3 an. Nou'n sirmont bokou ansanm e ansanm nou pou realiz plizyer nou bann rev e laspirasyon.

Mon le osi remersi zabitan Grand Anse Praslin pou sa bon lakey ki zot in donn nou bann aktivis Sanmdi pase dan distrik. E sa bon moman ki nou'n pase ansanm sanmdi Marie-Jeanne.

Mon le osi remersye mon *clerk* Marcella pour son devosyon e sipor. Mon oule remersi osi DA Grand Anse Praslin Chantale Laure ek *Liaison Officer* pou travay ki nou'n fer ansanm. Mon oule remersi ankor enn fwa Mr Speaker, tou zabitan Grand Anse Praslin, tou zabitan Praslin, mon fanmir. E en remersiman spesyal Mr Speaker, pour mon *mentor* Kaptenn Luc Grandcourt, sirtou pou sa pti *call* bomaten pou ankouraz waon. Avek sa 2 mo, mon dir ou mersi Mr Speaker.

(APPLAUSE)

MR SPEAKER

Laparol i aprezan pou Onorab Francois Adelaide.

HON FRANCOIS ADELAIDE

Mersi Mr Speaker. Bonn apre midi Mr Speaker. Bonn apre midi tou Manm Onorab e tou dimoun ki a lekout.

Mr Speaker, dan sa lepok kot i annan bokou lensertitid, lager ant diferan groupman pei ki Sesel i depan bokou lo zot, mon kontan pou tande atraver lentervansyon Minis Hassan ki Sesel in kapab reste solid. Touzour lo bon semen prosperite, kot nou fason fer in

vin en legzanp pou lemond lo lafason ki Sesel i zer son lekonomi e soutenir son pep.

Mon oule remersi gran met pou sa bon plan ki in toultan annan pour nou pei Sesel. Menm si nou pa ti pe vremen konnen e konpran akoz ki in pran tou sa letan kot LDS ti pe bezwen espere, pour kapab ganny sa posibilite pour diriz sa pei.

Zot a dakor avek mwan ki dan sa moman kot i annan bokou lensertitid, Sesel ti bezwen bann dirizan kalib konpetan, solid, kouraze, entelizan, ki annan sa volonte pou kapab pran bann desizyon brav.

Menm parfwa pa popiler, kot parti minoriter in sezi tou loportinite, fer krwar avek lepep ki nou pa kontan zot, nou pe pini zot. Kot Lopoziyon in *boycott* tou keksoz, zis pou donn lenpresyon ki Sesel i dan mal e pe tonm dan presipis.

Ozordi, mon fyer e mon annan sa loner pour konfirm avek Seselwa e lemond antye, sa sel tim ki anmenn sa kalib e konpetans se pa lot ki lekip LDS.

(APPLAUSE)

HON FRANCOIS ADELAIDE

Ki swa dan Gouvernman, ouswa dan Lasanble Nasyonal. Touzour siporte par bann aktivis e siporter serye e tre fidel. Atraver ou Mr Speaker, mon anvi mon anvi remersye Minis Hassan avek son tim pour sa Bidze ki zot in prezant avek Lasanble Nasyonal Vandredi Pase.

En Bidze ki'n ganny bokou apresye par mazorite Seselwa. Mon oule osi remersye tou bann akter kle swa dan Departman Finans, Sekter Piblik, Sekter Prive, zanmi Sesel e tou dimoun ki'n kapab fer zot kontribisyon pour ki sa Bidze in kapab ganny realize. Mon'n ekoute, mon'n konsilte, mon'n analize.

E mon konvenki ki sa Bidze i enn ki anmenn ankor lespwar e ki laplipar Seselwa i war en pti keksoz pour li apard ki detrwa swadizan *Leaders United Seychelles*, ki fer krwar napa naryen pou zot. Mr Speaker, sa Bidze i pou sipoze ;

1. Amelyor e valoriz lavi dan nou kominote.
2. Asiste bann sitwayen ki pli vilnerab.
3. Envestir dan bann lenfrastruktir pou epanouisman nou nasyon.

Lavi kominoter i byensir en eleman ki pour tous bokou dimoun dan bann kominote. I

annan larzan dan sa Bidze pou asiste dan bann lenfrastruktir tel ki semen. Semen sid les Mahe i en gro problem ek sa *traffic jam* dan bomaten e apre travay.

Mon ti a kontan ler mon lo sa size, pou remersye sa pti group lapolis ki tou le bomaten e aswar zot debrouye menm pour degas lasasen pour ki bann sitwayen i ariv kot zot en pe pli boner. Mon anvi dir zot tou merci pou zot pasyans e travay dir. Avek sa Bidze i annan provizyon pou fer sa trwazyenm *lane*, ki pou ede retir konzasyon dan sa rezyon.

Larzan in ganny mete pour konstru bann *bus shelter* dan diferan landrwa lo Mahe e Praslin. La mon pe mazin bann zabitan dan rezyon Santa Maria, Anse La Mouche. Ki pou kapab benefisyer avek sa fasilite. Koman zot *MNA*, mon oule enform zot ki landrwa pour met sa de fasilite in fini ganny idantifye.

Lotorite distrik in fer sir ki plan sa de *bus shelter* in fini ganny fer. Nou annan zis pour ganny *wayleave* avek sa de propriyeter pour ki nou kapab finalman konmans konstruksyon. Nou pou demann Gouvernman pour asiste nou avek enn sa *bus shelter*. E nou dan kominote nou a debourye,

menm mize pou fer sa enn dezyenm. Parey proverb i dir 'ed ou lekor premye, apre lesyel i ava ed ou'

I osi annan larzan pou konstriksyon bann semen pou fasilite mouvman dan bann kominote. Eski sa pa en keksoz pozitiv pou ou kominote? Larzan in ganny mete pou asiste bann lekip sportiv dan bann kominote, kot pozitivite i kontinyen rennyen antre nou bann *sportsmen* e siporter. Eski sa i pa en lot sir lespwar pou nou bann zabitan?

Keksoz ki nou pa kontan, se ler nou vwar nou bann sitwayen dan bann kominote pe ganny trennen dan bann move pratik tel sorselri, satanik, bandisite menm al deter lekor dan simityer. Bann swadizan *leader* ki pe aspire pou vin fitir Prezidan Sesel, pa devret pe ganny vwar pe ganny asosye avek sa bann tel frekantasyon.

Dan plas ankouraz Seselwa pour rod bann *coach* ouswa ankadre pour fer aktivite kiltirel, legzersis, *keep fit* pour vin pli an bonn sante, zot pli enterese enport bann salte e lapousyer Sesel, anmenn bann bandi pour donn zot swadizan *protection*. E menm anmenn tout sort malediksyon dan nou pei avek bi zis re ganny pouvwar.

Eski sa pa i vilenn e degoutan ler ou vwar lo *social media* kot bann swadizan *leaders*, pe pas Ankour aköz zot koneksyon direk avek sa bann mannev satanik e sorselri, ki anvi anmenn malediksyon lo zanfan Seselwa e fer Sesel tonbe?

Eski pa i degoutan ler ou vwar ou swadizan *leader* sipoze fitir Prezidan pe ganny afilye avek bann personnaz ki ti pe kas legliz? Detrir nou bann site touristik, menm met klou lo lans pour fer ditor nou pep e nou bann viziter e lekonomi nou pei.

Akoz zot mazin sitan mal lo nou pep e nou pei? Mr Speaker, nou'n tann lot kote pe dir ki zot kontan bann sitwayen aze. E si zot vin o pouvwar zot pou donn bann sitwayen aze plis larzan e plis servis. Mon kestyon se, eski zot fek vin lo lasenn politik ouswa se Zot Gouvernman ki ti la e ti sonn sa bann menm dimoun zis R50 ler zot ti anvi? Si ou vwar ki saler pansyoner i ankor fay. Se gras a zot.

Zot pa'n valoriz sa bann dimoun. Zot ti touzour krwar ki zot pou touzour reste bann *master*. E sa bann dimoun aze, zot bann soubalturn. Ozordi dimoun aze in re ganny son dinyite, e zot rekonnet zot valer.

Akoz zot in konn valer zot vot. Retourn an aryer pa en opsyon.

Apard ki larzan nou bann sitwayen aze i kontan zot trankilite, sekirite e lape lespri. Koman en *MNA*, mon bezwen fer sir ki tou desizyon ki ganny pran pa zanmen afekte zot bann drwa fondamantal e zot bann aki.

Sa bann akt vandalism ki nou'n vwar swa avek bann legliz, dan simityer, lo bann *site* touristik in sirman afekte lespri, lape lespri nou bann sitwayen aze.

Eski sa bann *MNA US* napa dinyite, napa moral e napa lakanmizri pou zot kontinyen promot en bandi ki napa ki konfyans dan son lekor.

Eski sa kalite konportman i ganny vwar koman akseptab parmi *US*? Mon krwar i le moman pou Seselwa sirtou siporter *US* dir sa msye “*resign* si ou bezwen lapousyer pou tenir ou ziska 2025”. Parey sa msye dan *meeting* piblik ti dir “mon konnen ou dan problem”.

Mr Speaker, lot konponan sa Bidze se asiste bann ki pli vilnerab. Wi, Mr Speaker, sa i montre ki nou Gouvernman menm si sa detrwa bater latet pe dir ki nou zis an faver gro biznes e milyonner. Mazorite Seselwa i konnen ki sa pa leka.

E la mon a donn detrwa legzanp pou demanti zot bann mansonz e demagozi.

Premyerman, konze maternite pour bann madanm e papa ki anploy zot lekor. *US* ti pe donn zot R2400. Gouvernman *LDS* in dir R6600. En logmantasyon 4200 anplis.

Zanfan adopte *US* ti donn zot R1300. Gouvernman *LDS* in donn R3134, diferans R1834.

Paran adoptive pour ganny en sonm R25 mil. Sa pour asiste sa paran adoptif pour investir dan bann keksoz ki sa zanfan pour bezwen.

Bann madanm seselwa ki pe sorti an deor Mahe pou vin ganny baba. *US* ti donn zis R1500. La Gouvernman *LDS* pe donn zot R5000, diferans R3500.00

Semi orfelen, *US* ti donn zot R1300. Gouvernman *LDS* pe donn R2350 pour sa lasistans, diferans R1050.

Orfelen savedir bann zanfan ki napa 2 paran. *US* ti pe donn R1540. Gouvernman *LDS* pe donn R3134, diferans R1594.

En lot lasistans ki Gouvernman in azoute se sa *scheme* pour bann paran ki ganny plis ki en zanfan an menm tan. R3134 ziska R6635 depan lo konbyen baba sa paran i donn nesans ziska 5 an.

Seselwa, gete pour zot menm lekritir i lo miray.

Mr Speaker, sa bann servis ki nou pe donn nou pep napa naryen atase avek. Mon anvi dir avek Lepep Seselwa, ki sa bann lasistans se pa bann faver ki nou pe donner. Nou pa ni pou maltret zot pou zot, zot engra.

Ler mon lo sa topik, mon pa oule mank sa lokazyon pou denons latak lo mon koleg Onorab Zialor par en Onorab lot kote latab.

En madanm ki mon'n touzour annan bokou respe e ki atraver son lentervansyon mon'n vreman dezapwente. Bob Marley in sante "*emancipate yourself from mental slavery*", zis ou lekor ki pou kapab liber ou lespri. Onorab Zialor, i konnen, i konpran ki faver byen Malaki, fer martir ou pep, viktimiz dimoun pa bann bon keksoz ki devret kontinyen.

Mersi Onorab, pou annan sa kouraz pou denons sa bann move fason fer.

(APPLAUSE)

HON FRANCOIS ADELAIDE

Sirman depar Mr Rene in kapab finalman liber ou konfyans, apre tou napa okenn byen en levennman ki'n kapab finalman liber ou konfyans. Apre tou

napa okenn byen materyel lo later ki eternel. Tou sa ki ou'n erite, ou pou kit deryer ler ou kit sa later. Sel rekour se ki ou konnen ou konsyans i kler, ou annan lape lespri e ou annan ase kouraz pou demann pardon.

Kot i byen, i byen. Me kot i mal, i mal. Apre tou Mr Speaker, dinyite pa vann dan bazar.

Mr Speaker, dan mon konsiltasyon mon'n ganny demande par enn mon *constituent* pou demann Gouvernman atraver Minis ki responsab pou sosyal pou posibleman konsider reviz kontribisyon alimoni pou reflekte letan aktyel.

Kontribisyon minimonm byensir i en konsern pou serten paran. Nou zanfan fodre zanmen ganny vwar koman bann fardo, me koman bann *assets* pou lavenir. Mon oule egalman felisit tou paran ki fer sa zefor, pou reflekte zot lasistans pou ki zot zanfan i ganny asiste konvenableman.

Mr Speaker, nou Lafors Lapolis pe transformen pou vin enn profesyonnel. Kot piblik dousman, dousman pe re ganny konfyans ladan, zis parey avan koudeta. Koman en Manm lo Komite Ladefans e

Sekirite, mon'n ganny sa privelez pou travay avek zot.

E mon dan en pozisyon pou konfirm sa ki mon'n dir. Menm avek bokou defi zot sikse i evidan.

Bokou bann krim in ganny detekte dan en kourt dele letan. Menm si parler swivi par bann lezot lenstitisyon pou sarz e kondannasyon i parfwa tarde.

Se pou sa rezon ki *US* pe fer krwar ki Sesel krim i an deor kontrol. Diferans se ki avan dan zot letan bokou krim ti ganny kasyet e pa ganny raporte depandan ki ou afilyasyon.

Konbyen Seselwa ki'n soke avek bann krim ki'n ganny devwale dan *TRNUC*, e ki pa'n zanmen deza ganny devwale? Ozordi Sesel pe ganny dirize par *the rule of law*. Dan bal kafe napa triyaz.

Ou lapartenans politik, nenport ras e relizyon si ou pe komet en lofans ou pou ganny *deal* avek e ganny anrezistre dan statistik.

Vwala aköz nou vwar sa bann sif i koumsa. Avek en Gouvernman responsab, nou pa pou kasyet naryen zis pou fer krwar ki tou keksoz i korek. Mr Speaker, mon oule osi felisit e ankouraze ki Lafors Militer i osi ganny tou sipor dan zot demars, pou fer sir ki Sesel i

reste en pei souvren e an sekirite.

Mersi pou tou zot bann aksyon brav, pou kontinyen defann nou pei swa kont bann krim organize, lapes ilegal ouswa bann trafikant drog. Zot in vremen montre zot efikasite, e nou fyer pou donn zot nou sipor. Mon oule felisit tou bann akter kle ki ede dan lentelizans e sekirite nou pei.

Aprè bokou letan, kot en groupman ki ti pe teroriz nou nasyon, swa par sabotaz nou legliz, met koksis dan bann diferan lokasyon, menm sabotaz nou lasapel kornis Anse Poule Bleu, finalman al deter lekor dimoun mor Takamaka.

Nou lafors entelizan in kapab entersepte zot. Tou dimoun byensir in reste ebete, pou trouve lekel ki par deryer tou sa bann akt teroris. Eski se sa ki *US* pe dir ki nou lafors pa efikas?

Mr Speaker, sa bann swadizan *Leader US* pa war naryen dan sa Bidze pou zot. Si zot pa trouve, ekout mwan mon a montre zot. Dan Bidze i annan 1 milyon dan renovasyon Kordgard Santral, kot i ava annan kaso parey rekomandasyon *Human Right* kot sa ki pe anvizaze fer lofans ava ganny detenir avek tou

dinyite ler zot deside ensilt revolt parey zot souvandfwa pe inifye.

I annan alokasyon pou kontinyen amelyor sant rimann. Mon krwar ki tou dimoun i bezwen fer trial e sa fasilite i ava sirman ede. Sa se 2 fasilite, ki pou akte koman en deteran pou pa ankouraz zot pou fer sa ki mal. Mon pe sipliy zot pou vin pli responsab dan tou sa ki zot fer. Nou lo sa kote latab, nou anvi dir ek bann fanm ek zonm dan liniform, ki zot kapab kont lo nou pou sipor.

Akoz nou konvenki ki zot lo bon semen. Nou konnen ki pa tou ki perfe. Me nou donn zot tou nou langazman, ki nou pou siport zot Bidze pou ed zot fer pli byen. Mersi pou tou zot sakrifis, zot travay dir e zot devosyon dan ede pou kontinyen gard lord ek lape dan nou pei. Si ou siport *US* ouswa *LDS* sa pa preokip nou. Travay onnet e fer sa ki byen.

Mr Speaker, en lot keksoz ki'n enteres mwan dan sa Bidze e ki mon anvi elabor lo la se sa laspe *circular economic* ki pe ganny ankouraze. Dan term pli senp, se redonn valer bann materyo ki'n deza servi. Savedir resikle, reservi ouswa repara.

Tro bokou keksoz Seselwa ouswa nou pei i servi, i ganny

zete menm si nou kapab reservi. Nou'n vwar ki dan bann landrwa zet salte deplizanpli pe ganny ranpli avek bann keksoz ki nou ti kapab resikle. E sa ki fer nou war bokou bann evantyalite tel ki parey dife lo *landfill*. Mon konnen ki *CEO LWMA* i siport sa demars e nou pou bezwen donn li tou sipor.

Nou bezwen enport bann lekipman ki nou garanti ki nou pou annan pyes pou repara kan in ariv en problemm e evite ki sak fwa en lekipman i annan problemm, nou bezwen zet o bor semen pou li al fini lo *landfill*.

Mr Speaker, me fodre Seselwa i note ki bokou keksoz nou kapab resikle, reservi, e repara. Sel keksoz ki Seselwa fodre zanmen e zanmen i fer ler pe konsider *circular economy* se repar parti *US*.

Zot a dakor avek mwan ki *US* in fini deparpiye e demode. Mr Speaker, en lot bout sa ladres ki'n enteres mwan, se byensir sa laspe plis teknoloji e lekonomi limerik pou fasilite nou pei.

Ankor en pa dan bon direksyon kot bokou fristrasyon i kapab ganny redwir e ankouraz en meyer servis.

Mr Speaker, *time is money*, lemonn pe evolue, nou pa kapab ganny kit deryer. La mon ti a kontan ki Minis i

spearhead en demann, pour mazorite drayver dan Baie Lazare e bokou lezot drayver dan Sesel. Si pa ankor arive, mon ti a demande ki imedyatman Departman *Licensing* i donn lord ki kart *driving license* i vin elektronik. Kot nou a kapab prodwir nou en *driving license* elektronik avek nenport bann lazans ki anvi vwar.

Nou pe koz lo fer desann pri lavi, sa ava en fason kot i ava ed nou bann drayver ki souvandfwa pa fer li ekspre, me pe ganny penalize aköz zot kart pa avek zot. Sa i ava osi rezourd bokou problem ant Lafors Lapolis e bann drayver.

Mon vreman kontan pour tande ki plis lanfaz pe al ganny mete dan domenn lenerzi renouvlab. Sesel i en pei kot prensipalman larder soley i an abondans. I montre ou ki Gouvernman avan pa'n zanmen anvi Seselwa ganny plis larzan.

Avek sa teknolozi i pou fer ki laplipar Seselwa i kapab pa vwar li avek en pti bil kouran tou lemwan pour pey. Eskiz mwan, i ava war ki i annan li en pti bil pou peye.

E Mr Speaker, si nou kapab fer sa vin en realite, kot Seselwa i ava ganny akse *incentive* pou kapab akse ek bann pano *photovoltaik*, byensir

i ava en gran pa dan bann demars pou ed fer desann kou lavi sirtou lo kote bann itilite. Si sa bann bon keksoz ti zis ganny garde dan *file* dan letazer par sa ansyen Gouvernman, mon pe demann Gouvernman *LDS* pou akselere lo sa bann program ki pou benefisye mazorite Seselwa.

En lot term ki Minis Hassan in met lanfaz lo la, se investir dan nou bann lenfrastruktir pour lepanouisman nou pep. Mr Speaker, sa zafer investir dan lenfrastruktir i fer tou Manm *US* mouse e enkonfortab.

Si ou le fer parti *US* ofanse, zis nonm zot ki nou pe al fer plis lenfrastruktir. Sa ki larm i koule e deside al rod zourit, sa ki fer petisyon pou pa komans konstriksyon. Sa ki rod tou fason pou *boycott* Libreri Nasyonal, sa ki dir aret fer bann proze kapital e pran larzan i diverti kontan. Legzanp i tro bokou.

Sa bann levennman koup riban par ler ou a krwar ou pe koup en bout avek zot. Sa zafer lenfrastruktir i fer zot sitan fermal, zis par ler zot bliye ki zot dir, aret bann proze kapital. E ler nou fer sa bann proze zot dir ki sa ti zot proze. Tan ki *LDS* i o pouvwar zot pou war plis lenfrastruktir de zour an zour.

Sa ki larm pou koule, zot larm pou koul pou bokou letan. Sa ki pou anvi ekrir petisyon rod sifizaman bolpenn. Nou, nou krwar dan progre e nou pou kontinyen san ses devlop nou pei. Sa ki pa kontan war Sesel progrese, parey in deza ganny dir par zot swadizan arsitek, avyon i pase, bato i pase gete zot menm.

Ozordi *US* i kontan fer propagann konmkwa si zot vin o pouvwar zot pour donn travayer plis larzan. Eski sa bann bater latet laba lot kote latab i ankor krwar ki Seselwa i bliy vitman? Lekel ki ti Minis dan sa bann letan? Lekel ki ti ansarz *DPA* dan sa bann letan? Tou keksoz ti avek zot pou adres saler travayer. Eski zot sitan bliy vitman ki 43 an zot ti annan ase letan pou zot aranz saler travayer?

Mr Speaker, mwan mon anbarase ler mon en travayer lasante i dir mwan son lapey apre plizyer lannen spesyalize dan son domenn i sitan ba. Eski se Gouvernman dizour ki pa'n get dan *welfare* sa bann travayer tou sa letan. Dan tou sa difikilte, nou'n kapab aziste zot lapey par 10poursan avek konsolidasyon zot bann *allowance*.

Ler mon lo sa topik, mon pa kanmi pour dir avek lekip *US*

zot bann dimoun san prensip, san konpasyon, san santiman, voras e visye. Zot sirman pa responsab e konsyansye, sirtou ler zot pa pe koz laverite avek sa pep. Zot devret onte, zot decide adopte bann latitud negativ. Zot swe se vwar Sesel dan problemn. Zot anvi war Sesel soufer. Zot anvi war nou lekonomi *fail*.

Menm zot pe konpar nou Gouvernman koman en Gouvernman kanmaron, mon analizasyon i koumsa. Nou, nou en Gouvernman ki fasil adapte avek sanzman. E nou pa per vwar li e nou pa war li en problemn pou rekonsidere si i annan merit.

Be ler ou en Minis byen vantar, plen ek Dolar abitye fim sigar en sel kou ou war ou bezwen vol plas ou kanmarad. Dir mwan ki mannyer i apele sa? I pou mal pou mwan apel ou Onorab Kanmaron, akoz se ou ki'n fer plis aryer avek en blesir serye. Nou trouve ou ankor fermal.

Sak fwa ou pou nonm kanmaron, mon pou bezwen fer ou mazine ki ou pa'n fer otan progre, menm si atraver ou afilyasyon ou'n ganny bokou soutire e bokou faver.

Mr Speaker, bann Manm *US* i deklar *LDS* komans *intellectually spent*. Sa ki dir nou

intellectually spent, mon a remind zot, ki ler en dimoun ouswa en lekip i *intellectually spent*, i pa fer naryen. Me i zis konplent, fann fo rimer, e dormi. Dir mwan zot menm, kote ki nou'n war lili dan biro sef? Larepons i senp, zis bann parese ki deside anmenn lili dan biro.

(laughter)

HON FRANCOIS ADELAIDE

Swa pou li dormi, swa i pares, swa i visye, swa zot ankor annan zot bann move manni kot lasistans *welfare* e promosyon i ganny donnen lo lili. Natir e sentonm bann dirizan enkonpetan, fatigue ki pe manifeste *intellectually spent syndrome*.

Ki i pa devret zanmen ganny sa privez pou diriz sa pei. Kan la *LDS* lide nou annan en kantite menm, kouraz pa borde. Lendirans kantite menm, dirizan, *leaders* tir enn met lot. Aktivis zour an zour i ranforsi, siporter pa kapab bare. Eski nou pou bezwen pran traka *US*? Zanmen !

Mon konsey pou zot se rod ankor plis lili, aköz 2025 zot pou al dormi pou leternite.

(APPLAUSE)

HON FRANCOIS ADELAIDE

Mr Speaker, sa Bidze i annan bokou e si mon kontinyen mon letan pa pou permet. Ki zabitan Baie Lazare i annan dan sa Bidze? Sa ki pas dan sid was Mahe, byensir aswar pou sirman war en sanzman pozitiv kot bokou lalimyer in ganny enstale pou sekirite nou semen.

Baie Lazare osi pe ganny bokou bann proze. Ou firamezir ki nou ganny finansman nou pou kontinyen alim nou bann semen segonder pou garanti plis sekirite dan nou distrik. Ler mon lo sa size, mon oule senserman remerci Mr Walter Pillay pou son donasyon *streetlight*, pou met dan nou landrwa, enn de landrwa dan Baie Lazare.

Mr Walter Pillay, mersi bokou pou mazin nou distrik. Nou vreman apresye ou zes anver nou kominote. Mr Speaker, semen Baie Lazare pe ganny transformen, atraver sa proze *West Coast Development*. Plis ki 10 an sa proze in ganny peze par parti *US*, senpleman aköz zot ti anvi ki sa donater i donn zot Gouvernman sa larzan ki ti pou disparet. E nou semen ti pou touzour dan en leta kot ti pou napa ase sekirite.

Aprè 1 an ki *LDS* ti pran lofis, demars ti komanse. E ozordi tou dimoun i fyer pou

temwannay sa devlopman mazik dan nou distrik. Gouvernman *LDS*, in kapab negosye pou ki sa proze i ganny enplimante tou dilon sid Mahe, sorti Anse La Mouche, Baie Lazare, pou al Takamaka, Anse Royale e retourn ankor Anse La Mouche.

Byento Anse Boileau pou vwar li ganny touse avek sa proze. Konbyen dimoun ki pou benefisye avek sa proze? Eski sa pa en lot siny pozitivite ki *LDS* pe antreprann? Ozordi *US* pe donn lenpresyon ki zot vremen enterese avek sa proze, kan ofet zot plito zalou e gro ker.

Menm Onorab Pillay e Cosgrow zot nennen i'n sitan devlope ki zot santi loder koripsyon. Kestyon pou bann Onorab, ki mannyer zot konn loder koripsyon? Zistwar Mr Speaker. Zistwar larzan *west coast* si mon pran letan pou mwan eksplik sa bann Onorab, mon krwar zot in fini taye mon pa war zot. Zot in fini taye, akoz zot pa oule konn laverite.

Me to ou tar laverite pou sorti, e zot bann nennen koripsyon mon krwar zot annan detrwa dokter kot zot. Mon krwar i a bezwen get en kou zot bann nennen koripsyon ki zot annan. Ki santi loder koripsyon.

Sa Bidze i annan bokou keksoz pou permet distrik Baie Lazare devlope. Se pou sa rezon ki parti *US*, pe fer lakizasyon lo mwan. La tou dernyerman, rimer ki bann *Leader US* pe senmen dan Baie Lazare se ki Francois Adelaide pe demisyonnen. E zot pe pas port an port, kaz an kaz pou zot rod sinyatir. Akoz zot dir tre prosennman pou annan en *by-election* dan Baie Lazare.

Zot sitan dezespere mannyer nou pe travay, pa pe kit okenn lespas pou zot retournen. Zabitan Baie Lazare, Francois Adelaide ti demann zot en manda pou ede anmenn devlopman dan nou distrik. *The deal is still the same*. Adelaide pa pe demisyonnen !

(APPLAUSE)

HON FRANCOIS ADELAIDE

O kontrer nou pe kontinyen travay pou devlop nou distrik. Travay i la, e Adelaide pa per travay. Sa group kandida *US* ki pe esper sa tyak, silvouple al rod en lot lokipasyon ziska 2025. Aret reve e fann fo propagann. Baie Lazare *LDS* nou'n *conquer*, zanmen e zanmen ankor nou pou troun an aryer avek en parti katar parey *US*.

Mr Speaker, Baie Lazare i annan detrwa proze ki pe demare e pou demare dan lannen prosenn. Nou sant lasante in deza fini ganny *tender*. Dezyenm faz Anse Gaulette *Rehabilitation Project* kot miray ros pou stabiliz sa lakot, semen e bann propriyete dan sa rezyon. *16 unit ex Hunt Anse Poules Bleu* in deza komanse.

Lagrandisman semen dan detrwa landrwa i deza pe bouze. Nou fek termin en proze kot nou'n kapab asiste lafanmir Sauzier e Confiance avek en zoli pon, ki a permet zot ariv kot zot lakour. E dan lot kote sa pon pou osi ede konekte *ex Gondwana* avek semen Val D'En Dor an ka i annan okenn evantyalite lo sa tel semen.

MR SPEAKER

30 minit Onorab.

HON FRANCOIS ADELAIDE

Ok Mr Speaker. Mon anvi an terminan koz lo sa zafer *long service allowance*. Parti US pe fer tro bokou propagann. Mr Speaker, dan Lasanble Mrs Mohideen ti dir 'i pa vo lapenn pou donn en travayer R1000 ler i ganny 10 an'.

Me atraver ler i pou fer evalyasyon son travay i kapab ganny R1000 dan 3 an. E ler ou

konte apre sa 3 an i pou fer 7 an. R1000 tou le mwan i fer dan en lannen i fer R12000. E si i fer 7an, 7 fwa 12 mon krwar i fer R84,000 i pou gannyen dan zis 7an ler US pe fer ou ganny R1000 dan 10 an.

Mr Speaker, LDS i reste pozitiv. Les mwan dir zot ki zot pe *deal* avek bann piti Bondye. Zot pe *deal* avek en pep ki'n swazir kouraz lo lafreyer. En pep ki'n pasyante pou anbaras vre sanzman. En pep ki'n martirize pou reganny son valer e son dinyite. Kot lapriyer e pasyans in sa zarm ki'n ganny adopte, e servi a tou pri pou anmenn sanzman radikal dan sa pei la parey Onorab Naidu ti dir.

Gouvernman LDS pe debourye, partou kote bokou pozitivite. Nou pou kontinyen debourye pou anmenn Sesel dan en vre semen prosperite. Nou pou antre dan lannen 2024, avek plis pozitivite. 2024, pou bezwen ankor en lannen travay dir. Sa Bidze se pa en Bidze 2025, pasyante apre Bidze 2024 pou bezwen vin Bidze 2025. Sa ki mon kapab dir zot *just watch this space*.

Nou krwar dan nou nasyon, e nou koman LDS serye nou pa zanmen les tonbe. Mersi Mr Speaker.

(APPLAUSE)

MR SPEAKER

Laparol i aprezan pou Onorab Sandy Arissol.

HON SANDY ARISSOL

Mersi Mr Speaker. Bonn apre midi tou bann Manm Onorab. Apre midi tou dimoun ki a lekout. Mr Speaker, frer ser zabitan Bel Ombre, frer ek ser Seselwa ki viv Sesel, menm swa aletranze. Pour ou ki kontan ekout mwan, menm si ou pa reste Bel Ombre, i toultan en plezir pou adres tou size e kit ou azour.

Letan mon komanse menm, mon anvii felisit mon Gouvernman atraver Minis Finans isi dan nou Lasanble, felisit zot pou zot pa vol 25 sou larzan Lepep Seselwa pandan sa dernyen 3 an.

(APPLAUSE)

HON SANDY ARISSOL

E asire Mr Speaker, ki i annan larzan dan sa Bidze pou nou vote sa bann zour ki vini. Mon anvii felisit tou mon bann Manm lo kote LDS ki'n ekrir zot prop *speech* e koz lo Bidze. E adres bann sityasyon fran e onnet san personn fer zot per e menas zot pou zet zot par lafnet, si zanmen zot koz le kontrèr.

Mon anvii felisit Lepep Seselwa, spesyalman zabitan Bel Ombre, pou fer nou konfyans dan sa travay ki nou pe fer. Nou pa pou vann zot pour koko nou, swa vann zot pour 2 boutey *whisky*. E asire ki tou Seselwa i ganny trete parey. Dapre nou Bidze napa nanryen pour sa parti fatige. Swa pour zot zabitan, swa pou zot distrik. Mansonz e ankor *mensonge comme d'habitude*.

Zot tou Mr Speaker – zot tou lo kote US, zot saler ek tou zot benefis i dan sa Bidze pou konmanse. E zot tou zot pou pran tou sa ki pour zot trankilman. Me zot napa kouraz pou aksepte e dir mersi. Dan zot repons ki nou'n tande?

Zot in servi bann mo parey “fware”, “fer onte”, “nou'n deregle”. Zot in apel nou kanmaron, parti fatige. Zot in servi SNP/LDS. Zot in apel nou engra. Zot in apel nou maf. Bann toupe kanze. Zot in apel nou las. Sa deba in al dan diferan direksyon. E plizyer topik in vin dan konversasyon atraver US ki ti konmans sa lentervansyon. Zot ki ti konstrir Sesel zot in rapel nou.

Mon mazine zot ki ti dekouver Sesel. Zot bann premye kolok ki ti debark Sesel. Zot ki ti bwar tou bann delo dan lesplanad. E zot ki ti manz tou

torti avek krokodil sa letan pour zot ganny lespas pou konble e aprezan zot fristre aköz nou ki'n vin o pouvwar.

Akoz zot in nepli ganny bann benefis gro msye. Zot in nepli ganny bann privez sarze - sarye manze koson, pran 'larzan *forgo*.' Ganny drayver, loto pou naryen. Ganny bann *allowance's* seve, linet. Diven pou anmenn dan Bwa Per. *Allowance hamper* pou anmenn Dan Limon pour plezir. Alor zot ofanse e zot ankoler.

Alor ki zot fer? Zot senm lafreyer. Zot senm panik avek bi pour Seselwa fristre e mont lo semen. Fer krwar i annan en manman logmantasyon pour Prezidan ek bann Minis.

Selman lekel ki anvi vin Prezidan, zisteman pou li ganny sa bann swadizan gro saler? E plizyer zot pe lager mont lo *stage* avek bi pou vin Minis, pou zot ganny sa bann swadizan gro saler menm. Gro saler pa'n marse Mr Speaker.

E ler mon'n get dan Bidze, napa gro saler pour Minis. Ni pou Vis Prezidan, ni pour person. Mansonz e ankor mansonz par sa parti fatigue. Zot fer krwar zot kapab organiz lamars. Manman tou lamars aköz dimoun i fristre laz pansyon in ogmante kan tou Seselwa i konpran son prensip,

aköz move zesyon sa vye ladministrasyon fatigue. Person pa'n desann Mr Speaker.

Zot in esey en pe dan tou. Zot in dans sanson lo zannimo. Trenn *Tinky Winky* sou dan lavil. Se aste zourit e marse dan lari bazar. Pa marse menm. Zot in deklar zot lekor *Pinocchio* dan en *rally*. Zot in sey kalkil milyon transform li an Roup. 70poursan lapolis i siport zot dapre zot. Selman letan 80 lapolis - poursan lapolis i vin sers balye *Maison Du Peuple*, zot ronfle. Be pa zot sipor sa?

Zot lager ek *STC*, aköz i nepli donn zot larzan *part rental* pour zot parti. E zot dir *STC* in fer sitan profi, Onorab Aglae i dir Mr Speaker. Wi, in fer profi. Ou konnen aköz Mr Speaker in fer profi? Aköz lavyann *STC* nepli ganny partaze dan sed Perseverans.

Rezen ki vini lo avyon nepli ganny *hijacked* depi *highway* pou al kot bann lakour prive. E larzan *STC* i reste dan kontwar *STC*. Se pour sa rezon *STC* in fer profi.

(APPLAUSE)

HON SANDY ARISSOL

Me sa i pou drol pour Onorab Aglae Mr Speaker. O kontrer pa bliy larzan sa madanm la anler la ki zot dir mwan i siny *Flocks*

la, akoz sa larzan semen ki zot ti promet li. I ankor pe rod son larzan.

Zot zalou relasyon ki Sesel i annan ek bann pei zanmi akoz zot ti krwar tou sa pei pou abandonn Sesel si i annan en sanzman dan Gouvernman. Me lemonn i war nou pe fer tre byen e zot pare pou asiste. Ed nou dan nou demars, akoz nou pa en bann move dimoun nou. Nou pa en group bandi.

US zot kwar i annan trik dan zwe akoz zot nepli war larzan kot i pase. Tou sa i fatig zot. En parti fatige ki'n deklar zot lekor en parti kanmaron. Alor zot dan fistrasyon. Zot menas Lepep Seselwa ki si okenn dimoun i sey bar zot, i pou ganny war dan en rigol anba en pon.

Mon repete Mr Speaker, zot menas Lepep Seselwa. Si okenn dimoun i sey bar zot, i pou ganny war dan en rigol anba en pon. Rapel byen sa parol frer ser Seselwa, par Patrick Herminie. En zonm ki anvi vin Prezidan Sesel.

Sa menm dimoun ki pe mazin ansarz nou pei. E zot dir sel opsyon pour Sesel se *vote* pour US e retourn an aryer, parey kanmaron. E nou lo sa kote latab nou siport zot ek zot nouvo *motto* pou zot retourn an aryer parey kanmaron.

Alor tou keksoz pa bon Mr Speaker, letan nou'n ekout bann US. Zot *PNQ* pa ganny reponn. Minis pa ganny *press* ase. En *matter of privilege* detanzantan. *Point of order*. Pa ase menm.

Menas Mr Speaker pou al raport li ek *SADC PF*. Refiz tou partisipasyon pou travay pour pei. Zot apel sa deryer rido. Fer *press conference* pou lager ek *SBC*, selman zot pa eksplik sa 4 mil Dolar kote ti pase, Mr Speaker?

Zot war tou manm *LDS* i engra. Nou ti ganny dir dan sa Lasanble par Onorab Lemiel. Kan pli gran engra se zot menm. Zanmen satisfè. Ganny larzan palto me zot pa mete. Sa ki apel engra. Ganny gran lopital. Tir portre avek, e pli gro paysan lo ban, *still* zot pa dir mersi. Sa i apel engra, Mr Speaker.

Engra, tou proze i dan distrik Anse Royale, *MNA* Lemiel i dir in demande e in gannyen. E mon kontan pour li. Me i refize dir mersi. Sa i apel engra Mr Speaker.

(APPLAUSE)

HON SANDY ARISSOL

Engra letan bann ki'n fer kanpanny i ganny kit deor e bann ki'n *fail* ek zot *motto* 'Together' e pran 'larzan forgo.'

Li i ganny promosyon e reste anndan. Sa i apel engra Mr Speaker. Bann ki'n ganny posibilite pou al tretman aletranze. Letan *airport* ti fermen, zot refize dir mersi. Sa i apel engra Mr Speaker.

(APPLAUSE)

HON SANDY ARISSOL

Pli gro laont se zot tou dan sa lasanble zot in vin lo tiket Mr Faure e zot ti kriy;” tenir Faure, pa large!” E zot ti dir ek nou; “pa pou anpandan.” Zot ti kriye. La zot pe sant leloz Mr Patrick Herminie. Wilbert Herminie dan sa Lasanble ki ti kriye Mr Speaker. Zot in anpandan. Nou'n kit zot anpandan. E zot pou reste anpandan, bann engra!

(APPLAUSE)

HON SANDY ARISSOL

Mr Faure zot in zet li akote e tou larestan ki ti kriy ‘*Together*’, apre zot ava vin donn nou leson lo ‘*together.*’ Kriy eleksyon Mr Speaker. Pa zis kriye me debout e partisipe.

Engra letan en bann i ganny 50 mil koman pansyon. Li menm i ganny 50 mil ek parti, e li menm ki ganny R10 mil konman konsiltan. R110mil Mr Speaker par mwan. Sa, sa ki

nou konnen. Be konbyen ankori i pran? Selman zot evant gro saler pour Minis. Gro saler pour Prezidan. Pour sa enn 110 mil zot dir nou zistwar. 110 mil Lepep Seselwa!

Be olye zis anmenn zourit, kekfwa sa enn ti ava ganny en saler. Non, i pran tou sa ki pour li. E bann ki soutir li zot apel sa engra. R110 mil par mwan. Pour zot sa i *ok*. Tou zanfan pe mor lafen. E Seselwa i mor lafen.

Alor zot napa lot opsyon Mr Speaker. Zot bi se vin ek largiman plis larzan pour Seselwa. “Plis larzan dan pos Seselwa” zot kriye, angiz pou konfiz sa pep. Selman en sel endividi pe pran R110 mil li tousel dan son pos.

Kan tou Seselwa i konn tre byen ki tou larzan ti avek *US*. Seselwa ti'n met konfyans dan zot pour 43 an pou sofgard zot larzan. Zot in kas tou rikord pran tou sa ki pa pour zot! Zot ger onte. En bann move dimoun. Lepep Seselwa i rapel zot.

Bal dan simityer. Bal kot *SBFA*. Partaz nou larzan antre fanmir e zot zis zot ti gete e pa fer nanryen. Ki zot ti ete sa letan, bann *rubber stamp*? Milyon perdi lo *Ile Soleil*. Milyon perdi atraver zot bann dalon Irlande. Milyon perdi

Perseverans, apre zot vin koz later konble. Zot vin koz lakaz lapen. Si pour zot sa ti lakaz lapen, *too bad*. Selman pa bliye, pa larzan Onorab Aglae sa Mr Speaker. Sete larzan Lepep Seselwa ki ti fer konblaz e konstri *flat*.

(APPLAUSE)

HON SANDY ARISSOL

E mon fyer pour mon frer Naddy Mr Speaker, apre ki i ti ganny atake dan sa Lasanble par Onorab Wallace pou dir ek li in ganny lasistans. Li avek tou son fanmir. Mon anvi *remind* Onorab Naddy Zialor, en Manm lo mon kote *Caucus* poudir lasistans ki ou'n gannyen ti larzan Lepep Seselwa.

(APPLAUSE)

HON SANDY ARISSOL

Napa en biye ki ou'n gannyen ki annan figir Wallace Cosgrow oubyen Albert Rene lo la. Sete larzan Lepep Seselwa.

(APPLAUSE)

HON SANDY ARISSOL

Sa ki *US* i kwar. Sesel pour zot e zis zot ki devret la. Non. Zot letan in fini. Zot in ekspire. Byento dan *bin* listwar nou avar

lir zot zistwar parey nou ava lir zistwar *Pinocchio*.

(laughter)

HON SANDY ARISSOL

Pa fini, kontra manboulouk kot Lasanble Nasyonal. Gran merci nou ti ariv atan avek 15 lo 10, par en group bandi. Lekel ki ti ansarz Lasanble Nasyonal sa lepok Mr Speaker? Sete Patrick Herminie. Milyon perdi.

Milyon perdi kot *welfare* anba zot *watch*. Larzan dan papey kaki dan baro *State House*. Prezan zot ganny kosmar larzan.

Pa bliy sa fame 'larzan *forgo*' kot bann Minis *US* ti pe aranz zot lekor! Parey Onorab Audrey Vidot ti rapel nou dan sa menm Lasanble. La depi zot in al La Digue, pa konnen si zot in war delwil aköz tou dimoun pou ganny en pansyon a laz 63 an.

Tou dimoun pou ganny larzan gos, drwat. Travay pa travay si ou le. Sa i filozofi sa parti fatige. Zot bliye zot in kit Lepep Seselwa ek fardo. Selman li i pran R110 mil tou le mwan pour li tousle. E i pran tou sa ki pour li Mr Speaker.

Larzan *fungus*. Larzan La Misère, Minis - La nou devret demann *UAE* Minis, konbyen larzan vremen Lepep Seselwa ti

gannyen avek kontribisyon ki nou ti gannyen pour La Misère? Larzan *Zimbabwe*? Larzan Stasyon Elektrisite Praslin? Larzan santer la – sa santer mannyer i apele la ki zot dwa?

(Interruption)

HON SANDY ARISSOL

Ek *bodyguard*. Rann sa bann larzan Bwanna!’ E pa bliye milyon e plis milyon atraver konpansasyon ki nou pou bezwen pey bann viktim atosite ki sa Parti *SPPF* ti fer pour nou bann frer ek ser ki’n ganny disparet, touye, vyole, brile, koupe, antere, defigire, bate, noye!

Tousala, nou ti ganny li atraver en rapor ki Biro Speaker ti fer nou gannyen dan sa menm Lasanble. E sa rapor ti koz lo en sel parti politik. Sa letan ti Parti *SPPF*. E sa rapor ti fer resorti ki ti annan en group dimoun atoufer, voler, e bann kriminel. Pa mwan ki dir Mr Speaker. Se sa rapor ki ou lofis ti fer nou gannyen.

E dan sa rapor i koz lo en sel parti politik. Mon pa konnen si zot la anndan. Nou lo sa kote nou apel *LDS*. E zot koman en parti kanmaron, zot pe vann tou zot byen. E larzan pe ganny partaze antre zot, mon tande Mr Speaker.

En bann pe ganny 10 mil. En bann pe ganny 50 mil. Lot pe ganny 40 mil. Sa enn ki kit *afro* li i marse dan Lari Bazar e kriy swadizan; “viv nou Prezidan!” Li i pa ganny naryen. Zot a dir mwan si vre oubyen manti.

Alor Seselwa pe swiv e pe demande; kote pou ganny tou sa larzan pou pey konpansasyon? Eski nou pou bezwen ogmant plis *tax*? Eski nou pou bezwen vann bann *asset US*? Eski nou pou bezwen rebran *Maison du Peuple*? Zot bliy vitman. Zot lespri i kourt. Se zot sours tou soufrans Lepep Seselwa!

(APPLAUSE)

HON SANDY ARISSOL

Me Seselwa in met konfyans dan *LDS*. Se pour sa rezon zot in vin en pti parti minoriter. Si ti annan en zanfan lakres la i ti pou dir; en pti parti kakayonyont! Alor akoz Seselwa pa kontan zot. Napa konfyans dan zot. Pa pou *vote* pour zot ankor. Zot bezwen mont ek en bato ek lanmwatye pou fer *rally* La Digue. Akoz?

Be pa La Digue pa zot bastyon? Pa zot ti ganny 100 poursan. Laplenn i devret plen. Digwa in perdi konfyans dan zot Mr Speaker. Zot dezespere. Zot

in promet pozisyon plizyer dimoun, prezan pouvwar i tarde. Alor Ali Ali mele.

Letan zot *busy* pe kriy Lazar pou sorti dan tonbo, Prezidan Ramkalawan pe rod plis larzan pour Seselwa. Anmezir Sesel i fer byen, i redistribye sa larises ek tou kous nou sosyete. Ek kwa ki mon pe dir par sa?

En zoli lopital pour sa manman donn nesans son zanfan dan konfor. En lasistans si zanmen ou ganny plis ki en zanfan. Si sa zanfan i perdi enn son paran, en lasistans pour *semi orphan* ki'n ogmante, ki ti'n kaye pour plizyer lannen. I ava en soulazman.

Sa zanfan ki pa vote i benefisye ek en *breakfast* ek dezennen pour naryen. Lakres e dan primer. Dan segonder zot ganny *Laptop Scheme* pou ed li dan son letid. Pos-segonder zot ganny *allowance* pou soutenir zot bezwen. Si ou al Liniversite ou *stipend* i ogmante.

Letan ou retournen pou vin travay, ou trezyenman saler i garanti avek sa Gouvernman. Avek en kiltir travay dir e pran tou sa ki pour ou e kit tou sa ki pa pour ou lanmenm. Si ou annan serten abilite spesyal, ou lasistans i garanti avek *LDS*.

Si ou en dimoun aze, ou Sekirite Sosyal ek ou pansyon ki ou'n kontribye i garanti. E i pa baze lo kapris letan. Zot ti sey anbet Seselwa Mr Speaker, an di-z-an ki si ou *vote LDS* ou Sekirite Sosyal pou ganny arase. 500 Roupri an plis.

Me nou, nou pe dir pa ase, fodre revwar e rode ki mannyer nou aziste anmezir pei i fer bokou pli byen. Parey Minis in dir nou, pour nou soulaz nou bann aze ki al dan menm magazen avek nou.

Mon anvi letan Minis i la, pou nou revwar sa *Scheme Home Repairs*. Anou diversifye li Minis, pou ki i kapab akomod pa zis *home repair*. Me permet nou bann dimoun aze pou aste en pti *fridge*, en televizyon, en larmwar. Anvi zot pa ganny *loan* ek labank pour zot kontinyen viv dan konfor e dinyite koman bann Seselwa.

Letan mon lo sa size dimoun aze, i mon devwar pour mon demann ek *Pension Fund* atraver Gouvernman, pour nou sey travay lo diferan *scheme* pour bann *diaspora* ki reste e viv aletranze. Akoz apre i ariv bann sityasyon ki zot vwar zot bezwen retourn Sesel dan zot vye zour, zot napa nanryen pou rezouir lo la.

Ankouraz zot pou
konmans fer serten

kontribisyon ki ava bon pour pei e osi pour zot. E ki personn pa ava ganny kit ater an sa ki konsern lasistans e byennet nou bann aze. E pli spesifikman, nou bann frer ek ser Seselwa.

Sa ki nou dan *LDS* nou krwar ladan e ki nou pe rode. Sa Bidze i fer provizyon ki bann proze lo nivo distrik ki Onorab Wallace ti'n dir kennsel e kontinyen. Pe kontinyen Mr Speaker. *LDS* i sey partaz sa pti benefis dan tou kwen.

Mon kontan pour bann proze lakaz ki'n demare e konplete dan distrik Bel Ombre. Delo Ladal i enn. *Nouvo Corsair Flat* dan zis 1 an, 19 zour in konplete pour ki Minta avek Anya Comettant zot a sorti - zot ti sorti dan en vye *bedsitter* ki ti pre pou tonm lo zot, apre tou sa letan. Sheila ek Suzanne – (mon aroz mon lagorz en pti gin)

(laughter)

HON SANDY ARISSOL

Sheila ek Suzanne ki lakaz ti'n brile e Suzanne ros ti'n kraz son lakaz. Ti pe reste Barbarons pou plis ki 5 an Mr Speaker. Sa lannen zot pou fer Nwel se zot apre tou sa letan ki zot ti met konfyans dan sa lot Gouvernman. Mon defen zanmi Lucienne ek son bann zanfan,

finalman zot in retourn dan zot lakaz. Enkli Jennifer – apre ki dife ti bril zot lakaz.

Nouvo Proze *Flat* ankor *Cameroon*, 16 *unit*. Se pa koup riban sa Mr Speaker. Se pa proze 24 sa. Se pa en *architect* sa ki'n fer. Se Gouvernman *LDS*. Larzan dan Bidze menm. Larzan dan Bidze pou asiste bann fanmir ki anvi fer bann proze fanmir. Parey negosyasyon in konmanse pour lafanmir Tirant dan distrik Bel Ombre.

Later i rar Mr Speaker, me i annan en demars pou ouver e met a dispozisyon zabitan Bel Ombre ankor en dizenn kare *land bank* dan Le Nirole. Nou pe demann Gouvernman pou idantifye en morso teren pour en proze *condominium* pour nou bann profesyonnel. Tou sa travay zis dan 3 ans. Me pa dan 30 an.

Letan peser i dir in ganny langar napa delo, nou'n met delo. Napa langar pou zwe *domino*, nou'n fer langar pour zot. Letan zot lasosyasyon i lanse e Lotorite Distrik nou siport zot par fer en lanmes spesyal, pou donn zot sa sipor. E nou donn zot landrwa pou fer aktivite, pou zot fer zot *fundraising*.

Letan *SEYPEC* pe fouye pou fer lapas pli fon, pou tir

bann ros ki neser ki peser ti demande pour zot bato pase dan mare ba. E nou pe negosye pour en pli gro laponp *fuel*. Tousala pour peser menm. Pa akoz mon pa bwar avek zot e al lapas avek zot, pa vedir ki mon pa kontan peser.

Letan zot pe fer en travay lo lanmer, mwan mon pe fer en travay pour zot ater. Felisitasyon pour nou nouvo Lasosyasyon Peser Bel Ombre. E lo la i annan 2 fanm serye. 2 zabitan Bel Ombre. E felisitasyon pour zot partisipasyon pou anmenn Bel Ombre pli devan.

Byento Mr Speaker, nou pou ganny en nouvo Ladministrasyon Distrik ki'n ganny bidzete akoz sa enn pre pou tonbe. Letan bato lwazir i demann en langar pour son kliyan, fasilite twalet nou'n fer. E nou pe swete ki Lotorite Por i konsyan ki sa bezwen sa fasilite dan *weekend* osi e konze piblik.

Tou sa i form parti sa larzan Bidze. E mon pou kontinyen vote pour Bidze. Akoz mon pa konn zis pour mwan e mon mazin osi pour lezot dimoun dan mon distrik.

Letan nou pe sey met en lord lo sa konblaz ki'n ganny konble pour plis ki 22 an. E i en dezord avek bi pou donn akse later bann ki bezwen e ki'n pas

atraver prosedir normal. Me an menm tan mon pe demann ek mon Gouvernman pou revwar bann kontra ki'n la depi 2014 e ki pe dormi, pou donn sa ki bezwen.

E nou osi pe konsider en bout pour fasilite peser ek bato lwazir pou maintain zot bato san ki i afekte lakominote dan Bel Ombre. Semen *Carpin* negosyasyon i lo bon semen, avek tou permisyon neser nou pou fonsse Mr Speaker. Pa pe fer nanryen menm? Pa war ou menm? Pa tann ou menm? Pa sa ki ou tande *anymore*. *LDS* pe travay Mr Speaker.

Letan nou pe negosye ek Gouvernman pour en nouvo *building* kot *ex Corsaire* ti ete, avek bi pou fasilite bann zabitan avek bann servis esansyel parey; *ATM*, en lofis pou pey bann *utilities*. En landrwa pour bann pti biznes domestik. *Coiffure* pour nou bann zonm avek fanm. En masaz pour nou bann dimoun aze. E en landrwa pour nou bann peser ganny tou fasilite lapas anvi ki i dan zot *zone*.

Sa ki mon pe rode pour Bel Ombre, spesyalman bann peser. Me pa pran R110 mil pour mon tousel Mr Speaker. Olye asize kritike, rode ki ou pe fer – ki ou kapab fer pour ou distrik. E rode kwa ki ou kapab

fer pour ou kominote Mr Speaker.

Proze lagrandisman semen parey in konmanse, avek bi pou nou kontinyen ganny bann servis plis bis, pli efikas. E mon profite la ki *SPTC* in ganny en nouvo *CEO* pou revwar kouvertir lo *stand* bis.

Spesyalman kot zabitan Bel Ombre i asize pou zot pran bis apre ler travay. Soley e ankor soley, toulezour dan zot figir. Silvouple, amelyor sa sityasyon pour zabitan asize dan konfor, ler zot pey en servis pou ariv dan zot zoli distrik Bel Ombre.

Lagrandisman semen byento Le Nirole. Plis *crash barriers*, lalimyèr. *Pavement* apropiye pour nou bann zanfan. Byento en pli gran e en zoli larantre pour zanfan Lekol Beau Vallon, avek bi plis sekirite. Viraz pour transpor e konfor tou dimoun deryer *Shell Cameroon* ki al dan larantre Lekol Segonder Beau Vallon.

E osi sey – nou'n sey abitye enn de bann non semen pou idantifye nou bann *zone* dan distrik.

Semen ki konekte Dan *Valley* Le Nirole ek Beau Bel, nou pe met *proper railing*, lalimyèr ek *steps* apropiye. E en letid fizibilite pe ganny fer, pou gete si nou pa kapab ganny servi

koman en semen loto pou deservi sa 2 *zone* an ka en *emergency*. Resirfas semen *Kashoggi* ki an demann pour plizyer lannen. *Proper bin site* spesyal ki zis Bel Ombre ki annan, anvi nou en distrik touristik. *Bus shelter* pour rezyon Le Nirole. Pour en pe letan zot pa'n gannyen.

Letan mon lo size touris mon anvi fer en mansyon spesyal pour tou mon bann drayver *taxi* ki reste Bel Ombre. Nou bezwen aksepte ki plizyer sa bann drayver zot serye, onnet e lontan zot dan sa profesyon. E zot senser dan sa travay ki zot pe fer.

Mon pe lans en lapel avek mon Gouvernman pour nou travay ansanm avek zot. Pou ekout zot e zwenn zot dan sa demars pou zot kontinyen rann sa servis nou kominote e pei an zeneral.

Lagrandisman e ranforsisman sa pon ki konekte bis vire Le Nirole ek larestan Le Nirole an alan Mare Cochons. Tousala zis dan 3 an Mr Speaker. Me pa dan 30 an. Non, be napa nanryen menm dan Bidze? Menm *US* zot konplent, zot *walk out*, zot plennyen. Sa Bidze i garanti zot saler Mr Speaker ki zot pran tou trankilman san kanmi. E zot – me zot kanmi pour aksepte.

Sa en Gouvernman serye apre ki son pep in vaksinen e *airport* in reouver. Apre ki gro goute ti dir kit fermen. Vaksen pa lo standar nou'n fek tande taler. Pa'n ganny sertifye par *WHO*. Sesel in fer tre byen Mr Speaker.

Seselwa in pran zot travay o serye. Bann ki ti dan *URS*, zot permanan dan en Lanplwa. Plis larzan e plis benefis pou anmenn dan lakour.

Letan mon pe konklir, avek plis prodiktivite, larises pe ganny partaze atraver pei Mr Speaker. Depi nesans ziska nou bann dimoun aze. Larises partaze lo nivo nasyonan, bann pli gro proze. Proze ki'n kaye parey parti US. Ziska pti proze lo nivo distrik pour nou bann zabitan. *LDS* pe travay e travay i la.

Letan zot dir Bidze pa bon, zot pe swete ki lekol pa pou ouver. Klinik pou fermen. Magazen pou fermen. *Airport* avyon pa pou al *Tanzania anymore*. Saler pou napa. Non, Mr Speaker. Pei pou kontinyen bouze. Zis *US* ki pou kontinyen kaye e zot pou mars an aryer parey kanmaron avek zot latitud negativ.

Me nou ladministrasyon pa zis fer promes, me nou delivre pour Lepep Seselwa. Vre zonm dan lopilans i bliy son

nesans. Sa i fason ki mon kapab dekrir sa bann deklarasyon iresponsab e negativ.

Zot kestyonn progre e dout tou zefor Gouvernman menm si zot war e plizyer in ariv kot sa pep devan zot prop laport.

Nou anvi en nouvo Sesel avek en pep travayan, pozitiv e prodiktiv. Olye demande ki ou pei i kapab fer pour ou, nou anvi en pep ki vire i demande; kwa ki li i kapab fer pour son pep.

Koz mansonz pa pou anmenn zot okenn par, me zot nennen pou kontinyen grandi parey *Pinocchio*. Pran en balye fatak pa pou anmenn zot lwen, me zis deryer laport. Mars an aryer parey kanmaron pa pou fer zot ariv pli vit. zot pou zis bite, bite e bite parey i leka ozordi.

Sel opsyon pour en meyer Sesel dan lape e dinyite san lafreyer, se avek *LDS*. Nou lo sa kote latab nou pa pou zanmen les nou pei ek nou Seselwa tonbe. Viv Sesel, viv *LDS* e nou pa pou zanmen les tonbe! Mersi bokou Mr Speaker.

(APPLAUSE)

MR SPEAKER

Bon. Nou a pran poz e nou a retournen 4 er pou ekout repons Minis lo deba. Mersi.

(BREAK)

MR SPEAKER

Alor pou konklir, mon a envit Minis pou donn son repons lo deba. Minis?

MINISTER NAADIR HASSAN

Mersi Mr Speaker. Mr Speaker, *Leader* Lopoziyon, *Leader* Zafer Gouvernman, tou bann Manm Onorab, tou dimoun a lekout bonn apre midi.

Mr Speaker, avan mon konmanse, mon ti a zis avek ou permisyon kontan demann tou bann Manm pou akord mwan lakourtwazi, ler mon pe koze pou napa lenteripsyon. Mon'n asize 3 zour, mon'n ekout tou dimoun san enteronp person, kantmenm kritik ek maltrete.

Mr Speaker, les mwan konmans mon repons Bidze par partaz en pti refleksyon, ki mon'n fer ler mon'n leve bomaten e pe desann pou vin travay.

Mr Speaker, mon'n leve granmaten apre ki lapli ti pe tonm en pe. Soley in leve e montre ki sa Vandredi le 10 Novanm pou en zoli zour. Akoz

en soley briyan in leve lo Sesel. An desandan zanfan avek en sourir lo zot figir pe desann pou al lekol. Seselwa pe desann pou al travay, pou al debourye pou ganny zot lavi. En lanvironnman fantastik ki fer lizye ek leker kontan.

Mr Speaker, nou tou nou bezwen realize ki degre sanse nou ete, pou viv dan en pei beni par Bondye li menm.

(APPLAUSE)

MINISTER NAADIR HASSAN

Alors mon refleksyon apre 2 zour negativite total sorti kot Parti *US*. Mon demann mon lekor en kekyon. Be ki problem sa Parti *US*? Zot in penn en portre konmsi Sesel sa dernyen pei pou viv ladan ozordi. Konmsi Sesel sa pei pli pov dan lemonn. Pei pli dan mal ki egziste dan lemonn.

Me mwan konman en patriyot mon fyer mon pei. E toulezour mon annan gratid pou sa zoli pei ki bondye in donn nou, kantmenm tou son defi. Sa bann fo profet ki fer Seselwa krwar, ki soley ti pou aret leve e kouse an Oktob 2020, ki lapli ti pou aret tonbe, e ki tou keksoz ti pou fini Sesel, les mwan dir zot, Sesel i ankor la! Soley i ankor pe leve e kouse

e nou pei pe kontinyen
progrese!

(APPLAUSE)

MINISTER NAADIR HASSAN

Mr Speaker, pou Seselwa konpran byen mantalite *SPPF*, Lepep, *US*, se komanter Onorab Aglae ki reflekte sa. Kot i dir tou keksoz Sesel se akoz *US*. Konmsi legzistans *US*, legzistans Sesel se gras a zot. Les mwan dan tou imilite dir avek Onorab Aglae, Sesel in kree par Bondye. Sikse Sesel i baze lo zefor e lasyer pep Seselwa. E Seselwa, pa dwa *US* nanryen!

Pli gran legzanp sa kalite mantalite, i sa ki zot in fer avek Onorab Naddy Zialor yer apre midi. Zot in akiz li konman engra, akoz dapre zot i dwa zot gratitid ziska son dernyen zour. Se zot sa parti minoriter ki dwa Sesel e Seselwa par zot aksyon lepase!

Mr Speaker, les mwan dir zot Sesel ti egziste avan zot. Sesel i egziste san zot e Sesel pou kontinyen egziste san zot!

(APPLAUSE)

MINISTER NAADIR HASSAN

Aret donn zot lekòr lenportans, akoz Sesel pli gran ki zot! Arete

sa mantalite parey bann fo profet.

Mr Speaker, mon oule konmans mon larepons lo Bidze par premyerman remersi tou bann Manm pou zot repons lo Bidze. Mon anvi dir en gran mersi spesyal pou repons bann Manm *LDS*, pou zot bann mo sipor, zot lankourazman pou mwan e mon lekip ki'n prepar sa Bidze. E osi pou pran letan e eksplik Lepep kwa ki annan dan sa Bidze. Mersi bokou.

Lo lot kote Mr Speaker, i annan en dezapwentman avek parti minoriter. Zot in parey labitid koz bokou me pa dir gran keksoz. Zot in plizoumwen pran zot letan maltret Prezidan, maltret bann Minis e fer Seselwa krwar lizour pou aswar. Fer en bann gran, gran promes, senm konfizyon e kontinyen obsede avek pouvwar.

Mr Speaker, mon ti'n mazine ki apre 3 an, apre sa defet ekrazan e imilyan, ki zot douler ti ava redwir. E zot ti'n kapab reflexir akoz zot ti ganny met deor e vin avek nouvo lide. Me non, parey toultan mon'n dir zot 15 lo 10, zot pa'n reflexir akoz zot ti ganny defet. 2020 ankor zot pa'n reflexir vre rezon zot defet.

E 2025 ler zot krwar zot pe lager pouvwar, se pa si zot pou

ankor parti Lopozişyon prensipal. Akoz zot senpleman pe vin irelevan, akoz zot le tourn an aryer.

(APPLAUSE)

MINISTER NAADIR HASSAN

I paret mwan sa realizasyon ki manner zot pe vin irelevan i fer zot ankoler, annan lanmertim, vin anmer e vilger ek sa douler defet i ankor lour lo zot leker.

Mon a swete ki Bondye i a donn zot kouraz pou aksepté zot defet. E bouze e vin en Lopozişyon serye. A lafen dizour Sesel i bezwen tou son zanfan. Menm bann ki konmela pe travay kont li. Mr Speaker, mon annan lespwar ki zot kapab sanze.

Mr Speaker, 3 zour mon'n ekout bann repons, mon krwar i enportan dan mon repons ki mon fer kler ek pep Seselwa, ki Sesel i annan de swa kler devan zot. E sa Bidze e larepons mon'n tande i fer sa vreman kler.

I annan en Gouvernman e Parti LDS ki determinen pou anmenn Sesel devan, e lot Parti US, parti minoriter ki li i le retourn dan lepase. Sa i en swa vreman senp.

E la mwan mon oule demann Lepep Seselwa enn de keştyon. Mon mazine se sa

bann menm keştyon ki zot ti reponn an 2020, e zot pou reponn ankor an 2025.

Eski zot le retourn ver en sistenm ranpli ek koripsyon? Eski zot le retourn dan en sistenm viktimizasyon e ek nou pa ek nou? Eski zot le retourn dan en sistenm iresponsab ki'n faid sa pei pa en fwa me de fwa? Eski zot le retourn dan en sistenm ki'n fer nou bann lakonpannyen parey *Air Seychelles* fait?

Eski zot le retourn dan en sistenm ki oule met nou sistenm Fon Pansyon an danze? Eski zot oule retourn en sistenm ki donn zis sa ki siport US ek son bann dalon tou keksoz? Eski zot le retourn dan en sistenm kot parti politik i fer biznes ek Gouvernman? Ser, frer Seselwa eski zot le retourn anba sa gro nyaz nwanr? Mon krwar pa.

Mr Speaker, lo lot kote nou annan en Gouvernman ki oule travay pou byennet pep Seselwa. Ki kantmenm desizyon i difisil, i pa per pou pran desizyon. Enn ki annan en vizyon pou Sesel e sa vizyon i vreman tre kler.

E la nou war sa gran diferans ant sa de parti. Alors les mwan eksplik dan en fason tre senp, ki vizyon sa Gouvernman e demontre ki

manner lo lot kote sa parti minoriter kot vizyon i senpleman en ilizyon.

Nou konn laspirasyon nou pep. En lekonomi ki performan ki pou labaz kreasyon larises nou pei e nou sitwayen. Zot oule en servis piblik ki delivre pou zot. Lenfrastruktir ki meyer, se akoz sa ki anmenn en ekonomik sosyal pou nou sitwayen. En pei ki annan lord ek lape e lager kont sa bann fleo sosyal.

Mr Speaker, se sa bann priorite pou sa Gouvernman. Me lo lot kote ler mon'n ekout bann diskour parti minoriter, mon demande, oli zot plan? Oli sa alternativ? Ki manner zot pou finans sa plan alternativ?

Sel keksoz ki dan zot plan ki mon'n tande se bann Polisi popilis e bon marse, maltret Prezidan, maltret Minis, bat kalot dan tou keksoz, gele e plennyen, akoz zot nepli o pouvwar. Kontinyen reve pou ganny pouvwar me sel keksoz ki zot obsede avek se pouvwar. Ki pouvwar in fer zot, ki 43 an pa'n ase? Ki zot ankor dezespere pou reganny pouvwar menm.

Mr Speaker, eski ler zot fer sa bann deklarasyon, eski zot mazin en avan zot koze? Les mwan met sa dan en lot fason pli senp pou Seselwa. En papa i vin kot lakour e i dir ek son

fanmir, "ozordi mwan ek manman nou pou konmans travay mwens e anmenn mwens larzan kot lakour. Me an menm tan nou pou al fer pli gro lakaz e aste pli gro loto." Sa ilustrasyon senp.

Mr Speaker, i senpleman sa realite ki Parti US pe met devan Lepep Seselwa. Annou regard zot pozisyon lo Fan Pansyon. Tou bann eksper teknik Fon Pansyon, Minister Finans ek bann eksper enternasyonal in dir, ki an 2034 Fon Pansyon pou faid san reform. Me avek dan sa konteks, zot pe dir tir plis larzan ladan e met mwens larzan.

Mr Speaker, si zot vreman krwar ki sa ki zot pe dir, mon *challenge* zot pou vin avek bann analiz ek bann kalkilasyon ki manner zot plan pou Fan Pansyon i ete. Les mwan dir zot *walk the talk*, pa zis fer bann gran, gran deklarasyon.

Kekfwa vre mon mal, kekfwa vre bann teknisyen ki'n donn konsey i mal. Kekfwa vre tou sa bann eksper enternasyonal i mal. Kekfwa se sa parti minoriter ki'n fer vini en eksper \$4 mil pou aranz Fon Pansyon.

(APPLAUSE)

MINISTER NAADIR HASSAN

E ki annan bann ansyen ansenyan matematik ki krwar €25 milyon i R300 mil pou konsey zot. Kekfwa zot ki byen.

Be mon a donn zot *benefit of the doubt*. Akoz kekfwa zot a rezourd en problem mondyal, kot laz pe monte e kantite Fon Pansyon atraver lemonn ki pe rankontre problem i bokou. San dout si zot kapab fer sa, mon mazine zot a ganny en Pri Nobel pou Ekonomik ek Finans. Akoz pa bliye zot, zot annan bann ekonomis ki *train lo YouTube*.

Mr Speaker, kekyon enportan se oli Polisi parti minoriter? Mon pa war. Oli Polisi ekonomik parti minoriter? Napa. Oli zot plan pou rekonstrir pei? Mon pa war. Sa parti minoriter pa'n donn okenn plan konkret. Akoz eski larepons se ki zot napa en plan? Zot in zis montre sa enn ki enn zot ansyen Minis ti dir, ki zot *intellectually spent*. Sa i vreman en tre bon deskripsyon pou zot.

Ozordi i kler Mr Speaker, ki sa parti minoriter la anndan, napa en sou plan pou sa pei e sa pep. Mr Speaker, sa parti minoriter i annan en listwar e *legacy failure*. E la ki nou vwar zot pe vin avek bann menm solisyon lepase ki'n *fail* nou pei

e nou pep, ki'n fer parey mon'n dir avan sa pei faid 2 fwa.

Sa bann solisyon lepase ki'n *fail* nou ler zot ti o pouvwar, zot sertennman pa solisyon pou nou pei ozordi, e pou nou pei bouz devan.

Mr Speaker, nou pei pe bouz devan e avek sa bann devlopman ki pe arive, sa parti minoriter in nepli okenn opsyon pou Sesel.

Mr Speaker, sa parti minoriter pe kontinyelman bat sa tanbour aret investir dan devlopman lenfrastruktir. I fer 3 an ki mon pe asize la devan pou ekout zot repons. E toultan zot dir menm zafer menm.

Kestyon, si nou aret investir dan lenfrastruktir, ki mannyer nou pei pou devlope? E ki mannyer nou lekonomi pou agrandi, pou kre plis larises pou Sesel? Kote nou bann zenn pou al lantrennman pou fer sport si nou pa investir dan lenfrastruktir?

Kote nou zanfan pou al lekol si nou pa investir dan lenfrastruktir? Kote bann ki malad pou ale pou ganny swen medikal, si nou pa investir dan lenfrastruktir? Ki mannyer mouvman dimoun e komers pou ete, si nou pa investir dan lenfrastruktir? Ki mannyer touris pou kontinyen vin Sesel si nou pa investir dan

lenfrastriktir? Ki manner komodite pou antre dan sa pei si nou pa investir dan nou lenfrastriktir?

Ki manner travayer pou al travay si nou pe investir dan lenfrastriktir? Ki manner nou pou asiste bann ki pe rod lakaz avek Gouvernman, si nou pa investir dan lenfrastriktir? Ki manner nou pou gard lord ek lape ek sekirite dan nou kominote si nou pa investir dan lenfrastriktir?

Mr Speaker, mon ti a kontan envit bann Manm US pou mars en pe aswar e regarde manner nou semen i eklere ozordi. Lenstalasyon nouvo lalimyer, sa i en lenvestisman dan lenfrastriktir. An 2023 ti annan R7 milyon pou aste e enstal nouvo lalimyer dan semen. E la an 2024 i pou annan en lot R7 milyon. Bann semen pe ganny refer e re sirfas. *At least* byento nou pa krwar ki nou ava dan vandswet 12 mwan dan en lannen ler nou pe dray.

Mr Speaker, zis gete kantite larzan ozordi ki nou bezwen depanse zis pou investir dan renovasyon batiman Gouvernman dan sa pei. Akoz move zesyon sa parti minoriter. Depi son lekol, klinik, semen, fasilite sportif, Libreri Nasyonal tousala in

ganny neglize. Si US ti konn fer zot travay zanmen nou ti pou bezwen sa ta larzan pou investir dan renovasyon lenfrastriktir.

E sa Mr Speaker, i en laverite e enn zot pli gran *failure* pou sa pep e sa pei. Mr Speaker, ozordi sa kantite lenvestisman dan lenfrastriktir ki pe arive lo Praslin ek La Digue, i enorm. Sa lenvestisman i pa pou ni Prezidan, ni bann Minis, e ni sa Gouvernman ki la. I pou zabitan sa de zil.

I pou ede dan zot lepanouisman personnel e sertenman dan devlopman sa de zil. Zis par egzamp get kondisyon Lekol La Digue, eski en nouvo lekol pou sa zil i en lenvestisman pou Prezidan, pou Minis e Gouvernman?

Non, i pou sa bann zanfan Digwa annan en lanvironnman lekol konvenab, pou zot aprann pou vin bann sitwayen byen edike, entelizan e responsab.

Mr Speaker, mon ti personnelman al vizit Lekol La Digue an 2022. Sa zil i annan en plas spesyal pou mwan akoz mon madanm i en Digwaz mon 2 zanfan zot osi lanmwatye Digwaz. Kondisyon sa lekol ti fer lapenn e deplorab! Mon ti envit Onorab Zil Pros pou vin sa vizit, me i ti *nowhere to be found*. Selman toudmenm sa

vizit ti pas tre byen akoz Digwa zot tre akeyan.

Mr Speaker, mon mazine ler travay lo sa lekol i konplete, Onorab pou la pou li vin koup riban. Mon swete. mMe la mon a donn li en *warning* pa vin ek okenn petisyon pa fer Lekol La Digue. Akoz sa petisyon pou pas parey sa enn ki i ti fer pou Lopital *St. Mary's*.

Mr Speaker, an 2024 nou pe met en kantite larzan pou investir dan bann fasilite sportif, ki'n ganny neglize pou plizyer lannen. Zot osi zot dan menm kondisyon ki Lekol La Digue. Konmsi si ou ekout sa parti minoriter, tou sa bann fasilite in tonm dan sa move leta pandan sa dernyen 3 an.

Mon'n fer li mon devwar ansanm avek Minis pou Spor, pou al vizit sa bann lenfrastruktir. Mon'n soke ki mannyer en Gouvernman ki servi *taxpayers' money*, pou investir i kapab les en lenfrastruktir pei tonm dan en tel degenn. Apre anmenn *PNQ* pou rode akoz performans atlet i pli ba. Be demann zot lekor sa kestyon. Zot devret kanmi!

Mr Speaker, sa zafer aret investir dan lenfrastruktir, i enn parmi deklarasyon sa parti minoriter ki pli bet ki mon'n deza tande. Lekel sa pei ki pa investir dan son lenfrastruktir?

Menm en fanmir enn bann premye lenvestisman ki i fer se dan son lakaz. En lakaz i kwa Mr Speaker? En lenfrastruktir.

Mr Speaker, nou pa pou zanmen ekout sa parti minoriter, an sa ki konsern lenvestisman dan lenfrastruktir, sirtou pou nou refer nou fasilite sportif. Nou sertenman pa pou zanmen ekout en parti ki'n *fail* Sesel e pep Seselwa.

An plis Mr Speaker, sa parti minoriter i montre ki mannyer zot konfize e kontradwir kanmarad. En bann pe rod plis lenvestisman dan lenfrastruktir. Par kont en lot bann pe plennyen pe dir aret investir dan lenfrastruktir.

Mon mazine bann ki'n ganny elekte zot konpran lenportans pou investir dan fasilite dan zot distrik. Par kont sa 4 ki pa'n zanmen debout dan en eleksyon zot, zot pe kriye pa investir dan lenfrastruktir.

Align zot aret senm konfizyon. Annan konsistan dan zot largiman e mazine avan ki zot koze. Mr Speaker, ler mon tann sa parti minoriter pe demann plizyer Minis pou demisyonnen, mon bezwen riye. Ou konnen akoz mon riye Mr Speaker? Akoz zot bliye ki se pa zot ki o pouvwar.

Les mwan fer tre kler avek sa bann Onorab lekel ki'n

apwent sa bann Minis. Se pa lot ki Prezidan Ramkalawan ki an Oktob 2020 ti ganny en laviktwar ekrazan 55poursan Mr Speaker.

(APPLAUSE)

MINISTER NAADIR HASSAN

Sa bann Minis ti ganny konfirman dan zot pozisyon par sa mazorite LDS e pa par sa bann MNA parti minoriter. Pou sa enn ki li i pe kontinyelman kriy pli for “*resign* Minis” mon konsey li al debout dan en eleksyon, ganny elekte par Lepep Seselwa olye par zis 9 son prop Manm.

Mr Speaker, nou pran lord avek Prezidan, pa avek en MNA ki pa konnen ki mannyer pou debout dan en eleksyon. Mr Speaker, pou sa size konpansasyon kot sa parti minoriter pe koz labous plen ozordi, mon oule fer zot rapel ki se akoz zot lenkonpetans, zot bann aksyon koripsyon ki nou dan sa sityasyon. An ka zot in bliye les mwan fer zot mazinen.

Polisyon delo La Misère enn zot lenkonpetans ki ozordi *taxpayers* pou bezwen peye.

Polisyon Stasyon Elektrisite PUC Baie Ste Anne en lot zot lenkonpetans ki

ozordi *taxpayers* pou bezwen peye.

Konpansasyon pou Mr Alain St Ange apre ki zot Gouvernman ti retir zot sipor pou son kandidatir pou pozisyon Sekreter Zeneral UNWTO, en lot zot lenkonpetans e *taxpayers* pou bezwen peye.

Zot bann atosite kont sa pep ankor en lot aksyon malfeter, ki ozordi zot pe refize zot rol ladan e zot oule *taxpayers* ki peye.

E la mon demann Seselwa eski zot larzan taks, eski zot larzan taks zot zanfan dan fitir, ki pou pey aksyon sa bann an 1977? Eski i normal sa? Eski mon zanfan ki pou pey pou zot lerer?

Si sa i arive Mr Speaker, mon pou devan Lorloz ek mon plakar avek 3 kar Seselwa pou dir zot ki pou peye!

(APPLAUSE)

MINISTER NAADIR HASSAN

Tousala sa bann konpansasyon ki pez lour lo *taxpayers* Mr Speaker. Be lekel ki responsab? Se sa parti minoriter ki ozordi zot in lav zot lanmen, akoz zot, zot pa responsab. Annefe ler ou ekout zot, zot pa responsab pou nanryen ki’n al mal anba zot *watch* dan sa pei. Zot krwar ler

zot sanz zot non, i sanz sa ki zot ete. Sanz zot non mil fwa zot pou reste sa ki zot ete!

Seselwa les mwan demann zot en kestyon, konbyen letan zot konman *taxpayers* ki zot pou peye pou lenkonpetans sa parti minoriter?

Mr Speaker, bokou in ganny dir ki Gouvernman pe donn later ek biznes bann dalon. Mr Speaker, mon ti a demann sa bann *MNA* pou si zot annan laprev, fer zot devwar konman sitwayen responsab e *file* zot konplent. Aret fer alegasyon e zis koz lalang. Zot bon lo la zot.

Ler zot pe balans alegasyon kont dimoun, les mon demann sa *MNA*, konbyen bann ansyen *MNA US* in ganny later endistriyel? Konbyen ki'n ganny later lo Zil Eve? Pa bliy serten bann ansyen Minis osi, in donn bal dan later Gouvernman. E ler zot sorti Minis zot annan biznes.

Dirizan sa parti minoriter, eksplik nou en kou sa fyasko Ile Soleil. Larzan Seselwa in ganny servi pou fer reklanmasyon later, apre zis en endividi i ganny preski tou later.

Sa ki pli pir Mr Speaker, ou konnen kwa? Pa konnen ki kalite manboulouk ki zot in fer, lo sa menm endividi ki annan

preski tou later lo sa zil, Gouvernman e *taxpayers* i dwa li. Be sa ki kalite?

Mr Speaker, mon'n ekout byen analiz fiskal enn sa bann Onorab parti minoriter. Mon'n anvi dir li sa ki'n ekrir son diskour e analiz in *fail* li, akoz sa analiz i byen mal. En legzanp, Onorab in sey eksplike ki mannyer ou get diferans koleksyon parmi sak lannen dan taks. Non, Onorab pa koumsa ki kalkile. Pou ou konpran sa taks ou get performans taks *to GDP ratio* en pei, si i pe monte si i pe desann.

Onorab, mon konsey ou, dir sa ki'n ekrir ou analiz fiskal i ankor annan *training* pou li fer, ouswa dan lavenir rod enn ki pli bon. Mr Speaker, ki kalite analiz ki sa parti minoriter i vin avek, ler zot dir ki kou lenflasyon i ba, akoz Seselwa pa pe depanse akoz pri i ba.

Eski en dimoun i kapab eksplik sa kalite analiz avek mwan silvouple? Akoz mon krwar nou tou nou konfize. Serten konfizyon total. Mr Speaker, *Leader* Lopoziyon i dir Gouvernman pe dir i fer byen me selman nou fek pran R75 milyon an *bond*. Dapre son lozik si mon konpran, sa i vedir ki Gouvernman pe faid. I bezwen pret larzan.

Mr Speaker, mon pa konnen ki mannyer mon pou dekrir sa kalite analiz. E mwan mon annan 20 an konman en ekonomis premye fwa mon tann sa. Mr Speaker, dan tou pei dan lemond zot *issue* det. Sesel in touzour *issue* det e pou touzour *issue* det. Nenport ki parti politik ki la o pouwar pou *issue* det.

Napa okenn Gouvernman ki pou fonksyonnan san pran det. Les mwan fer kler ek Onorab *Leader* Lopozisyon, ou pa pou montre mwan ek mon lekipe ki mannyer mon pou fer mon louvraz.

Mr Speaker, parti minoriter i koz lo “*under execution of capital project*” konmsi sa se en lenvansyon Gouvernman *LDS*. Sa i en keksoz ki sa dernyen 3 an ki’n arive. Les mwan montre zot, zot lipokrizi. Zot prop Minis Finans ki ti dir dan son Diskour Repons Bidze an 2019.

E la mon site “lo zesyon nou bann proze kapital Mr Speaker, nou’n rekonnèt sa *challenge* ki nou pe eksperyanse pandan sa dernyen 10 an. An 2013 nou ti entrodwir nou Polisi lo zesyon proze kapital dan sekter piblik, avek le bi amelyor lafason ki proze i ganny konsepte, swazir, analize e ganny selekte.

Lapwentman en *Development Committee* in ede pou asire ki sa bann proze kapital, i ganny konsepte par bann Minister, oubyen departman i aktyelman nesese e ki napa anbigite dan seleksyon proze. Me par kont defi ki nou ankor pe vwar se dan sa egzekisyon proze. Depi 2015 Mr Speaker, egzekisyon i ganny *monitor* e raporte avek *Cabinet of Ministers* tou le 3 mwan. Me par kont nou rekonnèt ki nou annan bann defi enstitisyonnel e kapasite pou asire ki nou kapab egzekite tou bann proze dan Bidze.”

Mr Speaker, sa *statement* ti ganny fer par Minis Finans an 2019. Si mon rapel byen, pa mwan ki ti Minis Finans an 2019 se zot Minis Finans ki ti dir sa. La en sel kou sa problemm “*under execution of capital budget*” in kree par Gouvernman *LDS*. Sanmenm sa mon dir zot pa realize ki zot in dir dan lefase.

Zis pou fer rapel Mr Speaker, an sa ki konsern lenportans bann proze kapital, an 2019 e la ankor dan bann dokiman ofisyel. *Landmark* proze Parti *US* ti en tinel ant Grand Anse e Cascade. Par kont nou ladministrasyon nou proze *landmark* i en nouvo lopital pou sa pei e sa pep! Mr

Speaker, la la diferans ant sa de parti.

(APPLAUSE)

MINISTER NAADIR HASSAN

Mr Speaker, *Leader* Lopoziyon i dir zot in met plis larzan dan pos Seselwa konpare avek nou Gouvernman. Be la en pti fe, i fasil pou ou al zis fer en pti resers ou a vwar pou ou menm. Bidze 2019, Bidze saler Gouvernman ki Gouvernman US ti anmennen, Bidze saler ti R2.67 bilyon. Ou konnen konbyen saler Bidze Gouvernman 2024 i ete? R3.66 bilyon. R1 bilyon an plis an saler. Mon krwar si nou tou nou konn kote 3.66 i plis ki 2.67. Se nou Gouvernman ki'n met plis larzan dan pos Seselwa. R1 bilyon an plis e sa i en fe e i dan Bidze ki en dokiman ofisyel.

(APPLAUSE)

MINISTER NAADIR HASSAN

Mr Speaker, sa menm *Leader* Lopoziyon parey mon'n dir in fer plizyer alegasyon lo depans Gouvernman. Be pa i annan en prosedir tre kler ki Lasanble i fer lenvestigasyon depans Gouvernman? Pa *FPAC* ki fer sa? Likel *Chairman FPAC*? Mwan?

Mr Speaker, mon a konsey *Chairman FPAC* pou fer son louvraz ki *taxpayers* Seselwa in pey li pou li fer. Olye zis pas son letan zis fer alegasyon.

Mon a osi konsey li pou pa bliy sa Rapor Oditer Zeneral lo tranzaksyon later son parti avek son prop Gouvernman sa lepok. Sa pa en alegasyon, me i en fe, e en lenformasyon kredib.

Mr Speaker, ler nou pe koz lo zis fer alegasyon e koz lalang avek sa pep, mon bezwen dir mon vremen dezapwente avek Onorab Lemiel, *MNA* mon distrik. Onorab in vin dan Lasanble devan pep Seselwa e dir ki nou Gouvernman ti tir *scheme* pou finans lakaz dimoun vilnerab.

Ler nou get Bidze 2021, 2022, 2023, 2024, Bidze 2021 *Home Improvement Re-Roofing Scheme* pansyoner R5 milyon. *Poverty Alleviation Home Repair* 9.1 milyon.

An 2022 *Home Improvement Re-Roofing Scheme* pou pansyoner 5 milyon e *Poverty Alleviation Home Repair* 4.65 milyon.

An 2023 *Home Improvement Re-Roofing Scheme* pou pansyoner 5 milyon e *Poverty Alleviation Home Repair* 20 milyon. E an 2024 5 milyon e 10 milyon.

Mr Speaker, an plis mon le fer Seselwa konnen, ki dan sa Bidze i annan en keksoz pou zot tou. Par egzanzp dan Sekter Lasante nou pe investir 1.41 bilyon.

Dan Sekter Ledikasyon nou pe investir 1.4 bilyon. En sonm 41.1 milyon pe ganny investir pou program *breakfast* e dezennen.

E pa bliye avan Gouvernman LDS ti napa program *breakfast*. Zanzan P5 e P6 pou kapab aprezan benefisyè anba *Laptop Scheme* ki annan en Bidze 5 milyon. En sonm 27.6 milyon in ganny bidzete pou *Day Care Scheme* e dan *ECC trust fund* i annan en sonm 1.6 milyon.

En sonm R198 milyon pou anvoy nou zenn letid liniversite. En sonm R21.4 milyon pou pey *stipend* bann etidyan sant profesyonnel. Bann etidyan sorti lo Zil Pros ki pe vin lekòl Mahe pe ganny logmantasyon R600 lo zot *stipend*.

Zanzan lo Zil Pros ki kalifye pou *A Level* pou kapab al Lekòl *Vijay International* lo Praslin. En sonm R10 milyon pe ganny mete pou bann proze lakaz anba *scheme* spesyal. En sonm R18 milyon anba *scheme* finansman lakaz avek bann labank.

En sonm R12 milyon pou *Scheme Part Rental*. En sonm R3.4 milyon pou devlopman sport lo en baz profesyonnel. Revizyon dan 7 benefis *statutory* e nou menm al enn pli lwen par azout en wityenm benefis.

Sa program tanporer kot Gouvernman i *top up* pansyon e benefis dezabilite e envalidite ziska *maximum* R500 pe kontinyen. En sonm R10 milyon pou travay lo bann semen segonder dan distrik, ki enkli sistenm drenaz osi. En sonm R7.7 milyon pou enstal lalimyer lo semen.

Mr Speaker, ler mon tann dir napa nanryen dan sa Bidze, mon pa konpran sa komanter.

Mr Speaker, sa parti minoriter i koz lo sa ki annan plis pe kontinyen annan plis. E sa ki pli napa pou kontinyen napa. E sa i en lakizasyon ki zot pe fer kont sa Gouvernman LDS.

Mr Speaker, ki bann sif i montre nou? Annou pran en rapor lo en *Gini Inequality Index* ki pran data 2013 a 2018. E 2013 a 2018 se Parti US ki ti o pouvwar. E ki sa *coefficient* i montre. Sa *coefficient* i montre lekar ant sa ki annan e sa ki napa.

Mr Speaker, dan 76 pei Sesel i dizyenm pei ki annan pli

gran *income inequality* dan
lemonn. Felisitasyon
Gouvernman *SPPF*, Lepep, *US*.

(APPLAUSE)

MINISTER NAADIR HASSAN

Pandan zot manda zot in fer
Sesel kapab ariv dizyenm lo
lalis pei dan lemond, kot i
annan pli gran dekalaz ant sa ki
annan ek sa ki napa. Sanmenm
sa reisit en parti sosyalis ki
dapre zot pe get tou dimoun. Pe
met zom o sant zot
devlopman.

Sel keksoz ki mon kapab
dir zot se aret koz mansonz.
Levidans zot lepase i ranpli
avek *failure* i la, pou tou
dimoun war.

Parey mon'n dir pli boner,
Sesel e Lepep Seselwa napa
plas e sertennman pa bezwen
sa parti minoriter avek zot bann
solisyon lepase ki'n *fail* nou.

Mr Speaker, avan mon
konklir, mon ti a kontan dir de
parol lo bann lakizasyon
personnel ki *MNA* Johan Loze in
fer lo mwan. Sel keksoz ki mon
pou dir sa *MNA*, se mon
manman toultan ti dir mwan,
pa zanmen reponn en lenbesil
sirtou enn ki pa menm nivo ki
ou!

(APPLAUSE)

MINISTER NAADIR HASSAN

Selman i annan en keksoz mon
pou dir li. Mon garanti li mon
napa en sou disan *SPPF* dan
mon lekor. Plito lanmor ki mon
met en disan *SPPF* dan mon
lekor!

(APPLAUSE)

MINISTER NAADIR HASSAN

Mr Speaker, an konklizyon,
mon le dir mersi tou dimoun ki
pe vremen war merit e vizyon sa
Bidze. E tou sa bann Bidze ki sa
Gouvernman in prezante depi
2024. Nou pe travay pou etabli
en fondasyon for e rezilyan pou
nou lekonomi. En lekonomi
rezilyan, ki kapab fer fas avek
bann sok eksteryer.

Mr Speaker, depi 2020
nou dir klerman ki sak Bidze ki
sa Gouvernman i prezante, i
bezwen met fondasyon pou
diversifye e transform nou
lekonomi. Nou napa lot swa Mr
Speaker, pandemik *COVID-19*,
lager ant Ikrenn e Larisi. In
montre nou klerman ki sa
depandans lo Lendistri Tourizm
nepli soutenab.

Gouvernman pou
kontinyen investir dan
lenfrastruktir pou permet
diversifikasyon e
transformasyon pou arive.

Nou pe ankouraz tou
Seselwa, pou pran tou sa bann

loportinite ki nou pe donn zot, pou zot prop lepanouisman personnel. Ler ou leve ou debourye, ou pa bezwen depan lo okenn dimoun. Sirtou bann politisyen fo profet parey US. Mr Speaker, Bidze 2024 pe asir saler tou travayer. Sa Bidze pe asir benefis retret tou pansyoner, benefis pou tou bann dimoun avek dezabilite ek envalidite.

Sa Bidze pe asir benefis sosyal pou tou bann ki bezwen. Sa Bidze pe asir ledikasyon tou nou zenn. Sa Bidze pe asir lasante pou tou Seselwa. Sa Bidze pe asir lenvestisman dan lenfrastruktir pei e son pep. Mr Speaker, mon le remerci Prezidan Ramkalawan, Vis Prezidan, mon bann koleg Minis ek zot lekip teknisyen pou zot sipor dan preparasyon sa Bidze.

Ankor enn fwa, mon remerci tou travayer dan mon Minister e bann lazans ki tonm anba mon *portfolio*, pou zot profesyonnalizm e zot devouman dan zot travay.

Bann Manm Lasanble ki'n osi konpran vizyon sa Bidze, mon dir zot merci pou zot sipor e langazman. Merci Mr Speaker.

(APPLAUSE)

MR SPEAKER

Mersi. Mon ava apel bann Manm prezan pou vot lo *Appropriation Bill, 2024* lo merit zeneral. Manm ki an faver lev lanmen silvouple? Mersi. Manm ki kont?

Lo merit zeneral *Appropriation Bill, 2024* 19 Manm in vot pour, 0 kont e 7 in *abstain*. *Bill* in pase par Lasanble. Pou *Second Reading* Madanm Clerk a fer *Second Reading*.

MADAM CLERK

Mersi Mr Speaker. *A Bill for an Act to provide for the service of the Republic of Seychelles for the year ending December 31st 2024*. Mersi Mr Speaker.

MR SPEAKER

Mersi. *Bill* in aprouve par Lasanble.

(APPLAUSE)

MR SPEAKER

Well, i reste mwan pou remerci tou konsernen pou partisipasyon lo sa *Bill* dan sa staz ki nou'n pran li la. E byensir i ankor annan en long staz e sa nou pou pran li semenn prosen travay dan Komite lo sa *Bill*.

Lasanble i ava *adjourn*. E mon remersye Minis pou son partisipasyon avek nou pou sa 3 zour e mersi osi bann Manm e *staff* pou zot *attendance* ki donn nou en kantite sipor dan travay ki Lasanble i fer. Mersi. Lasanble ava *adjourn* e nou ava rebran lendi *matin* 9er. Mersi.

(ADJOURNMENT)

